

## Siunnersummut nassuaatit

### **Oqaaseqaatit nalinginnaasut**

#### **1. Aallaqqaaasiut**

Kalaallit Nunaanni piniarneq aallaaniarnerlu pillugit Inatsisartut inatsisaannik paasiuminartumik, ullutsinnut nalequuttumik atoruminartumillu pilersitsinissaq, piniarnermut aallaaniarnermullu inatsimmi pingaarnertut siunertaavooq.

Tamassuma saniatigut nunatta piniagassatigut pisuussutaanik naleqquttumik nungusaataanngitsumillu atuinermik aallaaveqartumik kiisalu aningaasaqarniarneq suliffissaqartitsiniarnerlu mianeralugit Kalaallit Nunaanni inuiqaqtigijit malittarisassanik peqarnissaat Naalakkersuisut siunnersuut aqqutigalugu siunertaraat.

Tamatuma saniatigut piniarneq aallaaniarnerlu pillugit maleruagassanik unioqqutitsisut, inuit suliffeqarfiillu, nakkutilliinermik oqartussaasumit kinguneqartitsiffiusinnaanerisa ajornannginnerulersitsisussanik periutsinik nutaanik arlaqartunik Kalaallit Nunaanni aalisarnermk akuersissutinik nakkutilliisoqarfiup peqalernissaa siunnersuutip siunertaraa. Nakkutilliinermik oqartussaasoq sunniuteqarluartoq, illersorneqarsinnaasumik pisuussutinik atuineq pillugu takorluukkap piviusunngortinniarnerani attatiinnarniarneranilu pingaarutilerujussuit ilaattut Naalakkersuisut isigaat. Naalakkersuisut taamaammat pingartippaat piniarnermk aalisarnermillu nakkutilliisut pitsasumik nakkutilliisinnaatikkumallugit nakkutilliinissamut periutsinik nutaanik peqalernissaat.

Erseqqissarneqassaaq piniarneq aallaaniarnerlu pillugit inatsimmi atuuttumi aalajangersakkat amerlanersaat uani siunnersummi allanngortinnagit ingerlateqqitaammata. Nutarterinissamik aamma inatsimmik nalilersuinissamik aaqqissuinissamik kiisalu Inatsisartut inatsisaata ataqtigiinnerusup, Kalaallit Nunaanni piniarnermut aallaaniarnermullu pingaarnertut toqqammavinnik aalajangersasut, qularnaarnissaanik siunertaqluni siunnersummi aalajangersakkat nutaat piviusunngortinneqassapput.

Taamaalilluni Inatsisissatut siunnersuut innuttaasut oqartussallu pillugit ullutsinnut naleqquttunik paasiuminarnerusunillu maleruagassanik pilersitsinissamik kissaateqarnertut kiisalu piniarnermut aallaaniarnermullu inatsimmi atuuttumi amigaatit piissusissamisuunngitsullu iluarsineqarnissaannik kissaateqarnertut siunnersuut isigneqassaaq.

#### **2. 2. Siunnersummi immikkoortut pingarnerit**

##### 2.1. Aallaaniarnermut allagartamut 15-inik ukioqarnissamik piumasaqaat

Aallaaniarnermut allagartartaarnissamut piumasaqaatitut ukiutigut piumasaqaat 15-inik ukioqarnissaq siunnersummi ikkunneqarpoq. Aalajangersimasunik ukioqalersimanissamik piumasaqaat taamatuttaaq uumasunut pisassiissutaasartunut akuersisummi aalajangersimasumik ukioqalereersimanissamik taasisuusoq immikkoortoq 2.2-mut attassuteqarpoq. Maannakkut sunngiffimmi aallaaniarsinnaanermut allagartartaarnissamut ikinnerpaanik 12-nik ukioqartussaatitaaneq attatiinnarneqarpoq.

**2.2. Uumasunut pisassiiffiusartunut akuersisummut qassnik ukioqarnissamik piumasaqaat**  
Uumasunut pisassiiffiusartunut akuersissutinik suliarinnittarnerup agguaassisarnerullu assigiissaarnissaannut atatillugu uumasunut pisassiiffiusartunut akuersissutinut tamanut ikinnerpaanik 15-inik ukioqarnissaq atuutilersinneqarpoq. Manna tikillugu tuttunik umimmannillu nujuartanik aallaaniarnermut akuersissuteqarnissamut aalajangersimasunik ukioqalereersimanissamik piumasaqaammi 16-inik ukioqarnissaq piumasaqaataavoq, siunnersummili uumasunik pisassiiffiusartunik tamanik aallaaniartarneq aalajangersimasunik ukioqalereernissamik piumasaqaat taamaaqataanik 15-inik ukioqarnissamut inissinneqarpoq.

**2.3. Akiliisitsilluni piniariartitsisartunik akuerisaasunngortitsineq aamma angallassisartumik akuersineq**  
Akiliisitsilluni piniariartitsisartunik akuerisaasunngortitsinermut maleruagassanik aamma akiliisitsilluni piniariartitsinermi angallassisartunik akuersinermut maleruagassanik aalajangersaanissamut tunngaviusussamik pilersitsisoqassaaq. Piniarnermik aallaaniarnermillu inuussutissarsiornermi ilaatigut aningaasaqarnikkut suliffissaqartitsiniarnikkullu mianerisassat pingaartinneqassapput.

**2.4. Uumasunik akornutaasunik illersuineq isumaginninnerlu**  
Uumasunik akornutaasunik isumaginninnermut atatillugu maleruagassanik aalajangersaanissamut Naalakkersuisut tunngavissaannik pilersitsisoqassaaq. Pingaarnertut pineqassapput nannut akornutaasut, nunaqarfinnut pisartut inunnillu uumasuutinullu ulorianartorsiortitsisinnaasut.

**2.5. Piniarnermik aallaaniarnermillu nakkutilliineq sunniuteqarluartoq**  
Siunnersuut aqqutigalugu siunertarineqartoq tassaavoq, piniarneq aallaaniarnerlu unioqqutitsisumik, nalunaaruteqarfiunngitsumik imaluunniit pissusissamisuunngitsumik ingerlanneqarnersoq pillugu nakkutilliinermi, sapinngisamik pitsaanerpaanik atortunik nakkutilliinermut oqartussasaup peqartilernissaa, matumanit inuit illuinut isersinnaanermut aamma angallatinik nakkutilliisummiik ikkussuisinnaanermut tunngasut ilanngullugit.

**2.6. Allaffissornikkut akiligassiissutinik tunniussisarneq**  
Allaffissornikkut pillaammik akiligassiisarnissamut arsaarinninnissamullu periarfissaq atuutilersinneqarpoq, tassunga ilanngullugu nalilinnik arsaarinninneq. Inatsisartut inatsisaata susassaqarfifi tamani periarfissaq siunnersuut atorlugu atuutilersinneqarpoq, taamaalilluni

inatsisartut inatsisaanni nalunaartussaaneq tunisisinnaanerlu pillugit maleruagassat unioqqutinneqarnerat tunuliaqutaralugu aamma akiligassiissutit imaluunniit arsaarinninnissaq allaffissornikkut akuersissutigineqarsinnaassalluni.

### **3. 3. Aningaasarsiornikkut allaffissornikkullu pisortanut kingunerisassat**

Maannakkut pisussaaffiusut siunnersuut aqqutigalugu ingerlateqqinnejarpuit ukununnga atassuteqartut:

Akiliisitsilluni aallaaniartitsineq, arfanniarnermi qamutilinnut qaartartortalinnut pikkorissarneq, piniarneq pillugu qarasaasiatigut toqqorsivimmik aqtsineq, nannut amiinik assartuinermut aningaasartuutit, arfernik toqungasunik kalinnerit il.il. kiisalu ingerlatsineq aqtsinerlu pillugit pikkorissarnerit.

Inatsimmi atuuttumi pisussaaffiit allaqqasut ingerlateqqinissaannut atatillugu pisortanut aningaasaqarnikkut allaffissornikkullu kingunerisassat ullumikkut pissutsinut sanilliullugit, amerlinissaat naatsorsuutigineqanngilaq.

taamatuttaaq allaffissornikkut akiligassanik tunniussisarnissamut periarfissaq, pisortanut aningaasaqarnikkut allaffissornikkulluunniit amerlanerusunik kingunerisassanik pilersitsissasoq naatsorsuutigineqanngilaq soorluttaaq periarfissaq politiinut nalunaarutiginninnermut tunngatillugu nukissanik amerlanerusunik piumasaqaatitaqassasoq naatsorsuutigineqanngitsoq.

Taamaattoq Inatsisartut inatsisaat suliassaqarfinni marluusuni aalajangersakkanik ilaqarpoq, pisortanut aningaasaqarnikkut allaffissornikkullu kingunerisassanik ilaqratartsinnaasunik. Suliassaqarfiiit marluk siunnersuummi pineqarput, taakkununngalu maleruagassanik amerlanerusunik aalajangersaanissamut Naalakkersuisut pisinnaatinneqarput:

1. § 17 aallaaniarsinnaanermut misilitsinnerup pilersinnissaanut tunngasoq.
2. § 22, imm. 5, eqqiluisaarneq pillugu pikkorissarnissaq pillugu piumasaqaatip atuutilernissaanut tunngasoq.

Periarfissanut marluusunut tunngatillugu pisortanut aningaasaqarnikkut allaffissornikkullu kinguneqataasussat pillugit apeqquataalluinnaqqissaassaaq, siunissami aallaaniarsinnaanermut misilitsinnermik pilersitsinissamut aamma suliffeqarfinnut, paaqqinnittarfinnut neriniartarfinnulluunniit tunisisinnaassagaanni eqqiluisaarnissaq pillugu pikkorissarnermut peqataanissaq pillugu piumasaqaatinik aalajangersaanissamut iluseq aalajangersimasoq qanoq ittoq pilersinneqassasoq Naalakkersuisut kissaatigineraat.

Aallaaniarsinnaanermut misilitsittarnerup pilersinnissaanut tunngavissaq § 17-imiiittoq atorneqassasoq aalajangiunneqarpat, 1999-imi Inatsisartut inatsisaat aqqutigalugu atuuttunngortinneqqaartoq, pikkorissarnerik aamma aallaaniarsinnaanermut misilitsinnermik il.il. pilersitsinermut ingerlatsinermullu aningaasartuutinik tamanna

nassataqarsinnaavoq. Iluseq aalajangersimasoq siuliini taaneqartoq toqqarneqartoq, aallaaniarsinnaanermut misilitsinnermik pilersitsinermut ingerlatsinermullu aningaasartuutit qanoq annertutigisumik pisortanut aningaasaqarnikkut allaffissornikkullu kingunerisassaannut apeqquaalluinnassaaq. Aallaaniarsinnaanermut misilitsinnermут akiliuteqartitsisarnissamut aammattaaq Naalakkersuisut periarfissinneqassapput, tamakkiisuusumik ilaannakuusumilluunniit aallaaniarniarsinnaanermut misilitsittarnerup pilersinneqartunut ingerlanneranullu pisortat aningaasartuutaannut matussusiisinnaasut. Taamatuttaaq aningaasartuutit tamakkerligit pisortanit akilerneqarnissaat Naalakkersuisut toqqarsinnaavaat. Kiisalu aallaaniarsinnaanermut misilitsittarnermik atuutilersitsineq, Namminersorlutik Oqartussanut kommuninullu allaffissornikkut kinguneqaateqarsinnaavoq. Iluserli aalajangersimasoq pigineqanngimmat, kinguneqaatissat qanoq annertutiginissaat oqaatigineqarsinnaanngilaq.

Suliffeqarfinnut, paaqqinnittarfinnut neriniartarfinnullu toqqaannartumik tunisisinnaassagaanni, eqqiluisaardeq pillugu pikkorissarnermut peqataanissamik piumasaqaammut, siunnersuummi 22, imm. 5-imi, tunngavissiissutip atorneqarnissa aalajangiunneqassappat, inuussutissarsiutigalugu piniartunut pikkorissartitsineq pilersinneqartariaqassaaq. Eqqiluisaardeq pillugu pikkorissarnermut tunngatillugu akiliutissap akiligassangortinnissaanut tunngaviusussamik allassimasoqanngilaq, tamatuma kingunerisaanik pikkorissartitsisarnissat pilersinnissaannut ingerlanneqartarnissaannullu aningaasartuutit tamakkerligit kiisalu aningaasartutit allat attuumassuteqartut pisortanit akilerneqartarnissaat naatsorsuutigisariaqarpoq. Siuliini taaneqareersutut, pisortanut aningaasaqarnikkut allaffissornikkullu kingunerisassai eqqarsaatigalugit, eqqiluisaardeq pillugu pikkorissarnermut aalajangersakkanik atulerneqartussanik sunik qanorlu Naalakkersuisut toqqaanissaat apeqquaassaaq.

Ataatsimut isigalugu taamaalilluni siunnersuut pisortanut allaffissornikkut imaluunniit toqqaannartunik aningaasaqarnikkut kingunerisassaanik sunniuteqassanngitsoq naatsorsuutigineqarpoq. Taamaattoq pisortanut kinguneqaataasinhaasunut tunngatillugu maleruagassanik atuutilersitsisinnaanermut siunnersuut Naalakkersuisunut periarfissiivoq. Kingunerisassalli taakku aalajangersaganngorumartussat ilisimaneqalereersimatinngagit nassuiarneqarsinnaanngillat.

#### **4. Inuussutissarsiummut aningaasaqarnikkut allaffissornikkullu kinguneqaatit**

Nalunaarusiat il.il. ingerlanneqareersut saniatigut inuussutissarsiummut aningaasaqarnikkut allaffissornikkullu kinguneqaatinik allanik pilersitsinissaat naatsorsuutigineqanngilaq.

Aallaaniarsinnaanermut misilitsitsisarnissap pilersinnissaanut siunnersuutip § 17-iani tunngavissiissutip atorneqarnissa aalajangiunneqassappat, aallaaniarsinnaanermut misilitsinerup ingerlanneqarneranut atatillugu akilummut, inuussutissarsiutigalugu piniartut aningaasartuuteqartalernerannik nassataqassaaq. Akiliutissaajumaartut

annertussusissaat piffissami matumani taaneqarsinnaanngikkallarput tassa aalajangersakkanut Naalakkersuisut kissaataat matumani aalajangersimasumik apeqqutaassammata. Taamaattoq piniartut annikitsumik ataasiartumik aningaasartuuteqarnissaat naatsorsuutigineqarsinnaavoq.

Suliffeqarfinnut il.il. tunisisinnaaniaraanni, eqqiluisaardeq pillugu pikkorissarnerit ingerlannissaannut siunnersuutip § 22, imm. 5-ianittooq tunngavissiissutaasoq atorneqassappat oqaatigineqassaaq, pingaarnertut tunissiortut eqqiluisaardeq pillugu pikkorissarnermut peqataanerannut atatillugu atuisut akiliuteqarnissaat piumasarineqartanngimmat kisiannili pikkorissarnermut peqataanermut nukimmik, matumani piffissamik, inuussutissarsiutigalugu piniartut atuisariaqarnissaat naatsorsuutigisariaqarpoq.

## **5. Avatangiisinut, pinngortitamut inuillu peqqissusaannut kinguneqaatit**

Siunnersuut avatangiisinut, pinngortitamut inuillu peqqissusiaannut toqqaannartumik kinguneqarnissaat naatsorsuutigineqanngilaq. Eqqiluisaardeq pillugu pikkorissarnerup piumasaqaataanissaat pillugu maleruagassanik aalajangersaanissamut periarfissaq Naalakkersuisut atussallugu toqqassappassuk, tamanna inuit peqqissusaannut pitsasumik kinguneqarsinnaavoq.

## **6. Innuttaasunut kinguneqaatit**

Siunnersuut innuttaasunut toqqaannartumik kinguneqassasoq naatsorsuutigineqanngilaq.

Aallaaniarsinnaanermut misilitsittarnissaq pillugu maleruagassat aalajangersarnissaannut siunnersuutip § 17-iani tunngavissiissutaasoq atorneqassappat, tamanna innuttaasut piareersimanissaannik misilitsittariaqariaqarnissaannillu kiisalu tassunga atatillugu akiliutissamut akiliuteqarnissaannik kinguneqarsinnaavoq. Akitsuutaaratarsinnaasoq innuttaasunut ataasiartumik aningaasartuutaasinnaasoq naatsorsuutigineqassaaq.

## **7. Kinguneqaatit pingaarutillet allat**

Siunnersuut toqqaannartumik annertuunik allanik kinguneqaateqassasoq naatsorsuutigineqanngilaq.

## **8. Oqartussaasut kattuffiillu il.il. tusarniaavigineqarnerat**

Siunnersuut Naalakkersuisut tusarniaanermi nittartagaanni piffissami 29. marts 2019-imit 3. maj 2019 ilanngullugu tamanut saqqummiunneqarnikuovoq, soorluttaaq siunnersuut piffissami tassani tusarniutigineqarsimavoq ukununnga tulliuttutut allanneqartunut:

- Kalaallit Nunaanni Aalisartut Piniartullu Kattuffiat (KNAPK)
- NUSUKA

- SQAPK
- Kalaallit Nunaanni Sulisitsisut
- Sulinermik Inuussutissarsiuqartut Kattuffiat (SIK)
- TPAK
- Pinngortitaleriffik
  - Kalaallit Nunaanni Politiit
  - Issittumi Sakkutooqarfik
  - Kommuneqarfik Sermersooq
  - Avannaata Kommunia
  - Kommune Qeqertalik
- Kommune Kujalleq
- Qeqqata Kommunia
- Kalaallit Nunaanni Nunaqarfinni aqutsisut peqatigiiffiat
- Danmarkimi Inatsisiniq Atuutsitsinermut Ministeeriaqarfik
- Inatsisartut Ombudsmandiat
- Kalaallit Nunaanni Naalagaaffiup Sinnisoqarfia
- Danmarkimi inuussutissalerinermut aqtsisoqarfik
- GrønlandsBanken
- Nunatsinni Advokatit – Grønlandske Advokater
- Transparency International Greenland

Piffissap tusarniaaffiusup qaanngiunnerata kingorna siunnersuut oqaaseqaatinik kinguliini allanneqartunik pilersitsisimavoq. Tassunga atatillugu oqaatigineqassaaq tusarniaanermi akissutit taamaallaat pingaaruteqarneranik naliliineq tunuliaqtaralugu pingarnersiorlugit issuarneqarmata. Tusarniaanermi akissutinut Naalakkersuisoqarfip oqaaseqaatai uingasumik allanneqarput.

### **Sulisitsisut, Grønlands Erhverv**

Sulisitsisut (GE) §-it 5, 31 aamma 36-imut innersuussilluni "pisariaqartumik piumasaqaat" pillugu piumasaqaat Naalakkersuisut sukaterneqartariaqaraat isumaqarfigigitsik ilisimatitsivoq, tassa nakkutilliinerup ingerlannissaata pisariaqassusia aalajangersarneqarsimasussaammat, minnerunngitsumik nakkutilliineq eqqartuussiviup aalajangiineranik ilaqaqtinnagu ingerlanneqarsinnaammat.

*Siunnersuusiornermut atatillugu nakkutilliinermi pisinnaatitaaffiit atuuttut pisariillisarneqarnissaasa pisariaqarnerat Naalakkersuisunit nalilersoqqissaarneqarnikuupput. Tassunga atatillugu pisariaqartutut isumaqarfigineqarpoq angallatinik, nunakkoorutinik suliffeqarfinnillu, pisat il.il. aallaavigalugit aningaasanik kaaviiaartitsisunik, suliarinneqqittartunik, suliaqartartunik, poortueqqittartunik,*

*assartuisartunik imaluunniit toqqortaateqartartunik nalunaarutigineqanngitsumik pisanik nakkutilliinermik ingerlatsisoqartarnissaa, matumani piniarnermik aallaaniarnermillu sunniuteqarluartumik nakkutilliineq ingerlassinnaajumallugu. Suliffeqarfinnut isersinnaanermut aamma angallatinut nunakkoorutinullu ikisinhaanermut piumasaqaat tassaaginnarpoq, Inatsisartut inatsisaannik imaluunniit taanna naapertorlugu maleruagassanik saqqummiunneqarsimasunik equuutsitsisoqarnersoq nakkutilliinermut oqartussaasup suliaqarnerani tamanna ilaasutut pisarmat. Taamaalilluni inatsisitigut pituttukanik suliassanik isumaginnissinnaajumalluni nakkutilliinermik oqartussaasup nalinginnaasumik isersinnaanera matumani pineqarpoq.*

*Inatsisartut inatsisaannik equuutsitsisoqarnersoq nakkutilliivigisinnaajumallugu taamaaliornikkullu nungusaataanngitsumik piniarnermik aallaaniartarnermillu qulakkeeriniarnermi, nalinginnaasumik isersinnaaneq taanna pingaartuusoq Naalakkersuisut isumaqarput. Nakkutilliinermut tunngasumik maannakkut pissutsit allangortinnginnissaat peqatigisaannillu suliffeqarfinnik inuillu illuinik nakkutilliinissamut periarfissanik sukaterinissaq Naalakkersuisut kissaatigaat. Taamaakkaluartoq matumunnga peqatigitillugu inuit illuinut isersinnaanermi, pasitsaassaqarneq pillugu piumasaqaat atuuttussanngortinneqarpoq.*

GE § 11, imm. 1-imut innersuussilluni allappoq, piumasaqaatini tunngavilersuutinilluunniit takuneqarsinnaanngitsoq suliffeqarfiup perorsaanikkut sulineranut atasumik qanoq ilinerani immikkut akuersisoqarnissaanik nalunaartoqartassanersoq, matumani piniartut allat atugaasa equmaffigineqarnissaat ilanngullugu. GE aamma isumaqarpoq § 11, imm. 2-mi pillaanissamut tunngavissaq allanneqarsimannngitsoq.

*Immikkut akuersisoqarnissaanut piumasaqaatit pillugit Naalakkersuisut ilisimatitsissutigisinnaavaat, suliffeqarfuit pineqartut perorsaanikkut sulinerminni periutsit ilaatut piniarneq, aallaaniarneq aalisarnerluunniit atorsinnaagaat. Taamatuttaaq atuarfinnut, ilinniartitsinerup ilaatut pingaartutut piniarneq aallaaniarnerlu ilaasimatillugit, inuussutissarsiutigalugu piniarnermut aamma sunngiffimi piniarnermut allagartaq tunniunneqarsinnaavoq. Piniartut aallaaniarrartullu allat mianerineqarnissaanut tunngatillugu oqaatigineqarsinnaavoq, inuussutissarsiutigalugu aamma sunngiffimi aallaaniarnissamut allagartaq suliffeqarfimmut namminermut imaluunniit atuarfimmut tunniunneqartarmat, suliffeqarfimmi inummut aalajangersimasumuunngitsoq. Tamanna ima isumaqarpoq, suliffeqarfimmi inuit pineqartut, suliffeqarfik qimakkuniku, inuussutissarsiutigalugu aamma sunngiffimi piniarnermut allagartap atornissaanut ilaajunnaassasut. Tamanna sulisunut atuisunullu atuuppoq. Taamaattumik atuisinnaaneq killeqartussaavoq aamma piumasaqaatinik allanik allattuisoqartariaqanngitsoq Naalakkersuisut isumaqarput.*

*Pillaanissamut tunngavissaq eqqarsaatigalugu Naalakkersuisut ilisimatitsissutigissavaat, kinaassusersiunnginnissaq suliffeqarfiup akisussaaffigigaa, tak. siunnersuummi § 11, imm. 2,*

*aamma suliffeqarfik pillarneqarsinnaavoq siunnersuummi § 38, imm. 3 naapertorlugu, matuma kingorna inatsisitigut akisussaatinneqartut pillarneqarsinnaallutik.*

Sulisitsisut allapput, takornariartitsisarnerup mianerinissaa aallaavigalugu akiliisitsilluni aallaaniartitsinermik aaqqissuussisartutut akuerineqartarnissaq aamma ilisimasortanik akuersisarneq pillugit siunnersuummi siunertaq takusinnaagitsik, kisianni suliffeqarfifiup akuersissutinik pigisaasa inuussutissarsiuq tatineqareersoq aporfilussanngikkaat isumaqarlutik.

*Siunnersuummi § 16, imm. 6-imi aalajangersagaq maleruagassanik ersarinnerusunik saqqummiussinissamut tunngavissamik Naalakkersuisunut tunniussivoq, akiliisitsilluni aallaaniarneq aalisarnerlu pillugit, akiliisitsilluni aallaaniartitsisartutut akuerisatut ingerlanissap anguneqarnera annaaaneqarneralu pillugit nalunaarutit nalinginnaasut aqquitalugit, matumani akiliisitsilluni aallaaniarnermi ilisimasortat atorneqartarnerat ilanggullugu. Tassunga atatillugu piumasaqaatit § 2, imm. 1-imi, nr. 1-6-imilu taaneqartut ilangunneqassapput, matumani pingartumik suliffissaqartitsiniarnikkut mianerisassat aamma najukkami atuuttunngortinnissami mianerisassat ilanggullugit. Piumasaqaatit taakku pisariaqartut Naalakkersuisut isumaqarput, taamaammat piumasaqaatit allat pilersinnissaat pisariaqanngilaq.*

### **Kalaallit Nunaanni Politiit**

Kalaallit Nunaanni Politiit § 33-imut tunngatillugu oqaatigaat, suliassaqarfinnut tiguneqarsimasunut atatillugu Kalaallit Nunaanni Politiit nakkutilliinermut oqartussaanngitsut.

*§ 33-mittoq "politiit aamma Issittumi Sakkutuut" Naalakkersuisunit peerneqarpoq.*

Kalaallit Nunaanni Politiit oqaatigaat, § 39, imm. 3-p imarisaa, pinerluttulerinermut inatsisisip § 164, imm. 3-ata kiisalu pisinnaatitaanermik annaasaqarneq pillugu § 165, imm. 3-ata imarisasa assigigaat. Taarsiullugu arsaagaaneq pissarseqqinnerlu pinerluttulerinermut inatsimmi maleruagassat malillugit pisartussatut innersuunneqarsinnaalernissaa eqqarsaatersuutigineqarsinnaavoq. Aammattaaq oqaatigineqarpoq, Kalaallit Nunaanni eqqartuussivinni eqqartuussisoqarneq ajormat taamaallaalli aalajangiisoqartarlunilu pineqaatissiisoqartarmat.

*Naalakkersuisut § 39, imm. 3-mi oqaatsit "Aalajangiineq inerniliisoqarneratigut aalajangerneqassaaq" peerpaat, kisiannili § 39, imm. 3-p aalajangiussimanissa kissaatigalugu, tassa taanna suliassaqarfimmii inatsisitigut malittarisassat ajornannginnerusumik pissarsiarineqarnissaannik periarfissiimmat.*

Kalaallit Nunaanni Politiit kaammattuutigaat, siunnersuummi § 40 erseqqissarneqassasoq, aalajangersagaq kapitali 37-ip imarisata assigigaa. Taama iliortoqarsinnaavoq danmarkimi

aalisarneq pillugu inatsimmi § 131, imm. 2-mi aamma §135-imi (lbk. nr. 261, 21. marts 2019-imeersoq) aalajangersakkanut naapertuuttumik aalajangersakkamut oqaasertaaliinikkut.

Taamatuttaaq oqaatigineqarpoq, atugassamik arsaarsineq/arsaagaaneq pillugu nakkutilliinermik oqartussaasup aalajangiineranut pisariaqartinneqarneratut akerliusqassappat, matumani tunngavissaainneqartoq, suliapi allagaatit unnerluussisussaatitaasumut, eqqartuussivimmut apeqqummik apuussisuusussamut, kinguarsaanertaqanngitsumik nassiunneqassasut, suliapi nalilorsornissaanut pisariaqartinneqartunik paassisutissanik ilaqtillugit. Tamatuma kingorna Namminersorlutik Oqartussanit suliapi tiguneqarnerata kingorna, unnerluussisuititaasup suliaq akunnerit 3x24-t qaanngiuttinnagit, eqqartuussisarnermi inatsimmi § 422, imm. 3-mi piffissaliussaq malillugu, eqqartuussivimmut saqqummiutissavaa.

*Naalakkersuisut § 40, imm. 1-imi, imm. 1-ip kingornatigut ilanguppaat: "Arsaarinnittarneq pillugu eqqartuussisarnermut inatsimmi kapitali 37 naapertorlugu, nakkutilliinermik oqartussaasup tigummigallagaanermik aallartitsinera pissaaq". Arsaarinninnermut atatillugu arsaarinninnermut piumasaqaatit kiisalu kinaassusersiunnginnissamik piumasaqaammut nassuaatit Naalakkersuisut aammattaaq ilanguppaat.*

### **Kalaallit Nunaanni Aalisartut Piniartullu Kattuffiat (KNAPK)**

Piniakkat ingerlatsivigneranni atuisut ilisimasaannik annertunerusumik atuisoqarnissa KNAPK-mit tapersorsorneqarpoq, tak. siunnersuummi § 2, imm. 2, taamatuttaarlu akisussaaffinnik kommuninut tunniussinermi atuisut ilisimasaasa annertunerusumik ilaatinneqartarnissaat tapersorsorlugu, tak. § 4.

*Piniartut atuisullu ilisimasaasa ilaatinneqarnissaat pillugu siunnersuummi § 2, imm. 2, akisussaaffinnik kommunimut tunniussinermi aamma atorneqartussaasoq Naalakkersuisut ilisimatitsissutigisinnaavaat.*

KNAPK isumaqarpoq, § 7-imi piumasaqaammik, inuit pisariaqartunik piniutinik peqartussaanerannut tunngasumik peqartoqartariaqartoq, matumani sillimaniarnermi atortut assersuutigalugu VHF-it ilanggullugit. Aammattaaq piumasaqaatigineqartariaqarpoq atortut il.il. sillimmaserneqarsimassasut.

*Pisariaqartunik piniutinik peqarnissaq pillugu piumasaqaammik saneqquṭassaanngitsumik atortuulersitsinissaq pisariaqanngitsaq Naalakkersuisut isumaqarput, tassa piniartunngorlaat tamanna eqquutsikkuminaatsissinnaammassuk. Naalakkersuisut isumaqarput pissarsisinnaanissaq naammassasoq - tassa imaappoq suliassaqarfimmi pineqartumi pisariaqatunik atortunik taakku atugassaqartut. Tamanna aallaavigalugu, § 7-imi oqaaseqatigiit allangortinneqartariaqanngitsut Naalakkersuisut isumaqarput. Kommunini arlaqartuni piniartut piniutinik sunik peqarnerat pillugu allattuineq*

*ingerlanneqartalereerpoq, taamaalilluni najukkaminni namminneerlutik pisariaqartunik piniutinut eqqumanialereerlutik.*

§ 10-ip atornerlunneqarsinnaanera KNAPK-p ernumassutigaa siunnersuutigaalu Naalakkersuisoq avaqqullugu naammagittaalliorfimmik pilersitsisoqassasoq, naalakkersuisoqarfimmi atorfilinnit, kattuffinnit allaniillu inuttaqartumik.

*Inuussutissarsiutigalugu piniarnermut allagartamik qinnuteqarnermut atatillugu atornerluineq pisassagaluarpat suliniuteqartoqartariaqartoq Naalakkersuisut nassuerutigissavaat. Taamaannerani maannakkut periuseq atorneqartoq, aappaatigut periutsimik eqaannerusumik aappaatigullu atornerluinerup pinngitsoortinnissaanik qulakkeerinissamut naammattoq Naalakkersuisut isumaqarput. Tamanna aallaavigalugu naammagittaalliorfimmik pilersitsisoqassanngitsoq Naalakkersuisut isumaqarput.*

Inuk uumasumik pisaqartoq tassungalu akuersissummik peqartoq, aamma uumasumik taassumalu nalinginik piginnittuusoq pillugu siunnersuutip § 12-iani ersarissumik allaqqasoqartariaqartoq KNAPK isumaqarpoq.

*Naalakkersuisut oqaatigissavaat, §-ini 12-mi aamma 13-imikku akuersissutit qanoq tunniunneqartassanersut aalajangersarneqarmat. Manna tikillugu ileqqusumik atorneqarsimasunik allannguisoqassappat tamanna tulluartumik saqqummiusinikkut pisariaqarpoq, immaqalu uumasunut nalunaarutini tulluarnerpaaffigisaanni atuuttunngortinneqarsinnaallutik. Taamaakkaluartoq Inatsisartut inatsisaat naapertorlugu akuersissummik piginnittoq nammineq aalajangiisussaavoq pisamut peqataasoqassanersoq.*

Siunnersummi § 15-imut innersuussilluni KNAPK-mit kissaatigineqarpoq kommunit allaffiisa ammasarfii piniartut piffissaannut naapertuuttariaqartut, ilaatigut piffissamut tunngatillugu ilaatigullu nalliuuttunut tunngatillugu aamma sumiiffinni tamani akuersissummik ilassutaasumik pissarsisinnaasoqartariaqartoq.

*Piniarneq aallaaniarnerlu pillugit inatsit aqqutigalugu kommunit allaffiisa ammasarfii pillugit Naalakkersuisut siunnersuuteqarsinnaanngillat isumaqarpullu piniariarnissaq aallaaniarnissarlu sioqqutigaatsiarlugu akuersissummik qinnuteqarnikkut piniarnissamut piareersartoqarsinnaasoq. Suliassaqarfimmi tamatumani allannguisoqarnissaanut taamaattumik tunngavissaqanngitsoq Naalakkersuisut isumaqarput.*

KNAPK isumaqarpoq § 20, imm. 5 suugaluartunik atorneqarsinnaasunik atuisarnermi nalinginnaasumik periusiusartunut akerliusooq. Assersuutigalugu timi toqungasoq imaani nillertumi asiunavianngilaq qimminullu nerukkaatissatut atorneqarsinnaalluni.

*§ 20, imm. 5 Naalakkersuisut peerpaat.*

§ 22-imut innersuussilluni KNAPK isumaqarpoq pingaartumik piniakkanut anginerusunut ullut pingasut sivikippallaarsinnaasut. Atuinerup pitsaanerunissaa eqqarsaatigalugu sapaatip akunnerata ataatsip qanngiunnerata kingorna tunisisinnaaneq periarfissaqartariaqarluarpoq, neqip nillataartinneqarsinnaaneranut periarfissaqartoqarpat (qaffassisnerpaamik +5°).

*Naalakkersuisut aallarniutigalugu ilisimatitsissutigissavaat siunnersuummi § 22, imm. 3 eqqaaneqarmat, uumasut tunisassiallu suunerat apeqqutaatillugit misissisoqarsinnaavoq, kisiannili piffissami piniarfiusussatut akuerisaasumi kalaalimineerniarfimmi tuniniaaneq taamaallaat akuerisaasoq. Piffissami piniarfiusumi tassani piniartumut pineqartumut atuuppoq, inuk taanna inuussutissarsiuutigalugu imaluunniit sunngiffimmi piniartuussasoq, tassa inuussutissarsiuutigalugu piniarnermut aamma sunngiffimmi piniarnermut piffissaliussat assigiinngissinnaammata. Tamatuma saniatigut piffissaliussap qaanngiunnerata kingorna ulluni pingasuni tuniniaasinnaaneq akuerisaavoq. Assersuutigalugu piffissaq piniarfiusoq ulloq 31. oktober killeqarpat ulloq 3. november tikillugu tuniniaasoqarsinnaavoq.*  
*Inuussutissanik (tunisassianik suliarineqarsimasunik) tuniniaaneq pineqartillugu Naalakkersuisut inuussutissalerinermut oqartussaannit malittarisassat qaqgukkulluunniit atuuttut kalaalimineerniarfimmit eqqortinnejassapput, tassa imaappoq inuussutissalerineq pillugu nalunaarut. Naalakkersuisut inuussutissat isumannaatsuunissaat eqqarsaatigalugu isumaqarput siunnersuummi ullunik pingasunik killiliineq tulluartuusoq. Soorlu siunnersuummi § 22, imm. 3-mi atuarneqarsinnaasoq, uumasut tunisassiallu aalajangersimasut apeqqutaatillugit minissisoqarsinnaavoq, assersuutigalugu tassaasinnaalutik arferit angisuut neqaannik, mattaannik orsunillu tuniniaaneq.*

KNAPK § 24-imut tunngatillugu allappoq, isumaqarlutik aallaasit eqittaannartakkat toqtsigasuarnissaq eqqarsaatigalugu sumiluunniit atorneqarsinnaasariaqartut. Peqatigisaanillu tamanna pissutigalugu amerlasuut aqerluusut atorneqarnissaannut inerteqqusummut KNAPK akerliuvoq aamma ilulit inngigissuunngitsut neqimik aseruisarmata. Ilulit inngigissuunngitsut aamma uumasunik anginerusunik toqtsiniarnermi sunniuteqarpiarneq ajorput, tassami uumasut nutaanngitsunik ikillit takuneqartarput ilulernik inngigissuunngitsunik aallaaneqarsimasut.

*Siunnersuummi allaasit eqittaannartakkat atorneqartarnerisa ajornannginnerulersinnissaanut peqqutissaqanngitsoq Naalakkersuisut isumaqarput. Imassat suuneri eqqarsaatigalugit tamanna nalunaarutit aqqutigalugit maleruagassiorfigineqassaaq. Taamaammat § 24-imi allannguinissamut peqqutissaqanngitsoq Naalakkersuisut isumaqarput.*

## Kommune Kujalleq

Ataatsimut isigalugu Kommune Kujallermit oqaatigineqarpoq, naammaginanngitsuusoq piniarnermut aallaaniarnermullu tunngasuni suliassat suut kommuninut suliassanngortinnissaat pillugu inatsisissatut siunnersuummi nalinginnaasumik nassuaatini

missingersuusiortoqarsimanngimmat, piviusunngortinneqartut kommuninut aningaasartuutaunerunissaat eqqaassanngikkaanni. Pingaartumik aallaaniarsinnaanermut misilitsittarnermik kommunit aqutsinissamut periarfissaqarnerat Kommune Kujallermit suliassatut aningaasartuuteqarfiusinnaasutut isigineqarluni.

*Naalakkersuisut tassunga tunngatillugu oqaatigissavaat aallaaniarsinnaanermut misilitsittarnerup pilersinnissaanut § 17-imi tunngavik atorneqassasoq aalajangerneqarpat tamanna pikkorissarnerit aallaaniarsinnaanermullu misilitsinnerit il.il. pilersinnissaannut ingerlannissaannullu aningaasartuuteqarnermik kinguneqassasoq, tassanilu apeqquaassalluni aaqqissuussineq qanoq ittoq toqqarumaarneqarnersoq. Aallaaniarsinnaanermut misilitsinnermut akiliuteqartitsisarnissamut Naalakkersuisut aammattaaq periarfissinneqassapput, tamakkiisuusumik ilaannakuusumilluunniit aallaaniarniarsinnaanermut misilitsittarnerup pilersinneqartunut ingerlanneranullu pisortat aningaasartuutaannut matussusiisinnaasut. Iluserli aalajangersimasoq pigineqanngimmat, kinguneqaatissat qanoq annertutiginissaat oqaatigineqarsinnaanngilaq.*

Kommune Kujalliup kaammattutigaa § 3, nr. 2 iluarsineqassasoq, tassa assersuutigalugu pinerluttulerinermi suliani illersuisut eqqunngitsuliorfigineqartunut illersuisussatut taamaallaat killeqartinneqarmata.

*Siulittaasup Naalakkersuisoqarfiata qinnuiginninnerata kingorna § 3, nr. 2-mik allannguinissaq Naalakkersuisut aalajangiuppaat, inuiaqatigiinnik sullissineq pillugu nalunaarummut innersuussininngortillugu.*

Kommune Kujalleq isumaqarpoq kommunini ingerlatsivinnut suliassiisoqarnissaanut tunngavissiisut §-it 6 aamma 25 imminnut qaleriinnersut erseqqinngitsoq, soorlu aamma inatsisisstat siunnersummi allatigut ilannguneqarsimasunut suliassiinissamut piginnaatitsinerit aalajangersimasut saniatigut aalajangersakkat taakku namminerisaminnik imaqarneri erseqqissumik takuneqarsinnaanngitsoq.

*Naalakkersuisut ataqatigiissumik aaqqissuussineq atorsimavaat, tassani ilaatigut § 4-mi oqartussaanermut aalajangersakkanik pingaarnertut nassuaasiinikkut, ilaatigullu kapitalini paragraffinilu pingaaruteqartuni suliassiinermut tunngavissiinikkut. Taamaalilluni akuersissutinut tunngasoq § 6, imm. 2 piniariarsinnaanermut aallaaniarsinnaanermullu piumasagaatit pillugit kapitali inissinneqarsimavoq, akerlianilli § 25-mi suliassiinermut tunngavissaq eqqissisimatitsinermet, teknikkikkut piujuartitsinissamut periutsinut, atuinermut il.il. tunngasuulluni. Ataqatigiissumik aaqqissuussineq taanna siunissami pisariaqartinneqalersinnaasunut matussusiisinnaasoq Naalakkersuisut isumaqarfigaat.*

Kommune Kujalliup § 7, nr. 5 aamma § 8-imut innersuussilluni kaammattutigaa tamakkiisumik isertitat pillugit taaguutip kingunerisaanik procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni taaguummik "maannakkut

isertitat"-nik saneqqussinerunersoq inatsisisstatut siunnersummi nassuaatinilu qulaajarneqassasoq.

*Oqariartaaseq "tamakkiisumik isertitat" atorneqartoq ersarissooreersoq Naalakkersuisut isumaqarput, taamaammat tassunga atatillugu allannguisoqanngilaq.*

Kommune Kujalliuup uparuarpaa § 10, nr. 1-im "§ 9, imm. 1"-imut innersuussisoqartoq. § 9 maannakkut iluseqarnermigut amerlanerusunik immikkoortoqanngilaq.

*Naalakkersuisut "imm. 1" peerpaat.*

Kommune Kujalliuup kaammattuitigaa piniarneq aallaaniarnerlu akuersissuteqarnissamik allagartaqarnissamillu kimut piumasaqarsinnaanera erseqqissarneqassasoq, tak. § 12, imm. 1.

*Piniarnermut allagartanik, akuersissutinik aamma pisaqarnissamut akuersissunik saqqummiussisarneq. pissarsineq aamma annaasaqarneq pillugit maleruagassanik Naalakkersuisut aalajangersaasartuusut siunnersuutip § 15-ini atuarneqarsinnaasoq Naalakkersuisut oqaatigaat. Tamatuma saniatigut §-ini 12 - 14-imu allaaserineqarluni akuersissutinut tunngasuni suleriaaseq nassuiarneqarpoq. Annertunerusumik erseqqissaasoqarnissaanut pissutissaqanngitsoq Naalakkersuisut isumaqarput.*

Kommunip kaammattuitigaa, akiliisitsilluni piniarnermik ingerlatsinerup namminersortunut tunniunneqarnera qanoq annertutigisumik pisassanersoq inatsimmi erseqqissarneqartariaqartoq, tak siunnersummi § 16, imm. 7, matumani eqqartorneqarsinnaavoq.

*Nalinginnaasumik nassuaatit naapertorlugit § 16, imm. 4 malillugu maleruagassat saqqummiunneqartarnerannik aalajangiinissamut pisinnaatitaaffimmik ingerlatsinermillu kommuninut tunniussisinnaanermut Naalakkersuisut pisinnaatinneqarput, tak § 16, imm. 7,-ip ilutigisaanik akiliisitsilluni aallaaniarnermik ingerlatsinermik isumaginnittuusussatut suliffeqarfiit aamma takornariartisinermut peqatigiiffiit pisinnaatinneqarnissaannut tunngavissiivoq. Tassa imaappoq allaffissorneq imaluunniit ingerlatsinermik suliaqarneq, kisianni oqartussatut pisinnaatitaaneq ilanngunnagu. Erseqqissaaneq taanna naammattutut isigineqarpoq.*

Kommune Kujalleq ilisimatitsivoq § 19, imm. 2-mut oqaaseqartoqanngitsoq.

*§ 19, imm. 2-mut nassuaatinut Naalakkersuisut ilanngussippu, soorlu aamma oqaatigineqartoq § 38, imm. 1-im naajoqqutassanik unioqqutitsinermut pillaanissamut tunngavissaq ikkunneqarsimasoq § 19 naapertorlugu aalajangersarneqarsimasoq.*

Kommune Kujalleq § 24-imut innersuussilluni kaammattuivoq, akiliitsitsilluni aallaaniarnermut atatillugu assartuutinik inerteqqutaasunik atuinissamut periarfissiisoqarsinnaanersoq eqqarsaatigineqassasoq.

*Tammaarsimaarsimaarfiliarnermut tassanngaanniillu uternermut angallassisutit motorillit suli atorneqarsinnaapput, kisianni piniariarfiusumiit uumasut pisat assartoqqinnerannut taama ittoq atorneqaqqusaanngilaq. Pineqartoq erseqqissarniarlugu Naalakkersuisut aalajangerput siunnersummi § 24-mi ilanngunneqassasoq, uumasut minnerpaamik 500 meterinik ungassisuseqarfigineqassasut.*

Kommunip kaammattuutigaa innersuussummik ilaqtillugu § 24, imm. 1-imut, § 26 aamma § 30, imm. 4-imut dronit ilisimatusarnermut atorneqarnissaat akuerisaasoq pillugu inatsimmi oqaaseqatigiinni ersarinnerusariaqartoq. Tamatuma saniatigut, paasissutissat aamma ilinniartitsissutissat pissarsiariniarnerinut atasumik allatulluunniit iliortuni paasissutissiinernut uumasunik filmimiornermut drone-t atorneqarsinnaasariaqartut.

*§ 26-imut nassuaatini atuarneqarsinnaavoq, akuersissut aamma ilisimatuussutsikkut suliniutini drone-t atorneqarsinnaanerat ilaasoq. Tamanna pisariaqartoq Naalakkersuisut isumaqarput aamma sapinngisamik annertunerpaamik drone-t atorneqartarnerat killeqassasoq Naalakkersuisut isumaqarput, taamaamat immikkut ittumik akuersissuteqartarnermi periarfissamik allamik atortuulersitsisoqartariaqanngilaq.*

§ 38, imm. 1, nr. 1-imi ilaatigut "§ 9, imm. 2 aamma 3"-mut innersuussisoqarpoq. Taakku inatsisissatut siunnersummi aalajangersakkani allaqqanngillat.

*Siunnersummi § 38, imm. 1, nr. 1-imi "§ 9, imm. 2 aamma 3" peerneqarput.*

§ 47, imm. 3-mut innersuussilluni kommunimit kaammattuutigineqarpoq, inatsit nutaaq akuerineqartinnagu allaffissornikkut najoqqutassat suut attatiinnarneqaannarnissaat eqqarsaatigalugu aalajangersimasumik isummernissaq siunertaralugu, allaffissornikkut najoqqutassat taakku peqqissaarluinnartumik misissorneqassasut.

*Naalakkersuisut oqaatigissavaat, inatsimmi atuuttumi tunngavissaatitaasoq atorlugu malittarisassat saqqummiunneqarsimasut tamakkerlugit allanngortinnissaat periarfissaqanngitsoq. Tamanna aallaavigalugu oqaasertaliussaq taanna ikkunneqarpoq, tamannalu immikkoortoq 5.5.2.2-mi inatsisinik nalilersuinermut najoqqutassianut naapertuuppoq.*

## **Pituffimmi Innuttaasut Siunnersuisoqatigiivi**

Pituffimmi Innuttaasut Siunnersuisoqatigiivi allassimapput sunngiffimmi aallaaniarnermi allagartartaarnissaq pillugu qinnuteqaammut atatillugu aalajangersimasumik najugaqarnissaq

pillugu piumasaqaammik naammassinnissinnaanatik, naak qaammatit arfinillit sinnerlugit Kalaallit Nunaanni najugaqaraluarlutik, soorlu aamma Kalaallit Nunaanni akileraartartuullutik. Pituffimmi taakku allakanut nakkartitsivimmi najugaqartutut nalunaarsugaapput, kisiannili Danmarkimi inuit allattorsimaffiini najugaqarfistik attatiinnartarlugit. Taamaattumik Kalaallit Nunaanni inuit allattorsimaffianni nalunaarsugaanissaq pillugu piumasaqaammit immikkut ittumik akuersinissamut periarfissaqarnerup equnneqarnissaa kissaatigaat, taamaalilluni sunngiffimmi aallaaniarnissamut allagartamik tunineqarsinnaalerniassagamik.

*Aallarniutigalugu oqaatigineqassaaq maannakkut inatsitigut inissisimanerup allanngortinneqarnissaa siunnersuummi pineqanngimmat, tassa maannakkut inatsisini aamma piumasaqaataammat Kalaallit Nunaanni aalajangersimasumik najugaqarnissaq. Siunnersuut malillugu pisuni immikkullarilluinnartuni, inuit qaammatini arfinilinni sivisunerusumiluunniit Kalaallit Nunaannut suliartortinneqarsimappata Kalaallit Nunaannullu akileraartussaaitaasimappata kisianni Kalaallit Nunaanni najugaqarallartutut nalunaarsimallutik, immikkut ittumik akuersissut tunniunneqarsinnaavoq. Pissutsit immikkullarissut taakku assigiissutaat tassaavoq, inuinnut qimminullu nerisassamaatissanik ilasinissaq pisariaqartartoq pineqarmat. Matumani assersuutigineqarsinnaavoq, Seriuspatrulen-imut sakkutuut sulisunik suliartortitsinerat, imminerminnut qimminullu neqinik nutaanik pilersoqqinnissamut periarfissaqartussat qaammatinilu arlaqartuni qimussimik alapernaarsuisussat.*

*Najuqarnissamik piumasaqaat eqqarsaatigalugu immikkut ittumik akuersissuteqartarnissamut perfissamik nalinginnaasumik atortuulersitsisoqartariaqanngitsoq Naalakkersuisut isumaqarput, tamatumani nungusaataanngitsumik piniagassanik atuisinnaanermik piniartunillu aallaaniartartunillu allanik mianerinninnissaq eqqarsaatigalugit, tamanna pissusissamisoortumik piniagassanik atuinerussanngimmat. Tassunga atatillugu oqaatigineqassaaq, nunamit suminngaannerneq pissutigalugu kinaassusersiorqartussanngilaq, taamaattumik Danmarkimi innuttaassuseqartunut taamaallaat immikkut ittumik akuersinissamut periarfissamik atortussaalersitsisoqarsinnaanngilaq.*

## Danmark-imi Rigsadvokaten

Inatsisinik atuutsitsinermut ministeriaqarfiup siunnersuut tusarniutigineqartoq tigusimavaa, tassungalu atatillugu Rigsadvokati oqaaseqaqqusimavaa, taakkulu toqqaannartumik Aalisarnermut, Piniarnermut Nunalerinermullu Naalakkersuisoqarfimmut nassiunneqarput.

Rigsadvokati isumaqarpoq, pisimi aalajangersimasumi politiit nakkutilliinermut oqartussatut siunnersuutip § 5, imm. 2 naapertorlugu toqqarneranni, politiit sulinerat pillugu inatsisitigut tunngavik pillugu nalornineq pilersinnaasoq. Tamanna tunuliaqtalaralugu

siunnersuutigineqarpoq nassuaat imatut oqaasertalerneqassasoq: "politiit pisariaqartillugu nakkutilliinerup ingerlanneranut ikuuussinnaapput".

*Taanna naapertorlugu § 5, imm. 2-mut nassuaatit Naalakkersuisut allanngortippaat.*

Imminut illersornissamut innersuussineq siunnersuummi § 31-iittoq peerneqartariaqaraluartoq Rigsadvokati isumaqarpoq, tassa uumasoq pissusissamisuunngitsumik saassussisinnaanngitsoq nalinginnaasumik isumaqarfingeqartarmat.

*§ 31-imut nassuaatiniittoq oqaaseq pissusissamisuunngitsumik Naalakkersuisut ungaluukkanut inissippat, ilanngullugulu: "uumasoq pissusissamisuunngitsumik saassussisinnaanngitsoq isumaqarfingeqartarmat". Taamaakkaluartoq Naalakkersuisut oqaasertaliussat allat aalajangiussimavaat, imminullu illersorneq patsisigalugu toqtsisoqartarmat imaluunniit imminut illersornissamut pisinnaatitaaneq pigajuttarmat Kalaallit Nunaannilu oqariartaaseq atugaalluarpoq. Pinerluttulerinermut inatsimmi malittarisassanut innersuussineq taamatut toqtsinerup qanoq ilinerani pisinnaaneranik pisariaqartumik paasinninnissamut tapertaammat.*

Siunnersuummi § 40 naapertorlugu angallammik nunakkoorummilluunniit arsaarinninneq eqqarsaatigalugu Rigsadvokati isumaqarpoq, eqqartuussisarnermut inatsisip kapitali 37-ani imarineqartut assigalugit, inatsiseqarnikkut qularnaveerutaasut peqqissaartumik malillugit arsaarinninneq taama ittoq pisassasoq. Tamanna tunngavigalugu inatsisip oqaasertaani takuneqarsinnaasariaqarpoq arsaarinninneq Kalaallit Nunaanni eqqartuussisarnermut inatsimmi kapitali 37-mi malittarisassat malillugit pisassasoq. Rigsadvokati aamma isumaqarpoq § 41, imm. 3, eqqortuussappat § 40, imm. 3-iusreriaqaraluartoq matumalu kingorna peerneqarsinnaassasoq.

*Naalakkersuisut § 40, imm. 1-imi, imm. 1-ip kingornatigut ilannguppaat: "Arsaarinnittarneq pillugu eqqartuussisarnermut inatsimmi kapitali 37 naapertorlugu, nakkutilliinermik oqartussaasup tigummigallagaanermik aallartitsinera pissaaq". Naalakkersuisut aamma § 41, imm. 3 nuuppaat matuma kingorna § 40, imm. 3-ingorpoq.*

Rigsadvokatip aamma oqaatigaa, siunnersuummi § 42-mi tunngavissaq atorneqaannarsinnaasoq peqatigisaanilli nassuaatini sukumiinerusumik nassuiarneqassaaq, piumasaqaatit suut naammassineqassanersut allaffissornikkut akiligassiinerit atorneqalersinnagit. Taama pisoqassagaluarpat, § 42-mi tunngavissami toqqaannartumik allaqqasariaqarpoq, unnerluussutip imarisaanut piumasaqaatit aamma unnersuunneqartoq oqaaseqarnissamut pisussaatitaanngitsoq pillugit eqqartuussisarnermi inatsimi maleruagassat, taamatuttaaq allaffissornikkut akiliisitsinermi atorneqartut.

*§ 42-mi nassuaatinut Naalakkersuisut ilannguppaat, unioqqutitsinerit assigiaartut, paasiuminartut aamma nalornissutaasinnaasunik uppernarsaatinik amigaateqanngitsut*

*matumani pineqartut. Tamatuma saniatigut suliat suut tulluartuuusinnaasut kiisalu immersuifit pillugit allassimaffimmik Naalakkersuisut suliaqarniarput, ilaatigut unnerluussummut piumasaqaatinik eqquutsitsisuusunik ilaatigullu inatsiseqarnikkut qularnaveeqquaasut eqqortinneqarnerinik qulakeerisuusut. Taamatuttaaq oqaatigineqarpoq, siunnersuummi § 43-mi atuarneqarsinnaasoq, suliani allaffissornikkut suliarineqartuni Kalaallit Nunaanni eqqartuussisarnermut inatsimmi § 347, imm. 1 atuuttusoq, taamaaqataanik atorneqassasoq.*

### **Trophy Hunting Greenland**

Trophy Hunting Greenland kissaateqarpoq, nunamit suminngaanneerneq apeqqutaatinnagu nalinginnaasumik ilisimasortarisartakkaminnik atuinnginnissaq pillugu piumasaqaateqartoqannginnissaanut qularnaveeqqusisoqassasoq, tassa najukkameersunik ilisimasortanik atorfinitstsiniarneq ajornarluinnangajattusoq paasineqarsimammatt. Piukkunnaateqartunik ilisimasortassanik nassaartoqarsinnaanngippat tamanna suliffeqarfimmut aningaasaqarnikkut akisoorujussuusinnaavoq.

*§ 2, imm. 1, nr. 1-6-im i taaneqartut piumasaqaatit ilanngunneqarnissaat pingaarutilerujussuartut Naalakkersuisut isumaqarfigaat, matumani siunnersuut malillugu maleruagassat suliarineqalerpata, pingartumik suliffissaqartitsiniarnikkut mianerisassat aamma najukkami atuuttunngortitsinissat ilanngullugit. Tamanna tunuliaqutaralugu § 16, imm. 6-im oqaasertaliussaq allangortinneqassanngilaq. Ikaarsariarnermi aaqqissuussinerit nalunaarutinngorlugit saqqumiunneqarsinnaapput, taamaalilluni ilinniarfissatut periarfissaareersunut ilanngullugu ilisimasortanik ilinniartitsinissaq eqqarsaatigalugu piffissamik pisariaqartinneqartumik tunniussisoqarsinnaalluni.*

### **Qeqqata Kommunia**

Qeqqata Kommuni isuamqarpoq § 24, imm. 1-im oqaasertaliussaq, taanna naapertorlugu nunakkoorutit motoorillit matumani qamuteralaat ATV-llu ilanngullugit, piniariarfimmut piniariarfimmiillu assartuutitut atorneqaqqusaannginnerisa kingunerissaga, ukiuunerani Kangerlussuarmi umimmanniartanerup uninnera, tassa nunap immikkoortui tikikkumallugit 100 km angullugit piniartut angalasinnaasarmata.

*Tammaarsimaarfiliarnermut tassanngaanniillu uternermet nunakkoorutit motorillit suli atorneqarsinnaapput, kisianni piniariarfiusumiit uumasut pisat assartoqqinnerannut atorneqaqqusaanatik. Malittarisassaq taanna ullumikkut umimmanniarnermi atuutereeropoq, tak. umimannik illersuineq piniarnerlu pillugu namminersorlutik oqartussat nalunaarutaat nr. 8, 27. juni 2013-imeerumi § 14, imm. 2, taanna malillugu assartuutit taamaallaat piniarfimmut piniarfimmiillu assartuinermet atorneqaqqusaapput nunamilu assartuutinik ingerlaarnermet atatillugu umimmannut uumasunut minnerpaamik 500 meterinik ungasissusissaq malinneqassaaq.*

*Apeqquut erseqqissarniarlugu Naalakkersuisut aalajangerput, uumasunit minnerpaamik 500 meterinik ungasitsigisumiiuttoqartassasoq.*

## **Inatsisissatut siunnersuummi aalajangersakkanut ataasiakkaanut oqaaseqaatit**

### *§ 1-imut*

#### **Imm. 1-imut**

Kalaallit Nunaata nunakkut aalisarnikkullu oqartussaaffigisaani inuussutissarsiutigalugu aamma inuussutissarsiutiginagu piniarnermik aallaaniarnermillu ingerlatsinermi Inatsisartut inatsisaat atuuppoq. Matuma kingorna Kalaallit Nunaanni piniarnernut aallaaniarnernullu suugaluartunut tamanut, sunngiffimmi piniarneq aallaaniarnerlu imaluunniit ilisimatusarneq, misileraaneq aamma misissuineq ilinniarnerlu kiisalu iluanaarniutigalugu piniarneq aallaaniarnerlu pineqaraluarpataluunniit, ilanngunneqarsimasunut Inatsisartut inatsisaat atuuppoq.

Inatsisartut inatsisaata oqaasertalerneqarneranut tunngatillugu Kalaallit Nunaata nunamut aalisarnermullu oqartussaaffia tassaavoq, Kalaallit Nunaata aningaasaqarnikkut oqartussaaffigisaa pillugu nalunaarummi kiisalu Kalaallit Nunaata imartap oqartussaaffigisaata killinga pillugu peqqussummi aalajangersarneqartoq naapertorlugit sumiiffik. Kalaallit Nunaata aalisarnikkut oqartussaaffiata annertussusia matuma kingorna Kalaallit Nunaata aningaasaqarnikkut oqartussaaffia pillugu nalunaarut nr. 1020, 20. oktobari 2001-imeersoq naapertorlugu aalajangersarneqarpoq. Imartap killilerneranik suliassaq suli tiguneqarnikuunngilaq, taamaalillunilu Danmarkimi inatsisit naapertorlugit aalajangersarneqarluni. Kalaallit Nunaata aningaasaqarnikkut oqartussaaffia pillugu inatsit nr. 441, 22. maaji 1996-imeersoq, Kalaallit Nunaannut peqqussut nr. 1005, 15. oktober 2004-meersoq naapertorlugu atuuttunngortinneqartoq naapertorlugu nalunaarut saqqummiunneqarpoq

### *§ 2-mut*

Aalajangersakkami nr. 1-6-imi nassuiarneqartutut, anguniakkanut naapertuuttumik aalajangersakkat ingerlatsivigneqarnissaannut Inatsisartut inatsisaanni aalajangersakkat allat, aalajangersakkap aalajangersaaffigai. Tassa imaappoq, Inatsisartut inatsisaannik aqutsinermi mianerisassat taakku nalilersuinermut ilaasinnaapput.

#### **Imm. 1-imut**

##### **Nr. 1**

Pisuussutit piujuartinnissaat amerliartornerallu, matuman i piniarnerup aallaaniarnerullu pinngortitamut sunniutai ilanngullugit, nungusaataannginnissaat anguniarneqassaaq. Piniakkanik pisaparpallaartarnerup akiorniarnissaa killilersimaarnissaalu, piniarnermut aallaaniarnermullu maleruagassiornermi eqqumaffigineqassasut aalajangersakkap uuma aalajangersarpaa. Tamanna assersuutigalugu uumasorsiuut innersuussinerannik aamma Aalisarneq pillugu Siunnersuisoqatigit, najukkami ilisimasanik atuisullu ilisimasaannik ilanngussinikkut anguniarneqarsinnaavoq.

## Nr. 2

Uumasorsiuut nalinginnaasumik siunnersuinerannut naapertuuttumik pisariitsumik piffissallu piniarfiusut eqqarsaatigalugit pitsaanerpaamik atuineq tassaassaaq, uumasut ataasiakkaat pillugit ingerlatsineq uumasorsiuut siunnersuinerisigut qulakteerneqassasoq taamaalilluni uumasoqatigiit pitsaanerpaamik piaqqioqqissinnaassasut, illorsorneqarsinnaasumik nungusaataanngitsumik atorluaanermut iluaquitaasumik. Assersuutigalugu timmissat mannisarfigineqassanngillat, naammaginartumik piaqqiortoqarnissaanik akornutaasumik. Taamatuttaaq arferit miluumasullu allat piaraat pisareequsaanngillat. Matuma saniatigut uumasut piaqqiorneranni najugaannilu killiffinnut soqutiginaateqartunut naapertuuttumik piffissat eqqissimatisiffiusussat aalajangersaaffigineqassapput.

## Nr. 3

Inuiaqatigiinnut, aalisarnermik inuussutissarsiortunut, tunisassiortunut inuussutissarsiortunullu allanut taakkununnga attuumassuteqartunut aningaasaqarnikkut suliffissaqartitsiniarnikkullu mianerisassat. Tassani eqqarsaatigineqarpoq, soqutigisat assigiinngiiaartorpassuit aamma piniarnermit aallaaniarnermiillu mianerisassat sunnerneqartartut aqunneqartartullu sapinngisamik piniarnermik aallaaniarnermillu maleruagassiornermi isiginiarneqassasut. PIinarneq aallaaniarnerlu Kalaallit Nunaata kulturikkut kingornussaasa ilagilliunnarpaa, innuttaasut amerlanerpaasa perioriartornermi qanilluinnartumik attuumassuseqarfigisaat. Sumiiffiit ilaanni inuussutissarsiutit ikittunnguit taanna ilagaat innuttaasunut suliassaqartitsisinnaasoq ilaqtariinnullu nerisassanik aamma piniariarniarluni aallaaniarniarlunilu atortussanik pissarsiniartarnerannut aallaaviusartoq.

## Nr. 4-mut

Inuussutissarsiornikkut soqutigisaqaqatigiit allat mianerineqartussat tassaapput, assersuutigalugu takornariaqartitsisartut unnuisarfinnik nerisarfinnillu suliffeqarfiutillit, suliffeqarfiit angallassisartut aamma akiliisitsilluni tammajuitsussarsiniarlunilu aallaaniartitsisartut imaluunniit uumasunik takusaqarumasunik angallassisartut. Matumani pisat tigoriaannaat amerlassusiannut tunngatillugu illorsorneqarsinnaasumik nungusaataanngitsumik atorluaaneq atuinerlu pingaarutilerujussupput. Pingaartumik pisassiissutit aamma uumasunik pisassiiffiusartunik, pisarineqarsinnaasunik, pisaqarnissamut akuersissutit aamma pisat amerlassusiisa akornanni oqimaaqatigiittoqarnissaanik pilersitsinissaq aamma uumasut pisassiiffiusartut piaqqiornermikkut illorsorneqartumiinnissaat aalajangersakkap qulakiissavaa. Mianerisassat arlallit tassunga ilanngunneqassapput, ilaatigut inuiaqatigiit aningaasatigut iluanaaruteqarnissamik pisariaqartitsinerat, inuiaqatigiinnut suliffissaqartitsineq aamma piniarneq aallaaniarnerlu kiisalu takornariartitsineq assigisaallu aqqutigalugit inuiaqatigiit imminnut pilersorsinnaanerat.

## Nr. 5

Taamaalilluni piniarnermik aallaaniarnermillu ingerlataqarnermut tunngatillugu innuttaasut sunngiffimminni sammisaqarnissaat siunissami aamma isiginiarneqassaaq. Tamatuma

saniatigut, piniarneq aallaarniarnerlu aqqutigalugit piniartut ataasiakkaat inuussutissarsiornissaminut periarfissaqartussaammat, inuussutissarsiuutit attuumassuteqartut soorlu tunisassiorfiit aamma piniarnerup aallaarniarnerullu ingerlatsivigineranut ilanggullugit naatsorsuutigineqartariaqarput, taamaalilluni piniarneq aallaarniarnerlu maleruagassiorfigineqaleraangat, inuussutissarsiuutit taakku sunniutaat aamma ilanggullugit isiginiarneqarsinnaammata. Aqtsineq taamaalilluni imatut ingerlanneqassaaq, inuttut atukkatigut aningaasaqarnikkullu pissarsiat qulakteerneqarlutik, kisiannili nr. 1 aamma 2-mi piumasqaatit mianeralugit.

#### Nr. 6

Kalaallit Nunaat nunat tamalaat akornanni suleqatigiiffinni arlaqartuni peqataavoq nunanullu allanut imaanut sinerialinnut ilaatigut atlantikup imartaata avannaaniittunut isumaqatigiissuteqarluni, matumani ilaallutik ilaatigut Atlantikup Avannaani Uumasut Miluumasut Imarmiut Pillugit Isumalioqatigiissitaq (NAMMCO), qilalukkut qaqortat qilalukkallu qernertat pillugit ataatsimut isumalioqatigiisitaq (JCNB), Nannut pillugit ataatsimut isumalioqatigiissitaq (JCPB), Naalagaaffiillu sineriallit nanoqarfiusut (PBRs), Nunat tamalaat Arfanniarneq pillugu Ataatsimiitaliarsuat (IWC), Washingtonimi Isumaqatigiissut (CITES) kiisalu EU aamma NP. Tamatuma saniatigut, inuussutissarsiuutip ingerlassinnaaneranut periarfissanik nunat tamalaat suliniaqatigiiffisa suliffeqarfiutaasalu killilersuilinnginnissaat, nungusaataanngitsumik pisuussutinik atuinissamik anguniakkap saniatigut aallussisumik sulissutigineqassasoq piniarnermut politikkimut ilaavoq.

#### Imm. 2-mut

Piniarnermut aallaarniermullu tunngasunik aqtsinermut atatillugu piniartut atuisullu ilisimasaannik ilanggussisarnissaq pingaartinneqassaaq. Aalisarnermi periutsit assigalugit nunami namminermi nunanilu tamalaani illersorneqarsinnaasumik atorluaanissaq pillugu pingaarnertut tunngavissaatitaasut, inuiaqatigiit aningaasaqarnikkut iluanaarutaat aamma inuussutissarsiuutigalugu sunngiffimmilu atuinerup akornanni pissusissamisoortumik aguataarineq mianeralugit tamanna pisinnaavoq.

#### Imm. 3-mut

Aalajangersakkap Naalakkersuisut tunngavissippai, assersuutigalugu Inatsisartut inatsisaannik aqtsinermut atatillugu piniartut atuisullu ilisimasaannik ilanggussisarnissaq pillugu nalunaarummi ersarinnerusunik maleruagassianik aalajangersaasinnaanermik, tak. imm. 2. Assersuutigalugu Piniarneq pillugu Siunnersuisoqatigiit imaluunniit piniartut atuisullu ilisimasaannik katersineq, atuineq ingerlatsinerlu pillugit taanna nalunaarutaasinnaavoq.

#### § 3-mut

#### Imm. 1-imut

#### Nr. 1

Inatsisartut inatsisaanni aqutsinermut oqaasertaliunneqartumi pineqarput, suliassat Namminersorlutik Oqartussat namminneerlutik isumagisassaat aamma suliassat Namminersorlutik Oqartussat kommuninut suliassanngortinnikuusaat. Matumani ilaatigut suliassat piniarnermut allagartanik akuersissutinut, pisassiissutinik agguaanernut aamma akuersissutiniit amerlanerusunik qinnuteqartoqarsimatillugu makitsinermut tunngasut kiisalu pisanik nalunaarutiginninnerit katersinernik assersuutigalugu uumasunit misiligtissat il.il. suliassat taakkuninngalu Pinngortitaleriffimmut nassiunneq isumagineqartarput.

#### Nr. 2

Namminersornerullutik Oqartussat Qinikkatut Pisortanillu Toqqakkatut suliaqarneq pillugu nalunaarutaat nr. 5, 15. marts 1994-imeersoq naapertorlugu toqqakkatut inuaqatigiinni suliassaqartitaaneq oqaasertaliunneqarpoq. Nalunaarutip § 1-iani aalajangersarneqarpoq, toqqakkatut inuaqatigiinni suliassaqartitaaneq tassaasoq, atuuffimmik isumaginninneq imaattutut:

- 1) Inatsisartuni ilaasortaq
- 2) kommunalbestyrelsimi ilaasortaq, nunaqarfinnut aqutsisuni ilaasortaq kiisalu kommunalbestyrelsimi ilaasortat ataatsimiititalian kommunalbestyrelsip aamma nunaqarfinni aqutsisut invertitaani ilaasortat,
- 3) najukkami eqqartuuussisoq,
- 4) eqqartuusseqataasartoq,
- 5) illersuisoq kiisalu
- 6) atuuffit allat, pineqartup inuup inatsisit malillugit isumagissallugit pisussaaffeqarfigisai.

#### Nr. 3

Inuup piniarnermut aallaaniarnermullu peqataasunut ilanikuuneranut oqaasertaliussap kaammattutigaa, inuk taanna aallussisumik iliuuseqassasoq tamanna naalinnerusinnaavoq toqtsinerullunilu, tassa imaappoq inuk pineqartoq aallaat imaluunniit piniutit allat atorlugit uumasumik soriarsinnaajunnaartitsissaq, ikiliissaaq imaluunniit toqtsissaq. Nalinginnaasumik pineqartoq tassaavoq, inuup pineqartup uumasup mattaa amialuunniit puttussivigissavaa, annaannginnissaa toqunnissaaluunniit siunertalarugu. Kisianni pisut aamma imaassinjaapput, assersuutigalugu inuk timmissanik qalut atorlugit piniartoq imaluunniit inuk pullatit imalluunniit qassutit atorlugit uumasumik pisaqartoq. Paarlattuanik inuk taamaallaat angallammik nunakkoorummilluunniit ingerlatsisusuq ilaatinneqassanngilaq.

#### Nr. 4-mut

Inuussutissarsiutigalugu piniarnermut aallaaniarnermullu oqaasertaliunneqartoq tassaavoq, piniarneq aallaaniarnerlu pisanik iluitsunik ilaanilluunniit tunisaqarnissamik siunertaqarluni ingerlanneqartoq. Ilaqtariinnut il.il. nerisassanik imaluunniit peqqumaatissanik imminut pilersornissamut ilaasinnaapput nalinginnaasumik pisarineqartut aamma ilaat. Illuatungaatigut piumasagaatit arlallit, § 7-imi allanneqartut, inuussutissarsiutigalugu piniarnermi aallaaniarnermilu eqquutsinnejartussaapput illuatungaatigullu uumasunik

immikuullarissunik amerlanerusunillu pisassiiffiusinnaasunik pisaqarnissamut pisinnaatitaaffit ilaat annertusisat tunniunneqarlutik.

Nr. 5

Piniarnermut aallaaniarnermullu atortunut oqaasertaliunneqartoq tassaavoq, uumasunik aalajangersimasunik pisaqarnissaq toqtsinissarlu siunertalarugit atortut piniutillu pisariaqartut akuerisaasullu atorneqartussat. Tamakku tassaasinnaapput, aallaat, pisisseq, qalut, qassutit, unaaq, pullatit, uumasup aattornissaanut, pilannissaanut aggornissaanulluunniit atortut kiisalu uumasup taassumaluunniit ilaata annaannginnissaanut, aggornissaanut assartornissaanullu atortut imaluunniit atortut assingusut.

Nr. 6.

Angallatip imaluunniit nunakkoorutip oqaasertaliunneqarnera tassaavoq, sunaluunniit imaatigut, nunakkut silaannakkulluunniit assartuut piniarnermut, aallaaniarnermullu aalisarnermullu atatillugu imaluunniit piniariarfissamukarnermi piniariarfissameereernermilu assartuutit atorneqartoq. Tassa imaappoq, assersuutigalugu umiatsiaaraq 6 meteriusoq takissuseqartorlu taassuminnga naannerusumik, piniarnermut aallaaniarnermullu atugassaavoq imaluunniit angallatit anginerusut assersuutigalugu arfanniarnermut atugassaallutik. Assersuutigalugu aamma tassaapput timmisartut, qulimiguullit, nunakkoorutit assakaasullit, biilit, biilit assartuutit biilit usisaatillit, ATV-it, qamuteralaat aamma qimussit.

Nr. 7

Kalaallit Nunaanni inuiaqatigiinnut aalajangersimasumik attuumassuteqarnermut oqaasertaliunneqartoq tassaavoq, ukiup ullorsiutaani qaammatinit arfinilinnit sivisunerusumik Kalaallit Nunaanniissimaguni, Kalaallit Nunaannut akileraartussaatitaavoq kiisalu Kalaallit Nunaanni aalajangersimasumik najugaqarluni. Qaammatinik arfinilinnik sivisunerusumik piffissami 1. januar-imiit 31. december ilanngullugu, nunamiinnissamik piumasaqaat equuutsinnejarsimassaaq. Kalaallit Nunaanni aalajangersimasumik najugaqaraanni Kalaallit Nunaannut akileraartussaatitaasoqartarpooq, tassa imaappoq, Kalaallit Nunaanni najugaqarluni inuit alltorsimaffiannut nalunaarsorneqarsimaneq.

Nr. 8

Ingerlatsinermut oqaasertaliunneqartoq tassaavoq, uumasunik pisassiiffiusartunik aamma pisassiiffiusanngitsunik piniarnermi aallaaniarnermilu Namminersorlutik Oqartussanit kommunillu isumagineqartartunik suliaqarnermi aqtsineq pingarnertullu aaqqissuussineq. Tamatuma assersuutigalugu kingunerivaa, uumasorsiuunit allaniillu siunnersuinermut naapertuutumik pisassiissutit il.il. nunalluunniit ilaani aalajangersimasumi ingerlatsiveqarfimmiluunniit pisassiissutaasunik taakkuninnga kommuni aqtsissasoq Namminersorlutik Oqartussanit aalajangersarneqartarnerat.

Nr. 9

Sunngiffimmi piniarnermut aallaaniarnermullu oqaasertaliunneqartoq tassaavoq, nammineq atugassanik pisat atorneqarnissaat siunertaralugu ingerlanneqartoq piniarneq aallaaniarnerlu. Taamaattoq uumasut ikittut aalajangersimasut ilaat mininnejarsinnaapput, tassa sunngiffimmi pisarineqartunik ersarinnerusumik nalunaarsukkat ilaat ilanngunnagit, tunineqarsinnaapput.

#### Nr. 10

Ataatsimoorluni piniarnermut oqaasertaliussaq tassaavoq, piniartunik arlaqartunik akuuffiusoq tessani akuersissut ataaseq imaluunniit immikkut inummut akuersissut atorlugu piniarneq aallaaniarnerlu. Assersuutigalugu umiatsiaaqqat arlallit angallatillu mikisut uumasunik pisassiiffiusartunik pisaqqaataasinnaapput kisiannili aamma piniartut qimussersut arlaliusinnaapput ataatsimoorlutik nannunniartut. Ataatsimoorluni piniarnermut ikinnerpaaffeqarnissamik piumasaqaateqarnermut ersarinnerusunik maleruagassat aalajangersarneqassapput, matumani pingaartumik assersuutigalugu arfanniarnermi angallatit angissusiinut amerlassusiinullu tunngasut ilanngullugit.

#### Nr. 11

Akuersissummut akuersissuteqarnermullu oqaasertaliunneqartoq tassaavoq, uumasoqatigii ataatsit piniarnissaannut aallaaniarnissaannullu pisinnaatitaaneq, inummut angallammulluunniit Naalakkersuisut nalunaarfigisinnaasaat. Akuersissummi aamma uumasut qassit nunallu immikkoortua , akuersissutip akuersissuteqarnerullu atuuffigisaa, nalunaarneqarsimassapput. Akuersissut pisassiissutinit allaassuteqarpoq imaattumik, akuersissut uumasunik pisassiiffiusartunik aalajangersimasunik pisaqarsinnaanermik pilersitsisarpoq, paarlattuanilli pisassiissutit aalajangertarpaat, nunap ilaani sumiiffimmi aalajangersimasumi qanoq amerlatigisut pisarineqarsinnaanersut.

#### Nr. 12

Pingaarnertut tunisassiortumut oqaasertaliussaq tassaavoq, inuk inuussutissarsiutigalugu piniartuusinnaasoq pingaarnertut tunisassiornermik isumaginnittooq, tassa imaappoq pingaarnertut tunisassianik tunisassiorneq, piniarnikkut, aallaaniarnikkut aalisarnikkullu uumasunit nujuartanit tunisassiat assersuutigalugu nunami imaanolu uumasut miluumasut, timmissat, manniit aalisakkallu. Tunisassiat taakku assersuutigalugu pisanit nutaanit tunisassiat inunnit nerineqartussatut eqqarsaatigisat, taakku arlaatigut sunnerneqarnissaat sioqqullugu.

#### Nr. 13

Uumasunik ajornartorsiutinik oqartarneq tassaavoq uumasoq kiisortoq, nanuukkajuttoq, qimaasaaraluarlugu sumiiffinnut najugaqarfiusunut uteqqiasartoq aamma inunnut pigisanullu aningaasaqarnikkut pingaaruteqarsinnaasunut ulorianartorsiortitsisinnaasoq. Matumani aamma pineqarsinnaapput amaqqt teriannialluunniit perlerornermik nappaatillit. Ulorianartorsiuiineq pisinnaavoq, nanoq inunnut saassussilersutut nalilerneqarpat. Aamma uumasoq kiisortoq pineqarsinnaavoq, uumasuutinik saassussisoq imaluunniit pigisanik aseruisoq.

#### *§ 4-mut*

##### Imm. 1-imut

Inatsisartut inatsisaata aalajangersagartaanik eqquutsitsisoqarnersoq Naalakkersuisut nakkutiginnittuunerat aalajangersakkap erseqqissaaffigaa, matumani nakkutilliinermut ingerlanneqavissumut tunngatillugu aamma nalinginnaasumik oqartussaasut pisinnaatitaanerannut tunngatillugu tamanna atuuppoq.

##### Imm. 2-mut

Akuersissutinik tunniussisarnermi allaffissornikkut ingerlatsinerup isumagineqarnissaa, kommunit ingerlatsiviinut peqqussutiginissamut aalajangersagaq Naalakkersuisut tunngavissamik tunniussivoq. Taamaalilluni Inatsisartut inatsisaata akisussaaffigisaanut allanut tunngasut aalajangiiffiginissaanut pisinnaatitaaffik kommunini oqartussaasunut tunniunneqarnissaannut maleruagassanik Naalakkersuisut siunissami ungasinnerusumi aalajangersimasunik saqqummiussisinnaalersillugit pisinnaatitsineq annertusineqarpoq.

Naalakkersuisut communalbestyrelsinut avataanit suliassanngortitsineranni aqutsinikkut aalajangikkanik ingerlatseqqifiisinnaasutut Naalakkersuisut atutissapput. Tamatuma kingunerisaanik innuttaasut communalbestyrelsit aalajangigaat pillugit Aalisarnermut, Piniarnermut Nunalerinermullu Naalakkersuisoqarfimmut naammagittaalliorsinnaalissapput.

#### *§ 5-imut*

##### Imm. 1-imut

Aalajangersagaq manna tikillugu suleriaatsimik ingerlatitseqqiineruvoq, taanna malillugu Kalaallit Nunaanni Aalisarsinnaanermut Akuersissutinik Nakkutilliisoqarfik, maanna "nakkutilliinermut oqartussatut" taaguuteqartut, kapitali 7 malillugu nakkutiginninnissamut nakkutilliinissamullu Inatsisartut inatsisaatigut peqquneqarsimallutik.

##### Imm. 2-mut

Aalajangersakkami Kalaallit Nunaanni Aalisarsinnaanermut Akuersissutinik Nakkutilliisoqarfimmit allaanerusunik nakkutilliisutut oqartussanik toqqaanissamut Naalakkersuisut pisinnaatinneqarput. Inuttassaaleqineq pissutigalugu imaluunniit suliap kinguartinneqarsinnaannginnera eqqarsaatigalugu nakkutilliilluni suliaqarnermi oqartussat allat ilanngutsinnejarnissaat pisariaqalerpat atorneqarsinnaasutut aalajangersagaq ilaatigut eqqarsaatigineqarpoq.

Tamatuma saniatigut aalajangersagaq atorneqarsinnaavoq, pisuni Danmark-imi naalagaaffimmi oqartussaasunik isumaqtiginninniareernerup kingorna pissusissamisoortumik isigineqartuni, illernissaqarfip aalisarnermut nakkutilliissutaa (Issittumi sakkutut) imaluunniit politiit nakkutilliinerup ingerlannissaanut ikorsiisinnasaasut. Aalisarnermut

piniarnermullu inatsisini suliassaqarfinnik arlaqartunik nakkutilliinermik misissuinermillu illersornissaqarfiup aalisarnernik alapernaarsuisui ingerlatsisareerput, taamaammat suleqatigiinnerup taassuma ingerlateqqinnissaa pissusissamisuussaaq. Politiit aamma nakkutilliinerni annikinnerusuni ikorsiisinnaanerat eqqarsaatigineqarsinnaavoq, assersuutigalugu illoqarfinni mikinerusuni nunaqarfinnilu, Kalaallit Nunaanni Aalisarsinnaanermut Akuersissutinik Nakkutilliisoqarfiup piniarnermik aalisarnermillu nakkutilliisoqarfiginngisaani.

Kiisalu NAMMCO-p alaatsinaattuinut Kalaallit Nunaanniinnissaannut akuersissuteqarnermut aalajangersagaq atorneqarsinnaavoq, taakku isumaqatigiisummi maleruagassat eququutsinnejarnersut alaatsinaattarpaat. Alaatsinaattut oqartussaasutut pisinnaatitaaffeqanggillat amerlanertigallu Kalaallit Nunaanni oqartussaasunit tapersorsorneqartariaqartarlutik.

#### *§ 6-imut*

##### Imm. 1-imut

Piniarneq aallaaniarnerlu tassunga akuersissutilinnit inunnit taamaallaat ingerlannejarsinnaasoq aalajangersakkap naqissuserpaa. Akuersissut inuussutissarsiutigalugu piniarnermut allagartanngorlugu imaluunniit sunngiffimmi piniarnermut allagartanngorlugu tunniunneqartarpoq, taamaattorli tak. § 16.

##### Imm. 2-mut

§ 4, imm. 2-mi taaneqartutut, akuersissutinik tunniussisarnermi allaffissornikkut ingerlatsinerup isumagineqarnissaanut akisussaaffik, communalbestyrelsinut Naalakkersuisut tunniussinnaavaat. Imm. 1-imi allanneqarsimasutut, akuersissutit inuussutissarsiutigalugu piniarnermut sunngiffimmilu piniarnermut allagartatut tunniunneqartarpuit.

#### *§ 7-imut*

##### Imm. 1-imut

Inuussutissarsiutigalugu piniarnermut aallaaniarnermullu akuersissut, inunnut 15-inik ukioqalereersimasunut inuussutissarsiutigalugu piniarnermut allagartatut tunniunneqarsinnaavoq. Matuma saniatigut aalajangersakkamiittut nr. 1 - 5 eququutsinnejarsimassapput. Taamaalilluni inuussutissarsiutigalugu piniarnermut allagartamik pissarsisinnaanermut piumasaqaatit sakkortusineqarput, tassa aalajangersimasunik ukioqarnissamut piumasaqaat 12-init 15-inut qaffanneqarmat. Aalajangersimasunik ukioqarnissamut killiliussaq taanna, uumasunik pisassiiffiusunut tamanut piniarnissamut akuersisummik pissarsinissamut killigititaasumut appasinnerusumut naapertuuppoq, tak. siunnersummi §§ 13 aamma 14.

Nr. 1

Inuk Kalaallit Nunaanni inuiaqatigiinnut aalajangersimasumik attuumassuteqassaaq, tamanna imatut paasineqarsinnaavoq, inuk ukiumi ullorsiuteqarfiusumi qaammatinik arfinilinnik sivisunerusumik Kalaallit Nunaanni najugaqartoq, Kalaallit Nunaannut akileraartussaatitaavoq kiisalu Kalaallit Nunaanni aalajangersimasumik najugaqarsimalluni, tak. § 3, nr. 7.

#### Nr. 2

Inuk Kalaallit Nunaanni aalajangersimasumik najugaqassaaq ukiunilu kingullerni marlunni (qaammatit 24-t) Kalaallit Nunaanni aalajangersimasumik najugaqarsimassalluni, inuussutissarsiutigalugu piniarnermut allagartamik inuup qinnuteqarneranit ullormiit naatsorsorlugu. Ukiunik marlunnik maleruagassap siunertaraa, piniarnermik aalisarnermillu inuussutissarsiutip ingerlannissaanut piumasaqaatinik inuup eqquutsitsinissaa pillugu piumasaqaatit attatiinnarneqarnissaat aalajangersaavigisarnerisalu ajornannginnerulernissaat. Matuma kingorna ukiunik marlunnik maleruagassap eqquutsinnejcarnera nalinginnaasumik naammassaaq. "Kalaallit Nunaanni inuiaqatigiinnut aalajangersimasumik attuumassuteqarneq" pasitsaassisoqartillugu ingerlaannartumik, tak. nr. 1, namminerisaminik isumaqalissaaq, tassa pineqartoq Kalaallit Nunaanni najugaqavinnersoq aamma najugaq ilumuunngitsoq pineqarnersoq eqqarsaatigineqartariaqalissammata. Aammattaaq pineqartoq ukiuni marlunni kingullerni Kalaallit Nunaannut tamakkiisumik akileraartussaatitaasimanersoq pingartinneqartussaavoq. tak. nr. 3.

#### Nr. 3

Inuk Kalaallit Nunaannut tamakkiisumik akileraartussaatitaassaaq ukiumullu ullorsiutini kingullerni marlunni Kalaallit Nunannut tamakkiisumik akileraartussaatitaasimassalluni. Tamanna ima oqaatigineqarsinnaavoq, 2019-imi inuussutissarsiutigalugu piniarnermut allagartamik qinnuteqartoq inuk, 2019-imi tamakkiisumik akileraartussaatitaanermi saniatigut aamma ulloq 1/1-2017-imiit ulloq 31/12-2018 ilanngullugu tamakkiisumik akileraartussaatitaasimassasoq.

#### Nr. 4-mut

Ingerlatsiveqarfimmi pineqartup inuussutissarsiutigalugu piniarnermut allagartamik qinnuteqarfigisaani, piniarnermut aallaaniarnermullu atortunik pisariaqartunik inuk peqassaaq. Tamanna ima oqaatigineqarsinnaavoq, nunap ilaa pineqartup piniarnikkut aallaaniarnikkullu inuuniuteqarfissaa. Qinnuteqartup piniutinik pissarsisinnaanera matumani naammappoq. Pineqartup piniutinik nammineerluni peqarnissaa matumani pisariaqanngilaq. § 3, nr. 5 naapertorlugu pineqartut tassaapput, piniutit atortullu pisariaqartut akuerisaasullu, uumasunik aalajangersimasunik pisaqarniarneq toqtsiniarnerlu siunertaralugit piniarnermut aallaaniarnermullu atorneqartussat.

#### Nr. 5

Pingarnertut malittarisassaavoq inuit piniarnermit, aallaaniarnermit aalisarnermillu minnerpaamik 50%-inik tamarmiusunik isertitaqartut inuussutissarsiutigalugu piniartutut

isigineqarsinnaasut, taamaammallu inuussutissarsiutigalugu piniarsinnaanermut allagartamik pissarsisinnaasut. Tamassuma kinguneraa inuussutissarsiutigalugu piniartoq inuussutissarsiutinit allanit saniatigulluuniit inuussutissarsiummit isertitaasa 50%-it qaangerpagit, taassuma inuussutissarsiutigalugu piniarnermut allagartani annaassagaa.

Inuussutissarsiutigalugu piniartut aalisartullu akornanni immikkoorutit ersarinnerulersikkumallugit, killiliinermik ersarinnerusumik suliaqartoqarnikuuvvoq, taamaalilluni angallatit 25,5 meterinit anginerusunit aalisarnermit tunngaviusumik isertitat, inaarutaasumik nalunaarummut ilaatinneqartarunnaarsimapput. Erseqqissaanerup taassuma angallatit 25,5 meterit atorlugit isertitat ersarinnerulersinnissaat qulakkiissavaa tamannalu piumasaqaammut 50 %-iusumut ilaatinneqassaaq, angallatinilu inuttaasunut inuttaanermi tassannga akissarsiaqarnerup saniatigut inuussutissarsiutigalugu piniarnermut allagartamik pissarsiniarnermut tapertaasinnaalluni uumasunullu pisassiiffiusartunut akuersissummik pissarsinissamut aqutissiuussilluni.

Tamatuma saniatigut § 8, nr. 1-4-im, pineqartup tunngaviusumik isertitaanik tamarmiusunik nalilersuinermut maleruagassat ersarinnerusut aalajangersarneqarnikuupput.

#### *§ 8-mut*

Imm. 1-imut

Nr. 1

Angallatit 25,5 meterit tassanngalu mikinerit atorlugit aalisarneq, piniarnermit, aallaaniarnermit aalisarnermiillu tunngaviusumik isertitanik nalunaarsuinermut ilaatinneqassaaq. Siusinnersukkut angallatip takissusianut uuttuut allagaq malillugu nalunaarusiortarneq qimanneqarnikuuvvoq, tassa nakkutilliinermik oqartussaasumit tamanna nakkutilliivigineqarsinnaasanngimmat. Tamanna aallaavigalugu tamakkiisuusumik takissuseqarnermut uuttuutit allanngortinneqarnikuupput. Teknikkikkut allannguut pineqarpoq, tassa angallatit (210 BT-imik oqimaannerit) taamaattut assingi atorlugit aalisarnerummat, isertitat piniarnermit, aallaaniarnermit aalisarnermiillu pisut ilaatinneqartaratik. Allannguut taamaalilluni maannakkut pissutsinik allannguissanngilaq.

Nr. 2

Akiliisitsilluni aallaaniartitsinermut aamma tammajuitsussarsiniarluni piniarnermit imaluunniit akiliisitsilluni aallaaniartitsinermut atatillugu angallassisutut isertitat, piniarnermut aallaaniarnermullu toqqaannartumik ataqtigiimmata, taakku piniarnermit, aallaaniarnermit aalisarnermiillu tunngaviusumik isertitatut nalunaarsorneqassapput. Inuussutissarsiutigalugu piniartoq taamaaliornikkut allanik isertitaqarnissamut periarfissaqalissaaq taamaalilluni 50 %-imik piumasaqaatip angunissaa aamma ajornannginnerulissaaq taamaalillunilu inuussutissarsiutigalugulu piniarnermut allagartap pigiinnarnissaa pitsaanerulissalluni. Matatuma saniatigut piniartoq nalinginnaasoq ileqqutoqqat malillugit piniarnermik, aalaaniarnermik aalisarnermillu taamaallaat ingerlatsisoq, inunnut akiliisitsilluni

aallaaniartitsinermik ingerlatsisartunut, inuussutissarsiutigalugu piniarnermut allagartamik pissarsinissaanut akuersinerit pillugit aalajangiinerni naligiisinneqarnissaat siunertaavoq.

#### Nr. 3

Piniartut takornariartitsilluni ingerlatsinernit aamma ilisimatusartunut ikuunnernit saniatigut isertitaqarsinnaanerat aalajangersakkap periarfissippi, tamanna inuussutissarsiutigalugu piniarnermut allagartap arsaarinnissutigineqarneranik kinguneqanngitsumik.

Takornariartitsineq piniakkat killeqarneranni piniartutut inuussutissarsiornermi saniatigut isertsivittut isigineqarpoq. Takornariartitsinermik ingerlatsineq, inuussutissarsiutigalugu piniartutut inuussutissarsiornikkut pisinnaasanut attuumassuteqartoq, assersuutigalugu pinngortitamik uumasunillu takunnikkumalluni qimusserneq imaluunniit umiatsiaaqqamik qaannamilluunniit imaatigut angalaarneq, matumani arfernik takusassarsorneq imaluunniit misigisassarsiuineq ilanngullugit, isertitat nalunaarsorneranni sunniuteqartinnagit ilanngunneqassapput. Tassa imaappoq isertitat piniarnermit, aallaaniarnermit aalisarnermiillu tunngaviusumik isertitat imaluunniit procentip ilaaniq naatsorsuilluni tunngaviusumik isertitat allat nalunaarsornerinut ilanngunneqassanngillat.

Piniartut ilisimatusarnermi ikuuttarnerat eqqarsaatigalugu, ilisimatuut uumasunik misissuinerminnut ilisimatusarnerminnullu atatillugu piniartut akuttunngitsumik ikiortigisarpaat. Piniartut ilisimasanik piniutinillu kiisalu angallatinik ilisimatusartunit atorneqarsinnaallutilu attartorneqarsinnaasunik peqarput, taamaammat suliniutini pinngortitami ingerlanneqartussani piniartut peqataasinnaasarpot kiisalu pinngortitami suliffiusussamut ilisimatusartunik taakkulu atortuinik assartuussisinnaallutik. Uumasunik nalunaaqutfersuinermut, misilgitissanik pissarsiniarnermut atatillugu aamma uumasunik aalajangersimasunik kisitsinermut atatillugu alapernaatsutut piniartut aamma atorneqartarput. Isertitat ilisimatusarnermi ikuunnermit pisut, taamaaqataanik isertitanut sunniuteqanngitsumik inissinneqassapput.

#### Nr. 4-mut

Toqqakkatut inuaqatigiinni suliaqartitaanermit akissarsiat, tak. § 3, nr. 2-mi oqaasertaliussaq, Namminersornerullutik Oqartussat Qinikkatut Pisortanillu Toqqakkatut suliaqarneq pillugu nalunaarutaat nr. 5, 15. marts 1994-imeersup § 1-ianut naapertuuttumik oqaasertalerneqartussat, piniarnermit, aallaaniarnermit aalisarnermiillu tunngaviusumik isertitanut tamarmiusunut imaluunniit tunngaviusumik isertitat tamarmiusut nalunaarsornerinut ilanngunneqassanngillat. Inuussutissarsiutigalugu piniartut kattuffiini siulersuisuni sulinermit akissarsiat aamma Naalakkersuisunut ilaasortatut ajunngitsorsiassat aamma kommunefogeditut akissarsiat tamatuma assinganik pineqassapput. Toqqakkatut inuaqatigiinni suliaqartitaanernit taakkunannga aamma inuaqatigiit soqutigisaanni atuuffinit pingaarutilinnit allanit akileraaruteqannginnissamut tunngavilersuutigineqartoq tassaavoq, ilaatigut toqqakkatut inuaqatigiinni suliaqarnissamik isumaginninnissamut naaggaartoqarsinnaanngimmat ilaatigullu atuuffiit pingaaruteqartut allat inuttalernissaat ajornakusoorsinnaasarmat, assersuutigalugu inuaqatigiinnut atuuffik taama pingaartigisoq

pisussaaffigileraluaruniku, inuussutissarsiutigalugu piniartut pisinnaatitaanermik taassuminnga piginniinnarsinnaajunnaarnerinik matumani kinguneqassappat.

#### *§ 9-mut*

Imm. 1-imut

Sunngiffimmi piniarsinnaanermut aallaaniarsinnaanermullu akuersissut inunnut 12-inik ukioqalereersimasunut Kalaallit Nunaannilu aalajangersimasumik najugaqartunut tunniunneqarsinnaavoq. Aalajangersimasunik ukioqarnissamut piumasaqaat manna tikillugu 12-nik ukioqartunut aalajangiussimaneqarpoq, taamaattorli uumasunut pisassiissutaasunut tamanut akuersissummik pissarsinissamut piumasaqaatit sakkortusineqarnissaat siunnersuutigineqarluni, tak. siunnersuummi §§ 13 aamma 14.

Tamatuma sanitigut aalajangersagaq imm. 1-imiittooq ilaneqarnikuovoq, taamaalilluni nunami innuttaassuseqartunut tamanut Kalaallit Nunaanni aalajangersimasumik najugaqartunut atuuttunngorluni. Inuit Kalaallit Nunaanni aalajangersimasumik najugaqartut, danskisut innuttassuseqanngitsut, unioqqutitsisumik immikkoortinneqartannginnissaat qulakkeerniarlugu allannguineq ingerlanneqarpoq. Europami inuit piginnaatitaaffii pillugit isumaqtigiissut pillugu inatsisip Kalaallit Nunaannut peqqussut nr. 814, 18. september 2001-imeersoq aqqutigalugu atuuttunngortinneqarsimasup, artikkel 14-ia tamatuma malippaa.

#### *§ 10-mut*

Imm. 1-imut

Aalajangersakkap, ersarinnerusumik aalajangersakkanik nr. 1-4-mi allanneqarsimasunik ilaqaartup, Naalakkersuisut §-ini 7-9-mi piumasaqaatinit immikkut akuersissuteqarnissamut periarfissippai. Kalaallit Nunaanni piniarnermik aallaaniarnermillu inuussutissarsiornerup siunissamut ungasinnerusumut isigaluni ineriertortinnissaanut piumasaqaatit nalinginnaasut killilersuisutut sunniuteqarfigisinnaasaraluanni, pisuni allattorneqartuni immikkullarilluinnartunilu, piniarnermik aallaaniarnermillu inuussutissarsiuteqarnerup siunissami ineriertortinneqarnissaa pillugu kissaateqarnerup isiginiarneqarnera, immikkut ittumik akuersissuteqartarnermi maleruagassanut aallaaviovoq.

Nr. 1

§-ini 7, 8 aamma 9-mi piumasaqaatinit immikkut akuersissuteqarneq pillugu Naalakkersuisut nalunaaruteqarsinnaanerat siunnersuutip periarfissippaa. Ima paasillugu, kalaallinut inuiaqatigiinnut aalajangersimasumik attuumassuteqarnissaq, aalajangersimasumik najugaqarnissaq kiisalu pineqartoq Kalaallit Nunaata avataani ilinniarluni assigisaanilluunniit peqquteqarluni nunami allaniippat, akileraartussaatitaaneq pillugit nalinginnaasumik piumasaqaatinit Naalakkersuisut immikkut akuersissuteqarsinnaapput. Pingaarningerorli tassaavoq, pineqartoq ilinniariarluni, suliffimmik misiliilluni, mesteritut ilinniariarluni assigisaanilluunniit ingerlatsiartorluni nunami allamiissimanissaa, tamannalumi aamma

inuussutissarsiummi allami ilinniartutut atorfimmiinnermik aallaaveqarsinnaavoq. Matumani pineqartoq soraarummeernermit upternarsaammik, diplom-imik assigisaanilluunniit ilaqtillugu ilinniarnerminik naammassinninersoq kisiannili pineqartup upternarsinnaassavaa, ilinniarnerup assigisaataluunniit ingerlannerani sumiissimanerluni. Piniarnermut, aallaaniarnermut aalisarnermulluunniit ilinniarneq attumaassuteqassasoq piumasaqaataanngilaq.

Tassunga atatillugu ”najugaqarallarnermi” pineqartup Kalaallit Nunaata avataani piffissami qanoq sivisutigisumik najugaqarsimanera aalajangiisutut pingaartinneqanngilaq, Taamaattorli pineqartoq ilinnialernissamut qinnuteqaateqarsimanersoq imaluunniit Kalaallit Nunatsinniit pisinnaasassamik assingusumik allamik pisinnaasaqalernissaq siunertaralugu aallaqqasimanersoq pingaartinneqartopoq.

Matuma saniatigut qinnuteqartup Kalaallit Nunaannut attuumassuteqarnera naamaginartutut nalilerneqarpat, piumasaqaatininit immikkut akuersissuteqarneq tunniunneqarsinnaavoq. Matumani pingaartillugu isigniarneqartopoq, pineqartoq Kalaallit Nunaannut qanittumik attuumassuteqarnersoq assersuutigalugulu Kalaallit Nunaanni inunngorsimanersoq alliartorsimanersorlu, kisiannili immaqa piffissami kingullermi nammineerluni imaluunniit ilaquitap qanigisap napparsimanera imaluunniit pissutsit immikkut ittut assingusut pissutigalugit Kalaallit Nunaanni najugaqarsimannginneq.

Kisalu pisuni immikkuullarilluinnartuni, inuit qaammatini arfinilinni sivisunerusumiluunniit Kalaallit Nunaannut suliartortinneqarsimappata Kalaallit Nunaannullu akileraartussaatitaasimappata kisianni Kalaallit Nunaanni najugaqarallartutut nalunaarsimallutik, immikkut akuersissut tunniunneqarsinnaavoq. Pissutsit immikkuullarissut taakku assigiissutaat tassaavoq, inuinnut qimminullu nerisassamaatissanik ilasinissaq pisariaqartartoq pineqarmat. Matumani assersuutigineqarsinnaavoq, Seriuspatruljen-imut sakkutuut sulisunik suliartortitsinerat, imminerminnut qimminullu neqinik nutaanik pilersoqqinnissamut periarfissaqartussat qaammatinilu arlaqartuni qimussimik alapernaarsuisussat.

## Nr. 2

Taamatuttaaq § 7-imi, nr. 5 aamma § 8-imi piumasaqaatininit immikkut ittumik akuersissuteqartoqarsinnaavoq, inunnut manna tikillugu pingaarnertut inuussutissarsiummik ingerlataqarsimanngitsunut. Maleruagassaniit immikkut akuersisinnaaneq aalajangersakkap kingunerivaa, taamaalilluni inuusuttut piniartunngorlaat inuussutissarsiutigalugu piniarnermut allagartamik pissarsisinnaalersillugit, naak siusinnerusukkut inuussutissarsiutigalugu piniartusimanngikkaluartunik. Inuusuttut piniartunngorlaat, siusinnerusukkut inuussutissarsiutigalugu piniartutut misilittagaqanngitsut imaluunniit siusinnerusukkut piniarnermit, aallaaniarnermit aalisarnermiillu tunngaviusumik isertitat 50 %-iinik isertitaqartarsimanngitsut, taamaalillutik siullermeersumik inuussutissarsiutigalugu piniarnermut allagartamik qinnuteqartillutik, pissarsisinnaasut akornanniissinnaalerput.

### Nr. 3

Isertitat amerlassusissaat pillugu piumasaqaatit eqquutsinnejannerinut sunneeqataasut pissutsit immikkut ittut atuussimanerat upernarsarneqarsinnaagaangat, § 7-imi, nr. 5-imit aamma § 8-mit immikkut akuersissuteqarnissamut aalajangersagaq perarfissiivoq. Uani assersuutut pissutsit qinnuteqartup sunniuteqarfiginngisai eqqarsaatigineqarput, pineqartoq piniaarnissamut, aallaaniarnissamut aalisarnissamulluunniit pisinnaasimassanngilaq, napparsimaneq aamma tarnikkut anniaateqarneq imaluunniit inuttut aqquaakkat allat patsisigalugit. Matumanit aamma pissutsit eqqaaneqarsinnaapput, piniutit piniaermilu atortut annaaneqarsimamanerat imaluunniit aserorsimanerat imaluunniit angallatigisap ajoquteqalersimanera. Pineqartoq allamik suliffeqarsimappat suli suliffigisassamik, ikinnerpaamik 50 %-imik isertitaqarnissamik piumasaqaatip eqquutsinnissaa pissutsit immikkut ittut ajornartissinnaavaat.

### Nr. 4-mut

Inuit inuussutissarsiutigalugu piniaartutut uninngallatsiareernermik kingorna, assersuutigalugu Kalaallit Nunaanni ilinniartuunerup malitsigisaanik, inuussutissarsiutigalugu piniaartutut ingerlaqqilernissamik kissaateqaqqilernermi, maleruagassani § 7, nr. 5-imiit aamma § 8-miit aamma immikkut akuersisoqarsinnaavoq. Taassuma saniatigut inuup siusinnerusukkut piniaermik aallaaniarnermillu inuussutissarsiuteqarsimasup, piffissamili aalajangersimasumi taassuminnga ingerlataqarsimannngitsup piniaermut allaaniarnermillu uteqqissinnaanera aalajangersakkap inummut perarfissiissutigissavaa.

Pineqartup siusinnerusukkut piniaermik aallaaniarnermillu pingaarnertut inuussutissarsiortuusimanera, qarasaasiaq atorlugu upernarsarneqarsinnaassaaq. Pineqartoq siusinnerusukkut piniaermik aallaaniarnermillu pingaarnertut inuussutissarsiortuusimappat, piniaeq pillugu Namminersorlutik Oqartussat qarasaasiakkut toqqorsiviata, Luli-p, nalunaarsuiffiani tamanna atuarneqarsinnaassaaq.

### § 11-mut

#### Imm. 1-imut

Suliffeqarfiiit ilaannut, immikkut ittumik inuussutissarsiutigalugu piniaermut imaluunniit sunngiffimmi piniaermut allagartamik, akuerineqarnissaq pillugu aalajangersimasumik qinnuteqarnerup kingorna, tunniussisinnaaneq aalajangersakkakut perarfissiissutigineqarpoq. Ingerlatsiviit taakku piniaeq, aallaaniarneq aalisarnerlu inunnik isumaginninnermi perorsaanermanni atortumiinnut ilaattittariaqarpaat. Taamatuttaaq atuarfinnut, ilinniartitsinerup ilaautut pingaartutut piniaeq aallaaniarnerlu ilaasimatillugit, inuussutissarsiutigalugu piniaermut aamma sunngiffimmi piniaermut allagartaq tunniunneqarsinnaavoq.

Inuussutissarsiutigalugu aamma sunngiffimmi piniarnermut allagartaq, suliffeqarfimmut atuarfimmullu namminermut aamma suliffeqarfimmi inunnut ataasiakkaanunngitsoq tunniunneqartapoq. Tamanna ima isumaqarpoq, suliffeqarfimmi inuit pineqartut, suliffeqarfik qimakkunikku, inuussutissarsiutigalugu aamma sunngiffimmi piniarnermut allagartap atornissaanut ilaajunnaassasut. Tamanna sulisunut atuisunullu atuuppoq.

Piniarnermut allagartamik tunniussinermut atatillugu piumasaqaatit Naalakkersuisut aalajangersarsinnaavaat, matumani uumasunik pisassiiffiusartunik piniarsinnaaneq killilik imaluunniit piniarsinnaannginneq ilanggullugit. Piniarsinnaannginneq isumaqarpoq, nannunik aavernillu piniarnissamut akuersissut tunniunneqarsinnaanngitsoq, paarlattuanilli pisassiissutit amerlassusii naammaginarsimappata qilalukkanik qaortanik qernertanillu, tuttunik umimmannillu piniarnissamut akuersissutit tunniunneqarsinnaapput.

#### Imm. 2-mut

Suliffeqarfieuq atuarfiulluunniit aqtsisuisa akisussaaffigaat, suliffeqarfieuq sulusuisa atuisuisalu imaluunniit atuartuutaasa piniarnermut aallaaniarnermullu tunngatillugu maleruagassat eqquutsissagaat, Inatsisartut inatsisaat una atorlugu aalajangersarneqarsimasut imaluunniit tamanna naapertorlugu aalajangersakkat saqqummiunneqarsimasut, matumani pisanik nalunaaruteqarnissaq ilanggullugu.

#### *§ 12-imut*

##### Imm. 1-imut

Piniarneq aallaaniarnerlu akuersisummik pisariaqartitsippu taannalu piniarnermut allagartaavoq, tak. § 6. Tamatumali saniatigut pisuussutit piujuarnissaannik erniortarnissaannillu kissaateqarnerup malitsigisaanik, uumasut ilaannut pisassiissutissanik aalajangersaasarnissaq pisariaqartarsinnaavoq, piniarneq aallaaniarnerlu atorluaaffiusoq qulakkeerniarlugu. Uumasorsiuut pisarnertut siunnersuinerat kiisalu najukkani atuisullu ilisimasaannut naapertuuttumik pisassiissutit aalajangersarneqassapput agguanneqarlutillu. Tamanna tunuliaqutaralugu, uumasunik pisassiiffiusartut ilaannik piniarnissamut aallaaniarnissamullu akuersissutit tunniunneqartarput.

##### Imm. 2-mut

Kommunip najugaqarfiusup, piniarnermut allagartamik atuuttumik peqartunut qinnuteqartunut aamma ingerlatsiveqarfimmi inuit allattorsimaffiannut nalunaarsorneqarsimasunut akuersissutit agguallugillu tunniuttarpai. Taamaattoq uumasut aalajangersimasut mininneqarsinnaapput, soorlu arferit angisuut pineqartillugit tamatumani akuersissut tunniunneqarsinnaammat kommuninit allanit kommunimi najugaqarfigisamiunngitsoq.

Oqaatigineqassaaq Naalakkersuisut § 4, imm. 2 naapertorlugu, Inatsisartut inatsisaata akisussaaffeqarfiinut tunngatillugu, tamakkiisuusumik ilaannakuusumilluunniit aalajangiisarnermi pisinnaatitaaffimmik, matumani assersuutigalugu akuersissutinik il.il.

agguassesarneq tunniussisarnerlu ilanngullugit, kommunimut tunniussisinnaanermut Naalakkersuisut tunngavissinneqarnikuummata.

#### Imm. 3-mut

Ingerlatsiveqarfimmi pineqartumi akuersissutit atuuttut, inuup najugaqarfigisaaniittut pillugit imm. 2-mut minissineq ilanngunneqarnikuovoq. Minissineq pisuni immikkullarissuni atorneqarsinnaavoq, ingerlatsivimmi ataatsimi pisassiissutit killilersugaasimanngippata. Najugaqarfigisami attuumassutilimmi pisassiissutit killilersugaanngitsut pineqassapput, tassa imaappoq, ataatsimut isigalugu ingerlatsivimmi tamarmiusumi pisassiissutit naammattutut isigineqarnerat matumani naammanngilaq. Pisumi taama ittumi, Aalisarnermut, Piniarnermut Nunalerinermullu Naalakkersuisoqarfik qinnuteqareernikkut akuersissummik tunniussisinnaavoq, taamaalluni nunap immikkoortuani pisassiissutit killilersugaaffiginngisaanni aamma inuit ingerlatsiveqarfimmit imaluunnit kommunimit allaneersut piniarnermik aallaaniarnermillu ingerlatsisinnaaqqullugit.

#### Imm. 4-mut

Uumasunut pisassiiffiusartunut akuersissutinik agguassinermi piniutinik angallatinillu pisariaqartunik peqartoqarnissaanik Naalakkersuisut piumasaqaateqarsinnaapput. Pisariaqartumik piniarnermut atortut ima oqaasertalerneqarsinnaapput, atortulersuutit atortullu pisariaqartut akuerisaasullu piniarnermi aallaaniarnermilu, uumasunik aalajangersimasunik pisaqarniarnermi toqtsiniarnermilu atorneqartussat, tak. § 3, nr. 5.

### *§ 13-imut*

#### Imm. 1-imut

Inuit 15-inik ukiullit aamma inuussutissarsiutigalugu piniarnermut allagartamik peqartut, qinnuteqareernikkut akuersissummik aamma uumasunik pisassiiffiusartunik inuussutissarsiutigalugu piniarnissamut aallaaniarnissamullu akuersissummik tunineqarsinnaapput. Uumasunik pisassiiffiusartunik tamanik piniarnissamut aallaaniarnissamullu akuersissummik tunineqarnissamut aalajangersimasunik ukioqarnissamik piumasaqaatit 15-inik ukioqarnermut nalinginnaasumik inissinnerisigut uumasunut tamanut piumasaqaammik ataatsimoorussamik nassaartoqarpoq, aamma tuttunut umimmannullu nujuartanut akuersissummut aalajangersimasunik ukioqarnissamik piumasaqaat 16-inik ukioqartussaasoq taanna naapertorlugu 15-inik ukioqartussamut appartillugu iluarsineqarpoq.

§ 12 naapertorlugu, ingerlatsivinnut ataasiakkaanut pisassiissutit agguanneqartarput, matuma kingorna akuersissutit agguanneqartarput tamanna naapertorlugu, tak. imm. 2.

#### Imm. 2-mut

Aalajangersakkami akuersissutinit amerlanerusunik qinnuteqaateqartoqarsimappat, agguassineq qanoq ingerlanneqassanersoq aalajangersarneqarpoq. Siullermik tulleriinneq

malillugu agguassisoqartarpoq, tassani siornaammat pisat kiisalu akuersissutit atorneqarsimanngitsut eqqarsaatigineqartunut ilaasарput. Tamatumagguassineq aalajangiiffigisinnaanngippagu, kommuni akuersissutit pillugit makitsisinnaavoq.

#### Imm. 3-mut

Piniartut inuussutissarsiutigalugu piniarnermit, aallaaniarnermit aalisarnermiillu inuussuteqarsinnaasariaqarput, taamaammat ingerlatsiveqarfinni isorartuuni, piniarnerup imminut akilersinnaanissa angujumallugu piniartunut tamanut imaluunniit ataatsimoorullugu piniarnernut tamanut akuersissutit arlaqartut tunniunneqarsinnaapput. Pisuni tamani immikkut aalajangersimasumik nalilersuinermit tamanna aallaaveqartassaaq, piumasaqaatilli assersuutigalugu isertitarineqaratarsinnaasut aamma, nunap immikkoortuanukarnermi orsussamut, nerisassanut unnuinermullu kiisalu piffissaq sivisooq angalanermut atugaq sivisunerusoq pissutigalugu, aningaasartuutit akornanni pissutsinut tunngasinnaapput.

#### Imm. 4-mut

Akuersissutit sinneqassagaluarpata imaluunniit akuersissutip periarfissiissutaatut amerlatigisunik uumasunikpisaqartoqarsimangippat, taava akuersissutit sinneruttut agguateqqinnissaannut periarfissaqartoqartariaqarpoq. Taamaattumikakuersissutit tunniunneqartarnerannut oqartussaasup - nalinginnaasumik kommuni - makitsinermut atatillugu utaqqisut allassimaffiat pingaarnersiugaq,akuersissutinik agguasseqqinnermi atorneqartoq, atussavaa.

#### Imm. 5-imut

Makitsinermut atatillugu paasiuminartuunissap qulakkeerniarneranut, kikkut tamarmik (nalinginnaasumik kommunimi innuttaasut) makitsinerup ingerlanneqarneranut malinnaanissamut periarfissaqartussaapput. Taamaattumik makitsinissamut piumasaqaatit, piffissaliussaq aamma sumiiffissaq, makitsinissaq sapaatip akunneranik ataatsimik sioqqullugu, kommunip tamanut saqqummiutissavai.

#### Imm. 6-imut

Uumasunik pisassiiffiusartunik inuussutissarsiutigalugu piniarnissaannut aallaaniarnissaannulluakuersissutinik agguassisarnermut maleruagassat ersarinnerusut Naalakkersuisut aalajangersarsinnaavaat.

### *§ 14-imut*

#### Imm. 1-imut

Ilaatigut qinneqartup 15-inik ukioqalersimanissa aamma sunngiffimmi piniarnermut allagartamik peqarnissaa,ilaatigullu pineqartup Kalaallit Nunaanni aalajangersimasumik najugaqarnissaa ukiunilu kingullerni marlunni, piffissap qinnuteqarfiusup siornatigut, Kalaallit Nunaanni aalajangersimasumik najugaqarsimanissa aalajangersakkap

aalajangersaaffigaa. Ukiut kingulliit marluk imatut paasineqassaaq, piffissaq imminut atasooq qaammatinik 24-inik sivisutigisoq.

Matuma kingunerisaanik, inuit nutseqammisut uumasunut pisassiiffiusartunut akuersissummik pissarsisinnaanertik aatsaat angusinnaavaat, ukiut marluk imminut atasut kingorna Kalaallit Nunaanni najugaqarsimagunik. Nunamit suminngaanneersuuneq apeqquatainneqanngilaq, taamaammat assersuutigalugu nunamit suminngaanneersuuneq pissutigalugu immikkoortitsisarneq pillugu Europami inuit piginnaatitaaffii pillugit isumaqatigiisummi artikel 14-imut, malittarisassaq taanna akerliunngilaq.

Siunnersummut tunuliaqutaasoq tassaavoq, inuussutissarsiutigalugu piniartut kiisalu inuit ukiuni marlunni imminut atasuni Kalaallit Nunaanni najugaqarsimasut kulturikkut sunngiffimilu pisariaqartitaat, assersuutigalugu tuttut umimmaallu aamma mianerineqartussaasarmata.

Imm. 2-mut

Imm. 1-imi malerauqqussamiit immikkut ittumik akuersissuteqarsinnaanissamut aalajangersagaq periarfissiivoq, matumani qinnuteqartoq Kalaallit Nuaanni aalajangersimasumik najugaqarpat aamma piffissaq qinnuteqarfiusoq sioqqullugu ukiuni kingullerni qulini, sivikinnerpaamillu ukiuni marlunni imminut atasuni Kalaallit Nunaanni najugaqarsimappat. Tassaasinnaavoq assersuutigalugu inuk Danmarkimut ilinniariarluni nuussimasoq, angerlarnermi aamma inuit allattorsimaffiannut nalunaarsorneqarnermi kingorna, sunngiffimmi piniarnermut allagartaq atorlugu uumasunik pisassiiffiusartunik piniaqqittalernissamik kissaateqartoq.

#### *§ 15-imut*

Imm. 1-imut

Tunniussisarneq, pissarsisarneq aamma akuersissutinik annaasaqartarneq, akuersissutit aamma piniarnermut allagartat pillugit ersarinnerusunik maleraugassanik aalajangersaanissamut tunngavissap Naalakkersuisunut tunniussinissaa aalajangersakkut siunertarineqarpoq. Tamatuma saniatigut, akuersissutinik aamma piniarnermut allagartanik tunniussinermi akiliutip akilersinnissaanut tunngavissamik aalajangersagaq Naalakkersuisunut tunniussivoq.

Imm. 2-mut

Akuersissummi piumasaqaatinik imaluunniit Inatsisartut inatsisaannik imaluunniit Inatsisartut inatsisaat naapertorlugu malittarisassanik saqqummiunneqarsimasunik, akuersissummik piginnittooq unioqqutitsisimappat, Naalakkersuisut imaluunniit Naalakkersuisut matumunnga oqartussaatitaat (kommunit) akuersissummik killiliisinnaanermut aalajangersakkap periarfissippai. Imaassinjaavoq assersuutigalugu inuk akuersissummik pissarsinngitsoq

imaluunniit nunap ilaani sumiiffimmi aalajangersimasumi akuersisummit atuinissamut akuerineqanngitsoq.

Aamma Inatsisartut inatsisaannik sakkortuumik unioqqutitsinermi, akuersissutip arsaarinnissutigivinnissaanut periarfissaqarpoq. Assersuutigalugu suliani, inuussutissarsiutigalugu sunngiffimiluunniit piniartup uumasumik toqtsiniarnermini aallaammik akuerisaanngitsumik atorsimatillugu imaluunniit uumasumik pisamik qimatsisimatillugu. Pisut aamma imaassimasinnaapput, piniarnermut allagartamik akuersisummilliunniit peqarnani imaluunniit nunap ilaani piniarfigeqqusaanngitsumi inuk uumasumik pisaqarsimasoq. Aamma imaassinaavoq akuersisummi piumasaqaatinik imaluunniit akuersisummit imaluunniit Inatsisartutinatsisaannik arlaleriarluni unioqqutitsinermik uteqqiasunik pisoqarsimasoq.

Akuersisummit arsaagaaneq, eqqartuussinikkut pissaaq. Imaassinaavoq akuersisummit piffissami aalajangersimasumi arsaarinninneq imaluunniit akuersisummit arsaagaaneq imaluunniit arsaarneqarallarneq pineqartut.

Piffissami killilikkami arsaagaaneq pineqarpat, arsaagaaneq ukiup ataatsip ukiullu tallimat akornanni sivisussuseqarsinnaavoq. Arsaarneqarsimagallarneqassasoq pineqarpat pineqartoq ukiut tallimat qaangiunneranni arsaarneqarsimanerup kipisinnaanerata nutaamik aalajangiiffiginissaanik qinnuteqarsinnaavoq. Arsaarinninnerup atorunnaarnera pillugu taamatut aalajangiineq aalajangiinikkut pissaaq. Arsaarneqarsimagallarneqassasumik aalajangikkap taamaatinnissaanik qinnuteqarneq akuerineqanngippat akueritinniarneq misilinnejqaqqissinnaavoq, kisianni minnerpaamik itigartitaanerup siulliup kingornagut ukiut marluk ingerlareerneratigut.

### Imm. 3-mut

Imm. 1 malillugu maleruagassat aalajangersornerannut atatillugu aalajangiisarnermut oqartussaaffiup kommuninut tunniunneqarsinnaaneranut Naalakkersuisut tunngavissaannik aalajangersagaq pilersitsivoq. Kommunit atuisunut qaninnerpaajupput, taamaammat qinnuteqartup inuussutissarsiutigalugu piniarnermut imaluunniit sunngiffimmi piniarnermut allagartamik pissarsisinnaanissa pillugu ajunnginnerusumik aalajangiisinnaapput. Taamaattumik matumani allaffissornikkut suliassat kommuninit isumagineqarpata pissusissamisuussaaq.

Tamatuma saniatigut, qinnuteqartup inuussutissarsiutigalugu imaluunniit sunngiffimmi piniarnermut allagartamik pissarsinissamut pisinnaatitaaneranik nalilersuinermi, kommunit qitiusumik akileraartarnermut oqartussaasumut paassisutissanik pissarsiniarsinnaanissaat matumani tunngavissaatitaavoq.

### Imm. 4-mut

Akiliutissamut akiitsulinnut akuersisummit pissarsisinnaanermi periarfissaarutsinissamut aalajangersakkap uuma Naalakkersuisut pisinnaatippai, tassa imaappoq inuit aamma inatsisitigut inuttut isigineqartut akiligassamik akilerneqanngitsumik tamakkiisumik akiliisimanngitsut, aammaarlugu akiligassaq akilerneqanngitsoq matumani erniat ilanngullugit akilerneqanngippata, Inatsisartut inatsisaat una naapertorlugu akuersisummit pissarsisinnaanermut periarfissaarutsinneqaqqipput.

### *§ 16-imut*

#### Imm. 1-imut

Akiliisitsilluni tammajuitsussarsiniarlunilu aallaaniarneq pillugu aalajangersagaq tassaavoq, piniarnermut, aallaaniarnermut aalisarnermullu atatillugu takornariartitsinermik ingerlatsinerup ilagisaa, matumani akiliisitsilluni aallaaniartitsinissamut aalisartitsinissamullu akuersissut immikkut ittoq, inunnut inuussutissarsiutigalugu aamma sunngiffimmi piniarnermut aamma sunngiffimmi aalisarnermut maleruagassanut ilaangitsunut tunniunneqartartoq, tak. §-it 7 aamma 9.

#### Imm. 2-mut

Aalajangersakkap ersarissartussaavaa, akiliisitsilluni piniarneq aalisarnerlu aamma inunnit § 7-imut aamma 9-mut ilaasunit, kisiannili assersuutigalugu uumasunut pisassiiffiusartunut akuersisummit pissarsisinnaanngitsunit atorneqarsinnaasoq. Assersuutigalugu tassaasinnaapput inuit sunngiffimmi piniarnermut allagartaqartut kisiannili Kalaallit Nunaanni ukiuni marlunni aalajangersimasumik suli najugaqarsimamanngitsut.

#### Imm. 3-mut

Akitsuutip akilersinniarnissaanut, inunnit imm. 1-imu aamma 2-mi pineqartut aallaaniarnissamut akuersisummut akiliutissaat, Naalakkersuisut tunngavissaannik aalajangersagaq pilersitsivoq. Akitsuutip angissusissaa Inatsisartut inatsisaat aqqutigalugu aalajangersarneqassaaq.

#### Imm. 4-mut

Akiliisitsilluni aallaaniarnermi peqataasinnaanermut akuersissutip tunniunneqarnera, pissarsiarineqarnera katanneqarneralu pillugit ersarinnerusunik maleruagassanik aalajangersaasinnaanermut Naalakkersuisut tunngavissaannik aalajangersagaq pilersitsivoq, tak. imm. 1 aamma 2. Maleruagassat taakku akiliisitsilluni aallaaniarneq pillugu nalunaarut aqqutigalugu nalinginnaasumik aalajangersarneqartarput.

#### Imm. 5-imut

Naalakkersuisut piumasaqaatit akuersissut aqqutigalugu aalajangersarsinnaavaat, matumani aallaarniarnermik ingerlassat ilai taamaallaat akiliisitsilluni aallaaniartitsisartoq akuerisaasoq peqatigalugu ingerlanneqartarnissaat pillugit piumasaqaatit ilanngullugit. Assersuutigalugu

uumasunik pisassiiffiusartunik immikkuullarissunik imaluunniit nunap immikkoortuani sananeqaatigullu immikkoorutilinni piniarnerusinnaavoq.

#### Imm. 6-imut

Maleruagassanik ersarinnerusunik saqqummiussinissamut Naalakkersuisut tunngavissaannik aalajangersagaq pilersitsivoq, nalinginnaasumik akiliisitsilluni aallaaniarneq aalisarnerlu, akiliisitsilluni aallaaniartitsartutut akuerisatut angusaqarneq annaasaqarnerlu pillugit nalunaarutit aqqutigalugit, matumani akiliisitsilluni aallaaniarnermi angallassisartut atorneqartarnerat ilanngullugu. Tassunga atatillugu piumasaqaatit § 2, imm. 1-imi, nr. 1-6-imilu taaneqartut ilanngunneqassapput, matumani pingaartumik suliffissaqartitsiniarnikkut mianerisassat aamma najukkami atuuttunngortinnissami mianerisassat ilanngullugit. Akiliisitsilluni aallaaniartitsartutut akuerisatut, qinnuteqaateqarnerup kingorna, isigineqarnissaq anguniaraanni piumasaqaatit suut piumasarineqartassanersut kiisalu angallassisartunut piumasaqaatit suut piumasarineqartassanersut taakkulu akiliisitsilluni aallaaniartitsinermut atatillugu qanoq atorneqassanersut ilaatigut nalunaarummi aalajangersarneqartarsinnaapput. Tamatuma saniatigut, akiliisitsilluni aaqqissuisartumut akuersissutip piffissap qanoq ilinerani aamma qanoq iliorluni arsaarinnissutigineqarsinnaaneranut maleruagassat kiisalu angallassisartunik akuersisarnermut maleruagassat pigineqarsinnaapput.

#### Imm. 7-imut

Imm. 4 naapertorlugu aalajangiisinnaanermut oqartussaaffimmik aamma maleruagassanik saqqummiunneqarsimasunik ingerlatsinermik kommuninut tunniussinissamut, aalajangersakkap Naalakkersuisut pisinnaatippai. Ilutigisaanik Naalakkersuisut piginnaatinneqarput, akiliisitsilluni aallaarniarnerup ingerlatsivigneranik isumaginninnerup suliffeqarfinnut aamma takornariartitsinermik peqatigiiffinnut tunniussisinnaanermik.

### *§ 17-imut*

#### Imm. 1-imut

Aalajangersakkap, 1999-imi Inatsisartut inatsisaatigut equnneqartup, Naalakkersuisut tunngavissippai aallaaniarsinnaanermut misilitsinnerup ingerlannissaa pillugu aalajangersakkanik aalajangersaanissamut, tamanna piniarnermut allagartamik imaluunniit akuersisummik §-it 7, 9 aamma 16 malillugit pissarsinissamut piumasaqaatit. Taakku aalajangersakkat ilaatigut aalajangersartussavaat, piniariaatsit suut piumasaqaammut ilaassanersut aamma aallaaniarsinnaanermut misilitsinnerup ingerlannissaanut ersarinnerusumik maleruagassat kiisalu misilitsinnermut suut ilaassanersut.

#### Imm. 2-mut

Aallaaniarsinnaanermut misilitsinnerup ingerlanneqarneranut akiutissamik akiliisitsiniarsinnaanermut aalajangersagaq una atorlugu Naalakkersuisut pisinnaatitsisummik tunineqarput. Aningasat amerlassusissaat aalajangerneqassaaq,

aallaaniarsinnaanermut misilitsinnerup ingerlanneqarneranut aningaasartutissat missingersuusiorfigineqareerpata.

### Imm. 3-mut

Aalajangersakkap Naalakkersuisut pisinnaatippai, aallaaniarsinnaanermut misilitsinnerup ingerlanneqarneranut atatillugu kommunit allaffissornikkut ingerlatsinermik isumaginninnissaannik piumasaqarsinnaanermik. Kommunit atuisunut qaninnerpaajupput, taamaammat ingerlatsineq toqqaannartoq taanna ajunnginnerpaamik taakku isumagisinnaavaat. Aallaaniarsinnaanermut misilitsinnermut maleruagassat pingarnerit, Naalakkersuisunit aalajangersarneqassapput, tak. imm. 1.

### *§ 18-imut*

#### Imm. 1-imut

Imm. 1-imi piniarnerup aallaaniarnerullu maleruagassiorfigineqarnissaa pillugu suliniutinik ingerlatsinissamut Naalakkersuisut pisinnaatinneqarput kiisalu tamanna pillugu maleruagassanik saqqummiussinissamut , tak. nr. 1-4. Suliniutigisat tassaasinnaapput piffissaliunneqartunik nunallu immikkoortuinik allannguinerit imaluunniit uumasoqatigiinnik ataatsinik arlalinnilluunniit imaluunniit nunap immikkoortuini arlalinni piniarsinnaanermik aallaaniarsinnaanermilu unitsitsinerit.

#### Nr. 1

Nunap immikkoortuini ataasiakkaaniittut uumasoqatigiit ataasiakkaat pillugit aalajangersaasoqartapoq, nalinginnaasumik uumasorsiuut siunnersuinerat, eqqissimatisinermi piffissaliussat aamma nunap immikkoortui piniarfígeqqusaanngitsut aallaaniarfígeqqusaanngitsullu malillugit. Tassa imaappoq, nunap immikkoortuanit allamiit nunap immikkoortuanut allamut atatillugu piffissaliussat allaassuteqarsinnaapput, assersuutigalugu piaqqiorneq manniliornerluunniit apeqqutaatillugit, piffissani taakkunani uumasut eqqissimatinneqassapput illersorneqarsinnaasumik piaqqiortoqarnissaa qułakkeerniarlugu.

#### Nr. 2

Taaneqareersutut, nunap immikkoortuani aalajangersimasumi uumasoqatigiinnik aalajangersimasunik piniarneq aallaaniarnerlu unitsivinneqassanersut aalajangersarneqarsinnaavoq, pisassiissutit nungussimappata. Kisianni aamma suliniuteqarnerit allat atorneqarsinnaapput, soorlu pisassiissutinik allannguineq imaluunniit nunap immikkoortuanik atueqqusinnginnej, uumasoqatigiaat naliliivigineqaqqarnerattut taama amerlatiginngitsut paasinarsippat. Piniarnermik aamma piniarnermi ingerlassanik inerteqquteqarneq killilersuinerluunniit, uumasorsiuunit aamma najukkami piniartunit atuisuniillu siunnersuinermik ilaalersitsisinnaapput, kisianni pisanik nalunaaruteqartarneq tunuliaqutaralugu aamma pisinnaallutik.

### Nr. 3

Piffissaq aamma nunap immikkoortui eqqarsaatigalugit pisarineqarsinnaasut amerlassusiinik agguataarisoqartussaatillugu, tamanna pisuussutit piujuartinnissaat piaqqiornissaallu mianeralugit pisassaaq. Piniarnerup aallaaniarnerullu maleruagassiorfigineqarnerani eqqarsaatigineqartariaqarpoq, pisaqarpallaartarnerup akiorniarnissaa killilerniarnissaalu. Tamanna ilaatigut anguniarneqarsinnaavoq, uumasorsiuut innersuussutaannik ilangussinikkut, najukkami ilisimasanik ilangussinikkut imaluunniit Piniarneq pillugu siunnersuisoqatigiinni ilaasortat ilaatinnerisigut.

### Nr. 4-mut

§-it 7, 9 aamma 16 naapertorlugit, piniarnermik aallaaniarnermillu maleruagassat pillugit suliniutit kiisalu pisarineqarsinnaasunut pisassiissutit ersarinnerusumik aalajangersakkanik ilaqartunik pisassiissutit amerlassusiinik agguaassineq pillugu maleruagassat Naalakkersuisut ingerlassinnaavaat, tamanna ukioqatigiaat, kommunit, ingerlatsiveqarfii, angallateqatigiit, angallatit ataasiakkaat, nunakkoorutit imaluunniit piniarnermi atortut piniariaatsillu malillugit.

Tassa imaappoq, assersuutigalugu akuersissutinik agguaassisarnermi immikkut ittumik qassnik ukioqarnissamik piumasaqaat aalajangersarneqarsinnaavoq, tak. §-it 13 aamma 14, kiisalu uumasoqatigiinnut immikkullarissunut pisassiissuteqartoqarsinnaavoq, tamatuma inuuusuttut piniartunngorlaat pisassiissutit ilaannik immikkullarissunik pisaqarsinnaalersissinnaavai, pitsaanererusunik periarfissikkumallugit. Aamma kommuninut immikkullarissumik agguataarinerusinnaavoq ilaatigut uumasoqatigiit amerlassusiat pillugu uumasorsiuut siunnersuinerat aallaavigalugu ilaatigullu inuussutissarsiutigalugu piniarnermik ingerlatsinerup imminut akilersinnaasumik ingerlanissaa qulakeerniarlugu. Angallatit assersuutigalugu arfanniarnermi imaluunniit ataatsimoorluni piniarnermi peqataasinnaasut angissusissaat imaluunniit minnerpaaffissaat pillugit maleruagassanik aamma saqqummiussisoqarsinnaavoq. Taamatuttaaq immikkut ittumik atortoqartunut aamma piniariaaseqartunut immikkut ittumik pisassiisoqarsinnaavoq.

### Nr. 5

Uumasorsiuut siunnersuisarnerat immikkut pingaaruteqarpoq, matuman i suliniutissat aamma uumasut angissusii (piaraaneq), ukiui aamma suaassuseqarneri pineqartillugit, tassa pisuussutit piujuarnissaannut piaqqiornissaannullu tamanna attuumassuteqarmat. Assersuutigalugu uumasut piaqqisartut aallaaneqaqqusaanngillat aamma nanoq apissiminiittoq akornusersoqquaanngilaq. Uumasut piniakkat qanoq angissuseqarnissaat qanorlu ukioqarnissaat pillugit maleruagassanik allanik aamma aalajangersaasoqarsinnaavoq. Kiisalu uumasoqatigiinni suaassuseqatigiit arlaat imaluunniit ataatsimooqatigiit piniagaasinnaanerat inerteqqutaasinnaavoq, tamanna uumasorsiuut siunnersuinerannik imaluunniit najukkami atuisullu ilisimasaannit tamanna pisariaqartutut nalilerneqarpat.

*§ 19-imut*

Imm. 1-imut

Uumasunik piniakkanik assigiinngitsunik piniarsinnaanermut piumasaqaatit pillugit maleruagassanik aalajangersaanissamut Naalakkersuisut tunngavissaannik aalajangersagaq pilersitsivoq, tak. nr. 1-4. Taamaalilluni matumani uumasoqatigiinnut immikkullarissunut tunngatillugu nalunaarutini imaluunniit qulequtanut nalinginnaasunut tunngatillugu nalunaarutini piumasaqaatit Naalakkersuisut aalajangersaaffigisinnaagaat pineqarpoq.

Nr. 1

Inunnut §§-it 7, 9 aamma 16 naapertorlugit piniakkanut suussusersianut piumasaqaatinik equuutsitsisunut, piniakkanik ataasiakkaanik aalajangersimasunik piniarsinnaanerat pillugu piumasaqaatit ersarinnerusut aalajangersaaffignerat.

Assersuutigalugu ukiuni kingullerni marlunni Kalaallit Nunaanni aalajangersimasumik najugaqarnissaq pillugu piumasaqaatinik imaluunniit akiliisitsilluni tammajuitsussarsiniarlunilu aallaaniartitsisartutut suliffeqarfimmik pilersitsinissamut akuerineqassagaanni immikkut ittumik qassnik ukioqarnissamik piumasaqaatinik aalajangersaasoqarsinnaavoq. Matuma saniatigut uumasunut pisassiiffiusartunut akuersisummik pissarsisinnaanermut immikkut ittumik qassnik ukioqarnissamut piumasaqaateqartoqartarpoq. Kisianni piniarneq aallaaniarnerlu pillugit immikkullarissumik ilisimasaqarneq pillugu upternarsaateqarsinnaaneq aamma pineqarsinnaavoq, matumani uumasunik immikkullarissunik toqtsinissaq ilanngullugu.

Nr. 2

Piniarnermi atortunik, piniutinik aamma piniarnermi atortulersuutinik ilusilersuineq atuinerlu kiisalu angallatinik nunakkoorutinillu, aallaasit imassaasa suunerinik imaluunniit piniariaatsinik atuineq. Piniarnermi aallaaniarnermilu atortut, atortulersuutit assigisaalu assersuutigalugu aallaasit, imassat, pisissit, qalut, naalikkat, pullatit, uumasup savinnissaanut, pilannissaanut aggornissaanulluunniit atortut kiisalu uumasup annaannginnissaanut, aggornissaanut assartornissaanullu atortut. Assersuutigalugu aallaasit sakkortussusissaat kaliberit sakkukinnerpaaffissaannik aalajangersaaneq, assersuutigalugu umimmaat, qilalukkat qaqtortat qernertallu aamma aarfit kaliber 30.06 atorlugu piniarneqarnissaat.

"Angallat" imaluunniit "qamutit nunakkoorutit": Suulluunniit imaatigut, nunakkut silaannakkulluunniit assartuutit, piniarnermut, aallaaniarnermut aalisarnermullu atatillugu imaluunniit piniariarfissamukarnermi piniariarfissameereernermermilu assartuutit atorneqartut. Tassa imaappoq, assersuutigalugu umiatsiaaraq 6 meteriusut taassuminngalu mikinerusoq, puisinik timmiarussanillu piniarnermut aallaaniarnermullu atorneqartussaapput imaluunniit assersuutigalugu angallatit anginerusut arfanniarnermut atugassaallutik.

Assersuutaasinnaapput aamma qulimiguullit, qamutit assakaasulli nunakkoorutit, biilit, biilit usisaatit ATV-it, qamuteralaat aamma qimussit. Aalajangersagaq naapertorlugu, taakku atorneqarneranni ilusilersuineq, atuineq killilersuinerlu pillugit maleruagassat aalajangersarneqarsinnaapput.

### Nr. 3

Aallaarniarnermut piumasaqaatit pillugit maleruagassanik aalajangersaanissamut tunngavissaq Naalakkersuisut periarfissariligaat, uumasut assigiinngitsut pillugit nalunaarutini maleruagassatigut piviusunngortinneqassaaq. Angallatinik nunakkoorutinillu, atortunik, atortut ilusaannik, aallaasit imassaasa suunerinik imaluunniit piniariaatsinik aalajangersimasunik atuinissamut inerteqquteqarneq killilersuinerlu. Nr. 2-mi angallatit, nunakkoorutit aamma piniarnermut atortut il.il. allattorneqarnikuupput.

Assersuutigalugu uumasunik timmissanillu ungoorinermut silaannakkut angallatit atorneqarnissaat inerteqqutaavoq aamma qulimiguullit aallaaniarnermut atorneqaqqusaanngillat. Aamma piniarnermut aallaaniarnermullu aallaasit eqittaannartakkat atorneqarnissaat ilaatigut inerteqqutaavoq, taamaattoq qilalukkanik qaortanik qernertanillu piniarneq minillugu aamma pullatit/kiisartut akuerisaanngitsut atorneqarnissaat inerteqqutaavoq.

### Nr. 4-mut

Piniarnermut aallaaniarnermullu atatillugu pissuserissaarnissamut maleruagassanik aalajangersaanissamut Naalakkersuisut pisinnaatinneqarput, ilaatigut tassaasinnaapput inunnut akuersissutit inunnut allanut tunniunneqartussaanngillat, atortinneqartussaanngillat tuniniarneqartussaanatilluunniit.

Assersuutigalugu aamma aallaasit piniarnermut atorneqartut, nakersarneqarsimanissaat akornuteqanngitsuunissaallu pillugit maleruagassanik peqartoqarsinnaavoq. Neqi uumasunit pisarisaneersoq tamakkerlugu pisaqarfiusumiit nassarneqassaaq. Angallassissutit piniarnermut, malersuinermut imaluunniit uumasunik timmissanillu ungoorinermut atorneqaqqusaanngillat. Assersuutigalugu tuttuttuarnermi, umiatsiaaqqaniit, angallatiniit, nunakkoorutiniit, timmisartuniit qulimiguulinniillu igittoqaqqusaanngilaq. Tuttunik umimmannillu piniariarnermi, qimmit nassaqqusaanngillat. Imaluunniit pisanik nalunaaruteqarnermut atatillugu akuersissutinik utertitsinissamik inatsisitigut piumasaqaateqartoqarnera pillugu maleruagassanik aalajangersasoqarsinnaavoq aamma nersutit arnavissat piaqqisartut kiisalu tiggaat tammajuitsussarsiatut piniarneqarnissaat inerteqqutaavoq.

### Imm. 2-mut

Ullumikkut pisat ikkuttakkamik nalunaaqutsernissaannut periutsimik atuisoqanngilaq, aalajangersakkalli pisat ikkuttakkamik nalunaaqutsertarnissaat pillugu maleruagassanik ersarinnerusunik aalajangersaanissamut Naalakkersuisut pisinnaatippai. Tassa imaappoq, inuk piginnaatitaasoq imaluunniit piniartoq piniarnerup kinguninnguani, ikkuttakkamik nalunaaqtsiisummik assersuutigalugu nannup amianut imaluunniit qilalukkap qernertap tuugaavanut ikkussissasoq. Kiisalu qanoq iliorluni nakkutilliinermut oqartussaasup aaqqissuusaq aqutsivigissaneraa, taamaalilluni pisanik atuinermut, tuniniaanermut

tunisinermullu atatillugu uppernarsaammik piumasaqartoqarnerani taanna  
ilaatinneqarsinnaalluni, tak. § 21. Aaqqissuussaq nunani allani atugaavoq, taamaattumillu  
pisanik ikkuttakkamik nalunaaqutsiisarnermut periutsimik pilersitsinissamut taamatuttaaq  
Naalakkersuisut tunngavissaannik atortuulersitsinissaq pissusissamisoortutut isigneqarpoq.

#### *§ 20-mut*

##### Imm. 1-imut

Piniartup uumasoq aallaasimallugu paasiguniuk, aallaaneqarnermi kinguninngua uumasup  
toqunissaa taassuma qulakkiissavaa. Piniartup aallaanialluunniit tamanna akissussaaffigaa  
amma uumasoq aallaaneqarsimanersoq, tamanna pineqartup nammineerluni aamma  
nalornissutigaluaruniulluunniit, pineqartup qulakkeerniartussaavaa.

##### Imm. 2-mut

Uumasoq pissanneqarsimasoq piniartup paasiguniuk, sappinngisamik sukkannerpaamik  
piniartup uumasoq toqussavaa, matuma kingunerisinnaavaa piniartup uumasoq amma  
malersorlugulu ujartariaqaleraa taamaalilluni taanna toqunneqarsinnaaniassammat.

##### Imm. 3-mut

Uumasoq piniartumit ujarneqareeraluarluni nassaarinissaa ajornarpas taamaalillunilu uumasup  
toqunissaa pinngitsoorluni, piniariarnerup naaneranut attuumassuteqartumik, piniartup  
tamanna Aalisarnermut, Piniarnermut Nunalerinermullu Naalakkersuisoqarfimmur  
nalunaarutigissavaa. "Attuumassuteqartumik" ima paasineqassaaq, piniarneq naammassippat  
amma piniartoq sumiiffigisaminut utereerpat, Aalisarnermut, Piniarnermut Nunalerinermullu  
Naalakkersuisoqarfimmur imaluunniit nakkutilliisutut oqartussasumut (KANUAANA-mut  
imaluunniit piniarnermik aalisarnermillu nakkutilliisoq qaninnerpaamut) tamanna  
nalunaarutigineqassaaq. Pineqartup nammineerluni nalunaaruteqarnissamut tassunga  
pisariaqartumik atortussat pigisimangikkunig, pineqartoq kommunip allaffianut  
qaninnerpaamut saaffiginnittariaqarpoq tamannalu aqqtigalugu suliaq nalunaarutigalugu.

##### Imm. 4-mut

Piniartup aallaaniartulluunniit uumasoq pissataq nammineerluni aallaasimangnisani uumasoq  
takuguniuk, sappinngisamik uumasoq nammineerluni toqunniassavaa. Piffissami  
piniarfiunnngitsumi tamanna pisimappat, uumasoq toqunneqarfimminut qimanneqassaaq.  
Inuup pineqartup suliaq Aalisarnermut, Piniarnermut Nunalerinermullu  
Naalakkersuisoqarfimmur imaluunniit nakkutilliisutut oqartussasumut (KANUAANA  
imaluunniit piniarnermik aalisarnermillu nakkutilliisoq qaninneq) pisup kingorna  
nalunaarutigissavaa.

#### *§ 21-mut*

#### Imm. 1-imut

Unioqqutitsilluni pisarisanik tuniniaaneq akiorumallugu, pisat kommunip imaluunniit nunaqarfiup allaffiani nalunaarsorneqarsimassapput aamma allaffiup akuersissut naqissavaa taamaaliornikkut tuniniaavimmi pisat nalunaarsorneqarsimanerat atuarneqarsinnaassammat.

#### Imm. 2-mut

Imm. 1-imut uiggiutigalugu, pisat nalunaarsorneqarsimanerannut upernarsaammik takutitsisinnaaneq pillugu qinnutiginnitoqarsinnaasoq aalajangersakkap aalajangersarpaa. Akuersissut kommunip imaluunniit nunaqarfiup allaffiata naqissusiineranik ilaqartoq takutikkaanni matumani upernarsaatitut naammassaqaq. Atatsimoorluni piniarnermi, akuersissutip naqissusernerata nuutinera atorlugu akuersisummut piginninneqataasut upernarsaasinnaassapput.

#### Imm. 3-mut

Suliffeqarfinnut, paaqqinnittarfinnut neriniartarfinnullu toqqaannartumik tunisineq pineqarsimappat, tamanna inuussutissarsiutigalugu piniartut kisimik taama iliorsinnaapput. Tassunga atatillugu inuussutissarsiutigalugu piniarnermut allagartaq aamma akuersissut imaluunniit akuersissut naqissusigaq atuuttoq takutinnejassaaq, tassani pisat kommunip imaluunniit nunaqarfiup allaffiani nalunaarsorneqarsimasoq upernarsarneqartapoq.

#### Imm. 4-mut

Kingusinnerusukkut nakkutilliinissaq eqqarsaatigalugu, imm. 3-mi taaneqartut suliffeqarfiit, paaqqinnittarfiit imaluunniit neriniartarfiit upernarsarsinnaassavaat, inuussutissarsiutigalugu piniartumit, kommunip aamma nunaqarfiup allaffiani pisanik nalunaarsuititsisimasumit, unioqqutitsinani pisineq pineqartoq.

#### Imm. 5-imut

Aalajangersakkap aalajangersarpaa upernarsaatit pisariaqartut - imm. 4-imu taaneqartut - tassaasut akiligassiissut imaluunniit akiligassaaq atsiugaq kiisalu piniartup inuussutissarsiutigalugu piniarnermut allagartaata atuuttup nuutinera aamma akuersisummut kommunip imaluunniit nunaqarfiup allaffiata naqissusiinerata nuutinera.

#### Imm. 6-imut

Piniartut inuussutissarsiutigalugu piniarnermut allagartamik atuuttumik aamma akuersisummut naqissusiitsimasut imaluunniit akuersisummit peqartut kisimik assersuutigalugu nannut amianik, niaquanik, kukiunik aamma aqajaruanik tunisisinnaapput. Qilalukkap qernertap tuugaava mattalu aamma orsua imaluunniit assersuutigalugu umimmaap amia, qiviui, niaqua, nassui neqaalu. Immikkoortut taakku tamakkerlutik immikkut akuersissutip normuanik allagarserneqassapput, taamaaliornikkut pisat unioqqutitsinani aamma immikkoortut tamakkerlutik immikkut nalunaarsorneqarnerisa upernarsarnissaat qulakkeerneqassaaq.

Pisat immikkoortui taakku pisiniarfiiut tuniniaqqissinnaavaat, matumani akiligassiissut akiligassarluunniit atsiugaq kiisalu piniartup inuussutissarsiuutigalugu piniarnermut allagartaata attuuttup nuutinnera aamma kommunip imaluunniit nunaqarfiup allaffiata akuersisummut naqissusiinerata nuutinnera takutissinnaagunikku. Immikkoortut taakku arlaqartut CITES-imi maleruagassanut ilaapput (Washington-imi isumaqatigiissut), taamaammat isumaqatigiisummik atuutsilfersimasunut immikkoortumik/nik nunanut tamanut eqqussinermi, pisisup pisiarisimasaq unioqquitsinngitsumik pisiarinninneq, annissineq eqqussinerlu pisimasup upternarsarsinnaasussaavai.

#### Imm. 7-imut

Imm. 6-imi taaneqartutut, mattak, orsoq, ameq, niaqoq, nassuit, saarngit, kukiit, kigutit aamma aqajaroq tuniniassallugu inerteqquaavoq, aatsaalli pineqartoq inuussutissarsiuutigalugu piniarnermut allagartamik atuuttumik aamma akuersisummut naqissusikkamik paarisaqarpat taama pisoqarsinnaavoq.

Imm. 7 naapertorlugu, unioqquitsilluni piniarnermi pisat ilaannik pisinissaq imaluunniit tigusinissaq inerteqquaavoq. Unioqquitsilluni pisat ilaannik pisineq imaluunniit tigusineq, CITES-imut pingarnertut ilaasunik, pinerluttuliorneruvoq. Suliaq pinerluttulerinermut inatsisip § 111-ata naleqataanik eqqartuussissutigineqassaaq, taamaammat inummut ilaquattamiit imaluunniit aapparisamiit nalinginnaasumik nerisassatut tigusisumut imaluunniit nioqquitsanut, atortussianut imaluunniit kiffartuussinernut nalinginnaasumik akissarsiatut pissarsianik tigusisumut, pinerluttulerinermut inatsit malillugu akisussaatitsisoqarsinnaanngilaq, tak. pinerluttulerinerut inatsimmi § 111, imm. 2.

#### § 22-mut

#### Imm. 1-imut

Inuussutissarsiuutigalugu piniartup uumasumik pisarisimasaminik iluitsumik ilaanilluunniit sumut tunisisinnaaneranut piumasaqaatinik, akuersisummut ilaasunik aalajangersaanissamut tunngavissamik aalajangersagaq oqartussaasunut periarfissiivoq, tassa imaappoq Naalakkersuisunut imaluunniit kommunimut. Assersuutigalugu tassaasinnaavoq neqaarniaq imaluunniit tunitsivik, Kalaallit Nunaanni nerisassanut oqartussaasunit akuerisaasoq – Kalaallit Nunaanni Uumasunut Nakorsaqarnermut Inuussutissalerinerellu Oqartussat (UNIO). Aamma assersuutigalugu inuussutissarsiuutigalugu piniartoq tunisinissamut akuersisummut atuuttumik peqarnissaa pillugu piumasaqaatinik aalajangersaasoqarsinnaavoq.

#### Imm. 2-mut

Sunngiffimmi piniartut kalaalimineerniarfinni tuniniaasinnaanerat tunisarnerallu pillugit apeqquut najukkami kommunimi oqartussaasunit aalajangiiffigineqassapput. Assersuutigalugu sunngiffimmi piniartut tuttamik neqaannik imaluunniit puisitamik

neqaannik orsuanillu kalaalimineerniarfimmut tunisisinnaanerannut akuersissutaasinnaavoq. Maleruagassat assingi suli eqquutsinneqartussaapput, imm. 1-im iamma § 21, imm. 3-mi taaneqartut. Tassa imaappoq, uppernarsaateqarnissaq pillugu piumasaqaatit assingi atuupput. Inuussutissarsiutigalugu piniarnermut allagartaq atuuttoq aamma akuersissut imaluunniit akuersissut naqinnejqarsimasoq, kommunip imaluunniit nunaqarfiup allaffiani nalunaarsorlugu uppernarsagaq, takutinnejqartussaapput.

#### Imm. 3-mut

Inuussutissanik (tunisassiat suliareriikkat) tuniniaaneq pineqartillugu Naalakkersuisut inuussutissalerinermut oqartussaasuata maleruagassiai sukkulluunniit atuuttut kalaalimineerniarfiup eqquutsittussaavai, tassa imaappoq inuussutissalerinermut nalunaarut (Suliffeqarfuit inuussutissaleriffiusut pillugit Namminersornerullutik Oqartussat nalunaarutaat nr. 21, 27. juli 1998-imeersoq).

Taamatuttaaq piffissami piniarfiusup akuerisaasup ingerlanerani taamaallaat uumasunik kalaalimineerniarfimmi tuniniaasoqarsinnaavoq. Piffissami piniarfiusumi tessani piniartumut pineqartumut atuuppoq, inuk taanna inuussutissarsiutigalugu imaluunniit sunngiffimmi piniartuussasoq, tassa inuussutissarsiutigalugu piniarnermut aamma sunngiffimmi piniarnermut piffissaliussat assigiinngissinnaammata. Tamatuma saniatigut piffissaliussap qaanngiunnerata kingorna ulluni pingasuni tuniniaasinnaaneq akuerisaavoq. Assersuutigalugu piffissaq piniarfiusoq ulloq 31. oktober killeqarpat ulloq 3. november tikillugu tuniniaasoqarsinnaavoq. Taamaattorli uumasut aalajangersimasut mininneqarsinnaapput, assersuutigalugu arferit angisut neqaannik, mattaannik orsuanillu tuniniaanermi.

#### Imm. 4-mut

Suliareqqiinermut, atuinermut, tuniniaanermut aamma pisanik tunisaqarnermut, nalinginnaasumik nalunaarutitut isikkulinnik, sukumiisuusunik maleruagassanik Naalakkersuisut aalajangersaasarnissaannut tunngavissamik aalajangersagaq pilersitsivoq. Tamatuma peqatigisaanik unioqqutitsisumik pisat imaluunniit imminut illersorniarluni uumasut pisat ilanggarneqanngitsut ilanggarneqarsimasulluunniit, pisortat suliffeqarfutaannut aamma najukkami innuttaasunut agguanneqarsinnaanerat aalajangersarneqarsinnaavoq. Assersuutigalugu taanna tassaasinnaavoq utoqqaat illuat, inunniq isumaginninnikkut paaqqinnittarfik, atuarfik imaluunniit meeqquerivik il.il.

#### Imm. 5-imut

Pingarnertut tunissiortunut pikkorissartitsisoqartarnikuovoq, § 3, nr. 12-im iomi oqaasertalerneqartumik, inuussutissaqarnikkut sillimaniarnerup qaffaaffiginissaa siunertalarugu. Tamanna tunuliaqtaralugu, pingarnertut tunissiortunut pikkorissartitsisarnissanut maleruagassat Naalakkersuisunit aalajangersaaffigineqarsinnaanerannut tunngavissamik kiisalu suliffeqarfinnut, paaqqinnittarfinnut neriniartarfinnullu toqqaannartumik tunisisinnaanermut piumasaqatitut

pikkorissarsimanissap piumasaqaatiginissaanut aalajangersagaq pilersitsivoq, tak. § 21, imm. 3-6.

*§ 23-mut*

Imm. 1-imut

Ataatsimoorluni piniarnermut, nalinginnaasumik assersuutigalugu arfanniarnermi, ataatsimoorluni piniartoqartillugu uumasut pillugit nalunaarutini immikkoortumiittartunik, maleruagassanik aalajangersaasarnissamut Naalakkersuisut tunngavissaannik aalajangersagaq pilersitsivoq.

Imm. 2-mut

Ataatsimoorluni piniarnermut aqutsisussamik toqqaanissamut Naalakkersuisut peqatigiiffit kattuffiillu pisussaatissinnaavaat, assersuutigalugu aalisarnermut pinianermullu peqatigiiffit KNAPK aamma SQAPK. Qoorortooq atorlugu tikaagullinniarnerup saniatigut piniagassanik allanik piniaqatigiittooqarsinnaammat ataatsimoorluni piniaqatigiinnernut tamanut siunnersuut atuuppoq. Taamaalilluni ataatsimoorluni piniarnermi peqataasut akuersissummilu taaneqartut tamarmik, soorlu miluumasunik imarmiunik nunamiunilluunniit, ataatsimoorluni piniarnermi aqutsisussamik toqqaasinnaassapput. Piniarnerup ingerlanneqarnerani peqataasut sinnerlugit, piniarneq, pisat agguarneqarnerat pisallu nalunaarutiginissaat aqutsisup toqqarneqarnermigut aqutsisuuffigissavai.

Imm. 3-mut

Aqutsisumik toqqaasoqalersillugu, ataatsimoorluni piniarnermut peqataasinnaanermi, peqataasut allat assigalugit piumasaqaatit aqutsisup eqquutsittussaammagit ilanngullugu eqqarsaatigineqartassaaq, tamatumani assersuutigalugu inuussutissarsiutigalugu piniarnermut allagartaq aamma akuersissut pineqarpoq.

Imm. 4-mut

Inatsisartut inatsisaanni uani maleruagassanik eqquutsitsinissamut kina akisussaasuussanersoq ersersikkumallugu aalajangersagaq una atuutilersinneqarpoq, matumani ilaatigut piniarnerup ingerlanneqarnera aamma maleruaqqusanik eqquutsitsinissaq kiisalu ataatsimoorluni piniarnerup naammassinerata kingorna nalunaaruteqarnissaq pillugu apeqqut ilanngullugit. Taamaalilluni maleruagassat eqquutsinneqarnissaannut peqataasut tamakkerlutik akisussaasuunissaat naqissuserneqarpoq, matumani nassuiarneqarsimasutut piniuit atorneqartut imaluunniit piniarnerup kingorna nalunaaruteqarnissaq pillugit apeqqutit pineqaraluarpataluunniit. Soorluttaaq oqaasertaliussami § 3, nr. 3-miittumi atuarneqarsinnaasutut, piniarnermi aallaaniarnermilu peqataaneq tassaavoq, pineqartup aallaammik imaluunniit piniutinik allanik atuinermigut uumasumik susinnaajunnaarsitsinera, ikiliinera toqtsineraluunniit.

Paarlattuanik inuk angallammik nunakkoorummilluunniit ingerlatsisoq tassunga ilaatinneqanngilaq, taamaammat inuk taanna aamma akisussaatinneqarsinnaanngilaq imm. 4 naapertorlugu.

#### § 24-mut

##### Imm. 1-imut

Piniarnermut aallaaniarnermullu angallatit nunakkoorutillunniit motorillit atorneqaqqusaanngitsut pillugit allattukkanik peqarpoq, tassa imaappoq timmisartut, qulimiguullit aamma nunakkoorutit motorillit, matumani qamuteralaat ATV-illu kiisalu angallatit takissuseq pillugu allagartartik malillugu 15 meterimik takinerunngitsut ilanngulligit tamakkulu ilassutissaqartuarput. Pingarnerli tassaavoq, nunakkoorutit angallatillu motorillit pineqarmata. Kisianni aamma angallatit tissiartaatit ilaapput, taakku tamakkiisumik ilaannakuusumilluunniit motorimik ingerlanneqartussatut atortulerneqarsimappata.

Paarlattuanik qaannat qimussilluunniit matumani pineqanngillat taakku motoreqanngimmata taamaattumillu piniarnermut aallaaniarnermullu atorneqarsinnaallutik.

Tammaarsimaarsimaarfiliarnermut tassanngaanniillu uternermut angallassissutit motorillit atorneqarsinnaapput, kisianni piniariarfiusumit uumasut pisat assartoqqinnerannut taama ittoq atorneqaqqusaanngilaq. Uumasut minnerpaamik 500 meterinik ungasississuseqarfigineqassapput. Pisunili assersuutigalugu sikukkut ammanersami (sassani) arfernut pisanut tamanna atutinngilaq.

Uumasunut pisassiiffiusartunut immikkuullarissunut angallatit angissusissaat pillugit minitat eqarsaatigalugit, pingartumik arferit angisuut pineqartarput taamaammat aamma angallatit anginerusut atorneqarsinnaapput.

Piniarnermi aallaaniarnermilu drone-t atornissaat inerteqqutaavoq. Tassa imaappoq, piniarnerup aallaaniarnerullu ilaatut, sumiissusersiniaanermut, malersuinermut, ungoorinermut, katersinermut imaluunniit allatut drone-t atorneqaqqusaanngillat.

##### Imm. 2-mut

Piniariaatsit ilaat uumasunik pisariaqanngitsumik naalliutsitsisinnaasut inerteqqutaanerat aalajangersakkap naqissuserpaa. Allattukkani killeqanngiusattuni taaneqarput toqunartut, aallartoorneq, kiisartut, ningarniutit imaluunniit teknikkikkut atortulersuutit allat uumasunik piniakkanik uninngatitsisinnaasut. Paarlattuanik nunap ilaani aalajangersimasuni timmissat ilaat aalajangersimasut qalut atorlugit pisarineqarsinnaapput, assersuutigalugu appaliarsuit. Matuma saniatigut International Standardization Organisation-imit akuerineqarsimasut piniutit atorneqarsinnaapput.

Uumasut piniakkat imarmiut eqqarsaatigalugit, assersuutigalugu puisit arferillu, tuukkamik avatalikkamik assingusumilluunniit atortulikkamik atuilluni uninngatinneqarsinnaapput, taamaalilluni uumasoq piniagaq kivinnginniassammat annaaneqarlungilu.

#### Imm. 3-mut

Piniarnermi aallaaniarnermilu aallaasit eqqarasuartaatit eqittaannartakkallu atorneqarnissaannut inerteqquteqarneq 1993-mili eqqunneqarpoq. Inerteqquteqarneq taanna uumasunut piniakkanut tamanut atuuppoq, matumani mininnejarsinnaasut pillugit ersarissumik allanneqarsimasut minillugit, tak. imm. 4.

#### Imm. 4-mut

Imm. 3-mi taaneqartutut, § 7, imm. 2 malillugu inuussutissarsiutigalugu piniarnermut allaaniarnermullu aallaasit eqittaannartakkat atorneqarsinnaanerannut inerteqquteqarnermit Naalakkersuisut minitaqarsinnaapput, uumasut piniakkat aalajangersimasut, nunap immikkoortuanut aamma piffissaliussat ilaannut. Qilalukkanik qaortanik qernertanillu inuussutissarsiutigalugu piniarnermut atatillugu tunngavissaq taanna taamaallaat atorneqarpoq, tak. § 12, Qilalukkanik qaortanik qernertanillu illersuineq piniarnerlu pillugit Namminersorlutik Oqartussat nalunaarutaat nr. 3, 27. januar 2017-imeersumiittoq. Kisianni inuit inuussutissarsiutigalugu piniarnermut allagartallit kisimik aallaasinik eqittaannartakkanik atuisinnaatitaapput.

#### Imm. 5-imut

Piniariaatsinut inerteqqutaasunut tunngatillugu imm. 2-mut atatillugu ajunngitsumik killiliinertut, uumasoqatigiinnik ataasiakkaanik piniarnermi piniutit suut atorneqarsinnaanerannut kiisalu periutsit suut atorneqarsinnaanersut matumani aallaasit sakkukinnerpaaffissaat kaliber suussanersoq kiisalu imassat suussusissaat qanorlu angitiginissaat pillugit maleruagassanik aalajangersaanissamut Naalakkersuisut tunngavissaannik aalajangersagaq una pilersitsivoq. Piumasaqaatit taakku uumasut pillugit nalunaarutini soqtiginaatilinni aalajangersarneqassapput.

Assersuutigalugu umimmanniarnermi sakkukinnerpaamik kaliber 6,5x55-iussaaq paarlattuanilli tuttunut kaliber .222-jussalluni. Imassanut piumasaqaat aalajangersarneqarsinnaavoq, taamaalilluni qulakteerneqassammat uumasoq sukkesumik pinasuartumillu aamma naalliunnanginnerpaamik toqunneqarsinnaaniassammat. Assersuutigalugu pisissip qarsullu ilusilorsornerannut tamanna aamma atuuppoq.

#### Imm. 6-imut

Aalajangersakkap siunertaraa ilaatigut pisuussutinik asiutitsinissap pinngitsoortinnissaa, ilaatigut pissuserissaarnikkut mianerisassanik eqquutsitsinissap qulakteernissaa matumani pisarisap neqaa, amia, orsua atorneqarsinnaasortaalu allat pisqaarfimmiiit angerlaaneqassapput qimatulineqarlungilluunniit (tassa imaappoq piniarfigisami toqqorneqarneri, kingusinnerusukkut aaneqartussanngorlugit). Piniariarfíup pilaffiulluunniit qimannissaa

sioqqullugu perlukut sapinngisamik peerneqassapput. Tamanna aamma pissaaq, uumasut kiisortut ornigussinnaanerat, matumani pingartumik nannut illoqarfiup nunaqarfiullu eqqaanukarnissaat pinngitsoorniarlugu.

#### *§ 25-mut*

##### Imm. 1-imut

Inatsisartut inatsisaat una malillugu maleruagassanik, allaffissorneq ilanngullugu, ingerlatsinerup ilanik isumaginninnissaq kommunimut peqqussutigineqassanersoq pillugu maleruagassanik aalajangersaanissamut aalajangersakkap Naalakkersuisut pisinnaatippai.

Taamaalilluni uumasoqatigiinnik nujuartanik imaluunniit nunap immikkoortuanik nujuartanik uumasulimmik ingerlatsinissamut tunngatillugu, akisussaaffimmik pisinnaatitsinermillu kommunimut tunniussisinnaanermut Naalakkersuisut pisinnaatinneqarput, matumani aalajangiisinjaaneq ilanngullugu assersuutigalugu kommunip ingerlatsiveqarfiani pisassiissutit aalajangersarnejarsimasut agguataarneqarnissaannut tunngasut aamma nalunaarutinik tigusereernermei akuersissutinik agguassineq imaluunniit kommunip ileqqoreqqusaa aqqutigalugu najukkami ingerlatsinissamik suliassat allat. Naalakkersuisut tassaapput kisimiillutik suli pisassiissuteqarnermi aalajangiisartutut oqartussaasut.

##### Imm. 2-mut

Pisassiissutit atorneqanngitsoornikut agguateeqqinnissaannut akisussaaffik pisinnaatitaanerlu kommuninut tunniunneqarnissaannik aalajangersakkap Naalakkersuisut pisinnaatippai. Tassa imaappoq, pisarineqartunik pisassiissutaasimasunik nalunaarsuisup kommunip pineqartup aamma pisassiissutinik imaluunniit akuersissutinik agguasseqqinnissamut akisussaaffik tigussavaa, taakku atorneqarsimanngippata. Tunniussineq assersuutigalugu aamma pisuni piniartup ataatsip imaluunniit arlaqartut akuersissummik atuisinnaajunnaarnerani pisinnaavoq, taamaalilluni allanut agguassisoqarsinnaassamat.

##### Imm. 3-mut

Naalakkersuisut pisinnaatinneqarput, Piniarneq pillugu Siunnersuisoqatigiinnut kattuffinnullu allanut soqtiginaateqartunut soorlu assersuutigalugu KNAPK-mut aamma SQAPK-mut tusarniaanerup kingorna, nunap immikkoortuanik killeqarfiliikkamik ingerlatsinermut akisussaaffiup pisinnaatitaaffiullu tamakkiisup ilaannakuusulluunniit kommunip ingerlatsivianut tunniussisinnaanermut, matumani aalajangiinerit pingarnerit suli Naalakkersuisunit aalajangiiffigineqartassallutik.

##### Imm. 4-mut

Kommunit ingerlatsiviinut tunniussinermut atatillugu piumasaqaatinik aalajangersaanissamut Naalakkersuisut pisinnaatitaapput. tak. imm. 3. Tunniussineq nalunaarut aqqutigalugu pissaaq

tunniussinermullu atatillugu piumasaqaatitut kissaatigineqartut aammattaaq nalunaarummi atuarneqarsinnaassapput.

#### Imm. 5-imut

Kommuninut akisussaaffimmik pisinnaatitaanermillu tunniussineq pillugu nalunaarummi maleruagassat Naalakkersuisut aalajangersareerpatigit, suliassaqarfimmut pineqartumut ingerlatsineq pillugu kommunip ileqqoreqqusaaq kommunalbestyrelsi suliaqassaaq.

Kommunip ileqqoreqqusaa Naalakkersuisunit atuuttunngortinnejarlunilu saqqummiunneqassaaq.

#### *§ 26-mut*

#### Imm. 1-imut

Ilisimatusartut misissuisinnaanerannut akuersissummik, matumani aalajangersagaq una tunngavigalugu uumasunik timmissanillu piniarneq aallaaniarnerlu aqqutigalugit, tunniussisinnaanermut aalajangersakkap Naalakkersuisut pisinnaatippai. Taamaalilluni Inatsisartut inatsisaanni maleruagassat avaqqunneqarsinnaapput, ilisimatusarnermi misissuinerup ilaatum uumasunik pisaqarniarneq, misiligtissanik tigusiniarneq, kisitsineq, misissuineq aamma misissueqqissaarineq il.il. siunertaralugit.

Tamatuma saniatigut nunap immikkoortuinut eqqissisimatitanut appakaassinnaaneq aamma akuerneqarsinnaavoq, matumani qeqertat ilanggullugit, nunap piniagassatigut pisuussutaanik sumiissusersiniarneq imaluunniit ilisimatusarnermi misissuinissaq siunertaralugu.

Taamatuttaaq akuersissummut ilisimatusarnermi suliniutinut drone-t atorneqarsinnaanerat ilaavoq. Oqartussaasut akuersissutaat allat, Aalisarnermut, Piniarnermut Nunalerinermullu Naalakkersuisoqarfiup oqartussaaffittut suliassaqarfiinut ilaannngitsut, soorlu Pinngortitamut, Avatangiisut Ilisimatusarnermullu Naalakkersuisoqarfimmit aamma Kalaallit Nunaanni Uumasunut Nakorsaqarnermut Inuussutissalerinermullu Oqartussaqarfimmit, Inuussutissarsiornermut Nukissiuuteqarnermullu Naalakkersuisoqarfimmit oqartussaasutut akuersissutit, oqartussaasuniit taakkunannga pissarsiarineqassapput.

#### Imm. 2-mut

Uumasoqatigiinnik nujuartanik illersuumalluni, uumasoqatigiinnik attuumassuteqarsinnaasunik toqutsisinnaanermut maleruagassanik aalajangersaasarnissamut aalajangersagaq Naalakkersuisunut tunngavissamik pilersitsivoq. Assersuutigineqarsinnaavoq timmissanik, uumasumit kiisortumit nunap immikkoortuanittoqarnera patsisigalugu ulorianartorsiortunik illersuinissaq siunertaralugu ukioq tamaat uumasunik kiisortunik pinarsinnaanermut akuersissut.

#### *§ 27-mut*

#### Imm. 1-imut

Uumasunik nujuartanik angalaarsinnaajunnaartitsineq, ungoorineq, suliaqarneq aamma pinngortitamut inissiineq kiisalu aallaaniarsinnaaneq imaluunniit allatut inuussutissarsiutigalugu atuinissaq siunertaralugu uumasoqatigiaanik piulersitsinissaq siunertaralugu uumasunik pinngortitamut inissitanik ingerlatsineq pillugit maleruagassanik aalajangersaanissamut aalajangersagaq Naalakkersuisunut pisinnaatitsivoq. Siusinnerusukkut tuttunut umimmannullu nujuartanut atatillugu pisareersimavoq, nunap ilaanut allamut nuussinikkut matumalu kingorna uumasoqatigiit nutaat piuersimallutik.

Piniarnermi aallaaniarnermilu periutsit pillugit maleruagassat suli atuupput, kisianni angalaarsinnaajunnaartitsineq ungoorinerlu, uumasunik timmissanilluunniit ajoqsiisuunngitsumik, pullatit qalullu atorlugit pisartussaavoq. Inuussutissarsiutigalugu atuineq alla eqqarsaatigalugu, assersuutigalugu uumasuuteqarnissaq tunisisinnaanerlu siunertaralugit nerlernik nujuartanik ungoorisqarsinnaavoq suluinillu killuisoqarsinnaalluni.

#### *§ 28-mut*

Imm. 1-imut

Pisat qassiuneri il.il. pillugit paasissutissat sorliit inuussutissarsiutigalugu aamma sunngiffimmi piniartut nalunaarutigisassaneraat pillugit, maleruagassanik aalajangersaanissamut aalajangersakkap Naalakkersuisut tunngavissippai. Paasissutissat Piniarneq aamma piniarnermut allagartamut atortulersuut aqqutigalugit nalunaarutigineqassapput. Atortulersuutini taakkunani pisat qassineri pillugit paasissutissat nalilergassanngorlugit katarsorneqartarput aamma qanoq annertutigisumik pisuussutitit atorneqarnerat pillugu paasissutissat atuisunut ingerlateqqinnejartarput.

Tamatuma saniatigut uumasunit pisanit uumasorsiuut misissugassaat tunniunneqartussaapput. Suut nassiunneqartussaanerannik nassuaatit akuersissummi allallugit ilanngunneqartarput. Assersuutigalugu imaassinnaavoq nannup oqaata isuata ilamernga. Uumasorsiuut misissugassaat kommunip imaluunniit nunaqarfiup allaffianut tunniunneqassaaq, Pinngortitaleriffimmut ingerlateqqinnejarnera tassanngaanniit isumagineqassaaq.

Imm. 2-mut

Inuup ataasiinnaap ataatsimoorluni piniarnermi pisanik nalunaaruteqartussaanera qulakkeerumallugu, aalajangersakkap aalajangersaavigaa ataatsimoorullugu pisanik aqutsisoq nalunaaruteqarnissamut akisussaasusoq aamma pisaqaqataasut allat aqqi inuttullu normui, nalunaarutip mumingani allanneqassasut. § 23, imm. 4 naapertorlugu ataatsimoorluni piniarnermi peqataasut tamarmik, nalunaaruteqarnissamut aamma Inatsisartut inatsisaannik uannga equuutsitsinissamut akisussaasummata oqaatigineqassaaq.

#### *§ 29-mut*

Imm. 1-imut

Uumasumik nalunaaqutsikkamik, radiokkut imaluunniit qaammataasakkut nassitsissutilikkamik pisaqaraanni nassaaraanniluunniit inuk pineqartoq taakkuninnga Pinngortitaleriffimmut nassiuussinissaminut pisussaatitaavoq, tassunga ilanngunneqassaaq paasissutissiissut uumasoq sumi qangalu pisarineqarsimanersoq imaluunniit nassaarineqarsimanersoq. Nanoq qarlumigut allikkut kisitsimmik kakiornermik peqarsimappat, kisitsit allanneqassaaq Pinngortitalerivimmullu nassiunneqassalluni, uumasoq sumi qangalu pisarineqarsimanersoq nassaarineqarsimasorluunniit pillugu paasissutissamik ilaqaqtillugu. Atortulersuutit taakku kommunip imaluunniit nunaqarfiup allaffianut tunniunnerisigut tamanna pissaaq.

#### *§ 30-mut*

##### Imm. 1-imut

Uumasut kiisortut illoqarfinnut nunaqarfinnullu appakaannertik pissutigalugu, inunnut uumasuutinut, allanullu uumasunut pigisanulluunniit pigisaallu ilaannut uloriarnartorsiortitsisinnaasut, toqunneqartarnissaasa pinngitsoortinnissaat aalajangersakkap siunertaraa. Taamaammat uumasut kiisortut qammarneqarnissaannut, ujartornissaannut, malersornissaannut imaluunniit allatut akornusersornissaannut taamaalillutillu inunnut, uumasuutinut uumasunulluunniit allanut ulorianartorsiortitsisinnaanerat akornutaasinnaaneralluunniit imaluunniit pigisanut pigisalluunniit ilaannut ajoqusiisinnaanerat piunnginniassammat.

Matumani pingaartumik nannut, amaqquq teriannialluunniit eqqarsaatigineqarput kisianni allattorneqarsinnaasut killeqarput. Qammarpaa allanneqaraangat, assersuutigalugu tamanna neqip aapasup imaluunniit neqip panertup tikkanik tamanna illoqarfiup nunaqarfiulluunniit avataatugaani qimanneqarsimasumit pisinnaavoq. Akerlianilli eqqaavissuit ammaannartut eqqarsaatigineqanngillat, najugaqarfiusut ilagisaat pingaaruteqartut. Assersuutigalugu nannunik ujartuineq malersuinerluunniit eqqarsaatigalugit, pissutsit imaassinggaapput inuit nannumik takunnikkusuttu taamaanneranilu taanna inunnut navianarsinnaavoq imaluunniit ingerlavimminik allannguisinnaavoq inoqarfiusullu tungaanut ingerlalerluni, taamaanneranilu inunnut allanut ulorianartorsiortitsisinnaalluni.

##### Imm. 2-mut

Pissutsit imaassimasingaapput uumasumik kiisortumik ujartuinissaq pissusissamisoorluni, taamaammat aalajangersagaq inerteqquteqarnermit imm. 1-imiittumit minitsisoqarnikuuvvoq, pisuni inoqarfiusup eqqaani akuerineqartumik piniarnermut imaluunniit uumasumik kiisortumik qimaatitsiniarnermut atatillugu tamanna pisimappat, tam. imm. 1 aamma 3.

##### Imm. 3-mut

Inunnut nannumik qimaatitsiniarsarisunut akornutaasumik imaluunniit pinngitsoortitsisumik inuit assersuutigalugu nannumik takunnikkumallutik ussagarfigisinnaasaannik

piulersoqarnissaa aalajangersakkap pinngitsoortittussaavaa. Inuit nannumut qanillivallaarsimammata, tamanna aamma nannup toqunneqarneranut patsisaasinnaavoq.

Inerteqquteqarneq pisunut politiit, nakkutilliinermik oqartussaasoq, kommunefogedit imaluunniit inuit oqartussaasuneersut allat uumasumik kiisortumik qimaasaaralutik sulinerannik pinngitsoortitsisunut akornusersuisunulluunniit tunngasuuvooq. Immikkoortoq inoqarfiusoq imaluunniit taassuma eqqaatungaaniittooq matumani pineqartussaavoq. Eqqaatungaaniinneq tassaasinnaavoq 2 kilometerisut ungasitsigisoq qaninnerusorluunniit aamma taanna savaateqarfimmait ungasissusigineqartussamut 2 kilometeriusumut ilaavoq.

#### Imm. 4-mut

Piniarnermi drone-t atorneqarnissaannut inerteqquneqarnerup assigisaatut, tak. § 24, imm. 1, uumasut kiisortut filmiliarinissaannut allatulluunniit malersornissaannut drone-t atornissaat inerteqquataavoq. Taamaattorli minississutigalugu uumasunut kiisortunut qimaasaarutitut imaluunniit ilisimatusarnermi misissuinermermi atortutut drone-t atorneqarnissaat akuerisaavoq.

#### Imm. 5-imut

Uumasunik akornutaasunik, inuit inuunerri, peqqissusii pigisaalu, pisortat pigisaat kiisalu angallannikkut attaveqaateqarniarnikkullu pissutsit illersorniarnerannut tamanna pisimappat, qimaasaarinermut toqtsinermulluunniit ersarinnerusunik maleruagassanik aalajangersaanissamut Naalakkersuisut tunngavissaannik aalajangersagaq pilersitsivoq. Malittarisassat taakku nalinginnaasumik nalunaarutit aqqutigalugit aalajangersaavigineqassapput.

### § 31-mut

#### Imm. 1-imut

Inuk pigisalluunniit illersorniarlugit uumasoq toqunneqarsimappat, pinerluttaalisitsinermi inatsisip maleruagassai naapertorlugit, taava uumasoq tamakkerlugu Namminersorlutik Oqartussat pigivaat. Aalisarnermut, Piniarnermut Nunalerinermullu Naalakkersuisoqarfik tassaavoq, uumasup taassumalu immikkoortuisa suneqarnissaannik aalangiisussaq. Nalinginnaanerpaamik pisortat suliffeqarfiutaannut neqi agguanneqartussaavoq assersuutigalugulu nanoq pineqarsimappat, taasuma niaqua, kukii amialu naalakkersuisoqarfimmut nassiunneqassapput.

Imminut illersorneq pillugu maleruagassat pinerluttulerinermut inatsimmi § 9-i allassimapput. Matuma kingorna inunnut imminut illersorniarlutik iliuuseqarsimasunut, pinerluttulerinermi inatsimmi pineqaatissiissutaasinaasut atuutissanngillat. Saassunneqarneq imaluunniit pissutissaqanngitsumik saassunneqarluinnalerneq akiorniarlugu imaluunniit pinngitsoortinniarlugu iliuuseqarnerit pisariaqartut pisimappata aamma taamaaliorneq saassussinerup navianassusianut, saassussisup inuttaanut saassunneqartullu inatsisitigut illersugaanerata pingaaruteqassusianut naleqqiullugu illersorneqarsinnaavoq.

Naak isumaqartoqaraluartoq uumasoq pissusissamisuunngitsumik saassussisinnaanngitsoq, aalajangersakkap taassuma inatsisartut inatsisaanni matumani atorneqarsinnaanera pingartuuvoq, taamaalluni uumasoq saassussisoq taassumalu ulorianassusaa.

Ajornartorsiornermi pisinnaatitaaffik pillugu maleruagassat pinerluttulerinermut inatsimmi § 10-mi allassimapput. Matuma kingorna Inatsisartut inatsisaata pineqaatissiissutissatai atutissanngillat, inunnut imaluunniit pigisanut ulorianartorsiortitsisunik pisariaqartumik pinngitsoortitsiniarlutik iliuuseqarsimasunut inunnut, matumani inatsisinik unioqqutitsineq annertunerusumik kinguneqartussatut isigineqarsinnaasimappat.

#### Imm. 2-mut

Inuit ajornartorsiornermi pisinnaatitaaffik imaluunniit imminut illersorneq atorlugu uumasumik toqutsisimasut, periarfissaq siulleq atorlugu Aalisarnermut, Piniarnermut Nunalerinermullu Naalakkersuisoqarfik attaveqarfingissavaat. Tassunga atatillugu uumasup taassumaluunniit ilamernga suneqassanersoq naalakkersuisoqarfiup ilisimatitsissutigissavaa.

#### *§ 32-mut*

#### Imm. 1-imut

Piniarneq pillugu Siunnersuisoqatigiit ivertinnerat aamma Piniarneq pillugu Siunnersuisoqatigiit suliassaat Aalisarnermut, Piniarnermut Nunalerinermullu Naalakkersuisoqarfiup isumagisarpai. Naalakkersuisoqarfik Piniarneq pillugu Siunnersuisoqatigiinnut allattoqarfittut atuuppoq aamma Piniarneq pillugu Siunnersuisoqatigiit tusarniaaffigineqarnerisa ingerlanneqarnissaat Naalakkersuisoqarfiup qulakteertarpaa. Piniarneq pillugu Siunnersuisoqatigiinnut ilaasortaapput kattuffiit suliffeqarfiillu piniarnermut aallaaniarnermullu attuumassutillit.

#### Imm. 2-mut

Aalajangersagaq tassaavoq Piniarneq pillugu Siunnersuisoqatigiit pillugit maleruagassanik, tassa imaappoq Piniarneq pillugu Siunnersuisoqatigiit suliassaannik, aalajangersaanissamut Naalakkersuisut tunngavissiisuusoq, ilaatigullu Namminersorlutik Oqartussanut siunnersuisinnaanermut tunngatillugu Piniarneq pillugu Siunnersuisoqatigiit qanoq inissisimanerannik imaqartoq. Suliassat ilaatigut imarivaat Piniarneq pillugu Siunnersuisoqatigiit suleriaasissani nammineerlutik aalajangersarnissaanut tunngavissap saniatigut, Piniarneq pillugu Siunnersuisoqatigiit katitigaanissaat, aningaasaqarnikkut periarfissaat il.il. pillugit imaqarami. Suleriaaseq Naalakkersuisunit akuerineqartussaavoq.

#### Imm. 3-mut

Suliani sorlderni Piniarneq pillugu Siunnersuisoqatigiit tusarniaaffigineqartarnissaat pillugu aalajangersakkanik aalajangersagaq imaqarpoq. Piniarneq pillugu Siunnersuisoqatigiit suliani nalinginnaasunik taaneqarsinnaasuni taamaallaat tusarniarneqarsinnaapput. Paarlattuanik

kommunip ileqqoreequsaanik saqqummiussinermut imaluunniit uumasunik pisassiiffiusartunut akuersissutinik agguassinermut atatillugu Piniarneq pillugu Siunnersuisoqatigiit tusarniarneqarsinnaanngillat. Tusarniutigineqartut isummerfigineqartassapput Piniarneq pillugu Siunnersuisoqatigiit suleriaasissaat malillugu.

Ombudsmandip oqaaseqaatimini septemberip 19-ianni 2002-meersumi uparuarpaa:  
"...*Piniarneq pillugu Siunnersuisoqatigiit apeqqutini piniarnermut tunngasuni Naalakkersuisunik siunnersuisartuupput, tassani pisuussutit uumassusillit eqqarsaatigalugit apeqqutit ineriartornerlu kiisalu taakku iluaquiginiarneqarnerisa aqunneqarnerat oqallisigineqartarlutik. Taamaalillutik Piniarneq pillugu Siunnersuisoqatigiit, suliassat piniarnermut allaaniarnermullu tunngasut oqaluuserisinnaavaat Naalakkersuisunut oqaaseqaammik tunniussinissaq siunertaralugu. Assersuutigalugu Piniarneq pillugu Siunnersuisoqatigiit, uumasut ilaat pillugit nalunaarutissanut missingiusiat ilaat tusarniaassutigineqarnissaat sioqqullugu saqqummerfigineqartarput kiisalu tusarniaanermit akissutit tiguneqarsimaleraangata takussutissiatut isikkulerlugit takuneqaqqittarlutik. Tusarniaanermi missingiusiat, tusarniaanermi akissutit, Piniarneq pillugu Siunnersuisoqatigiit siunnersuinerat kiisalu pisortaqarfimmit naliliinerit tunngavigalugit inassuteqaasiortoqartarpoq, Naalakkersuisut aalajangiinerinut tunngaviusartunik. Inatsimmi § 2, imm. 2-mi allassimavoj, piniarnermik aallaaniarnermillu allaffissornikkut aquatsinermut atatillugu piniartut atuisullu ilisimasaasa ilaatinissaat pingartinneqassasoq, ilaatigut kattuffiit susassaqartut kiisalu Piniarneq pillugu Siunnersuisoqatigiit aqqutigalugit. Tamatuma saniatigut Naalakkersuisut pisussaapput Piniarneq pillugu Siunnersuisoqatigiinnik tusarniaasarnissamut. Naalakkersuisut pisussaapput § 2, imm. 2 naapertorlugu naliliinermi ingerlanneqartussami Piniarneq pillugu Siunnersuisoqatigiit oqaaseqaataat naliliinerilu ilaatisallugit, tamannali isumaqanngilaq paasissutissanut allanut sanilliullugit siunnersuisoqatigiit oqaaseqaataat pingarnerutinneqassasut, kisiannili aamma siunnnersuisoqatigiit oqaaseqaataasa isiginiarneqannginnissaannut tunngavissaqanngilaq. Piniarneq pillugu Siunnersuisoqatigiinnik tusarniaasarnerup allatigut sunik siunertaqarnerata nalilerniarneqarnerani Piniarneq pillugu Siunnersuisoqatigiit aaqqissuussaanikkut siunnersuisartuvittut inissisisimaneri pingartinneqartariaqarpoq".*

Kiisalu Piniarneq pillugu Siunnersuisoqatigiinnut atatillugu oqaatigineqassaaq, Piniarneq pillugu Siunnersuisoqatigiit qanoq akuliksigidumik ataatsimiittarsinnaanerat eqqarsaatigalugu aningaasatigut periarfissat killeqarmata. Piniarneq pillugu Siunnersuisoqatigiit suleriaasiannut tunngatillugu, aningaasaqarnikkut pissutsit periarfissaqartippassuk, Piniarneq pillugu Siunnersuisoqatigiit ikinnerpaamik ukiumut pingasoriarlutik ataatsimiittartussaapput. Aningaasaqarniarnikkut periarfissat killeqarnerat pissutigalugu allakkatigut tusarniaasoqarsinnaavoq imaluunniit oqarasuaatikkut ataatsimiinnissamut aggersaasoqarsinnaavoq imaluunniit qarasaasiat atorlugit ataatsimiittoqarsinnaavoq.

Imm. 4-mut

Aalajangersagaq tassaavoq Piniarneq pillugu Siunnersuisoqatigiinnik tusarniaasarnissaq pillugu imm. 3-mik erseqqissaaneq, suliani kinguartinneqarsinnaanngitsuni allakkatigut tunngavilersuisinnaanermut tunngasoq, tassa imaappoq apeqqutit ataatsimiinnissap ingerlannissaanut utaqqissunneqarsinnaanngitsut. Tamatuttaaq oqaatigineqassaaq, "ataatsimiinnermi isummerfigineqassaaq" aamma tassaasinnaammata oqarasuaatikkut ataatsimiinneq imaluunniit qarasaasiaq atorlugu ataatsimiinneq.

### *§ 33-mut*

Imm. 1-imut

Aalajangersagaq una malillugu, nakkutilliinermut oqartussaasoq, matumani piniarnermut aalisarnermullu nakkutilliisut ilanngullugit, politiit aamma Issittumi sakkutuut, angallat nunakkoorulluunniit suugaluartoq kiisalu angallassisutit nunakkoorutilu unitsissinnaavaat, ikiffigisinnaavaat misissuiffagalugulu tamanna pisariaqartutut nalilerneqarpat.

Aalajangersagaq siamasissumik paasineqassaaq, tassa imaappoq, angallassisutit suugaluartulluunniit pineqarput, soorlu oqaasertaliunneqarsimasuni uani § 3, nr. 6.

Manna tikillugu pingaartumik illersornissaqarfip sakkutui imarsiortut (Issittumi sakkutuut) angallatinik nakkutilliinermik ingerlatsisimapput, tamakku unitsittarnerisigut ikiffigisarnerisigullu. Aallaavittut isigalugu Kalaallit Nunaanni Aalisarnermik Akuersissutinik Nakkutilliisoqarfik suliassamik taassuminnga ingerlatsisussaasoq § 5-imi akisussaanerup agguataarneqarneranut naapertuuttumik. Tamanna pisartussaavoq naalagaaffimmi oqartussaasunut allanut immikkut ittumik isumaqatigiissuteqartoqarsimangippat § 5, imm. 2 naapertorlugu. Tamatuma ilutigisaanik siusinnerusukkut illersornissaqarfip aalisarnermik nakkutilliisuinut politiinullu piumasaqaataasimasut pisussaaffiit Kalaallit Nunaanni Aalisarnermik Akuersissutinik Nakkutilliisoqarfip tigunikuuai. Kapitali 7-mi aalajangersakkanik atuutsitsinermut politiiniit aamma illersornissaqarfip aalisarnermik nakkutilliisuinit ikiorneqaqqulluni Kalaallit Nunaanni Aalisarsinnaanikkut Akuersissutinik Nakkutilliisoqarfik noqqaasinjaavoq, tamanna pillugu aalajangersimasumik pisariaqartitsisoqarsimappat, assersuutigalugu angallat ikiffigineqarnissaminik nakkutilliiffigineqarnissaminillu itigartitsippat.

Angallatip Kalaallit Nunaanneersuunera imaluunniit nunanit allaneersuunera apeqqutaatinnagu, nakkutilliinermik suliassat ingerlanneqarsinnaapput.

Akuersissutini piumasaqaatit eqquutsinneqarnersut misissorumallugu, angallatip nunakkoorutilu pappiliartaanik uppermarsaatitaanillu takunninnissaq Nakkutilliinermut oqartussaasup piumasarisinnaavaa. Tamanna nalinginnaasumik ima isumaqarpoq, kinaassutsimut uppermarsaammik, piniarnermut allagartamik akuersissummik akuersissutinilluunniit misissuineq, matumani ilanngullugu qulakkeerniarlugu inuk akuersissummik piginnittoq, piniarnermik aallaaniarnermillu ingerlatsisoq, inuup imaluunniit inatsisitigut pisinnaatitaasup akuersissummi allaqqasup assigineraa. Sulinermut atatillugu

misissuinermut atugassatut piniarnermi aallaaniarnermilu atortut qaqinnejarnissaat aamma Nakkutilliinermut oqartussaasup piumasarisinnaavaa.

#### Imm. 2-mut

Aallaavittut isigalugu Nakkutilliinermut oqartussaasup misissuineq, angallatip nunakkoorutilluunniit unitsinneqarfiani ikiffineqarfianiluunniit ingerlatissavaa. Kisianni angallatit nunakkoorutillu sumiiffimmut aalajangersimasumut ingerlaqqusaasinnaapput, pisanik atortunillu misissuinissaq nakkutilliinissarlu siunertaralugit. Kalaallit Nunaanni umiarsualivimmut toqqaerneqartumut angallat ingerlassasoq imaluunniit nunakkoorut sumiiffimmut toqqakkamut ingerlassasoq Nakkutilliinermut oqartussaasup peqqusinnaavaa. Pisat atortullu misissornissaat siunertarineqarsinnaavoq aamma pisat sukumiisumik kisinnissaat siunertaasinnaavoq kisianni pisanut atortunullu tunngatillugu uppermarsaatit qularnaarnissaat aamma siunertaasinnaalluni.

#### Imm. 3-mut

Piniarnerup aallaaniarnerullu ingerlannissaanut piniartup aallaaniartulluunniit akuersissummik peqarneranut uppermarsaammik takunninnissaq Nakkutilliinermut oqartussaasup piumasarisinnaavaa, tassa imaappoq inuup kinaaneranut uppermarsaat, piniarnermut allagartaq akuersissulluunniit. Inuup allap oqartussaassusillip Naalakkersuisuniillu toqqaerneqarsimasup, assersuutigalugu Kalaallit Nunaanni Namminersorlutik Oqartussani atorfillit, suliassani immikkullarissuni peqataasinnaanermut toqqaerneqarsinnaapput.

#### Imm. 4-mut

Aalajangersakkap aalajangersarpaa, eqqartuussivimmit aalajangiiffiusumik imm. 1-3 naapertorlugit nakkutilliinermut oqartussaasoq aamma inuk immikkut pisinnaatitaaffiligaq pisinnaatitaaffinnik ingerlatsisinnaasoq, kinaassutsimut uppermarsaammik takutitsinermigut. Tamanna immikkoortumi periutsimut maannamut atuuttumut akuerisaasumullu naapertuuppoq.

#### Imm. 5-imut

Suliassanik isumaginninnissamut, nakkutilliinermut oqartussaasoq aamma inuk immikkut pisinnaatitaasoq pillugit imm. 1-3-mi taaneqartutut, pisinnaatitaaffit periutsillu il.il. pillugit ersarinnerusunik maleruagassanik aalajangersaasinnaanermut Naalakkersuisut tunngavissaannik aalajangersagaq pilersitsivoq.

### § 34-imut

#### Imm. 1-imut

Aalisariummi angallatinik malinnaasinnaanermut atortulersuutinik (FOE) ikkussuisoqareersimangippat, taama ittumik ikkussinissamut piniarnermut aallaaniarnermullu angallammik piginnittooq peqquneqarsinnaaneranut nakkutilliinermut

oqartussaasup tunngavissaanik aalajangersagaq pilersitsivoq. Ilaatigut angallatip sumiiffia, siunnerfia sukkassusaa il.il. atortulersuutip nassiuttarpai.

Aalajangersagaq tamakkiisuunngilaq, kisianni paasissutissat sulianut allanut tunngassuteqartut aamma matumani pineqarsinnaapput.

Imm. 2-mut

Angallatit malinnaaviginissaannut atortulersuutit atornissaannut, matumani ilanngullugit atortulersuummik ingerlatsineq, teknikkimut nassuaatinik aamma sulianut allanut tunngassuteqartut paasissutissat il.il. pillugit ersarinnerusunik maleruagassanik saqqummiussinissamut aalajangersakkap uuma Naalakkersuisut pisinnaatippai.

*§ 35-imut*

Imm. 1-imut

Aalajangersakkami siunertaq tassaavoq nakkutilliinermut periarfissap qulakkeerneqarnissaa. Peqqusinerit inerteqqutillu taamaalliluni pisat nalunaarutiginissaat nalunaarsornissaallu pillugit nalinginnaasumik piumasaqaatinut pingaaruteqartumik tapertaasussatut atuuttussaapput, tamanna pillugu pisariaqartitsisoqartoq nalilerneqarpat.

Peqqusinerit inerteqquteqarnerillu angallassisutinut sunulluunniit atuupput, oqaasertalerneqarsimasutut uani § 3, nr. 6.

Sanilliussinermik tunngavik uani isiginiarneqassaaq, taamaallunilu periutsit sakkukinnerusumik sunniuteqarsinnaasut atorniarneqassapput, oqartussaasut assersuutigalugu nunami sumiiffimmut aalajangersimasumut imaluunniit pilannissamut sumiiffimmut aalajangersimasumut ingerlasoqarnissaanik peqqusinissaat sioqqullugu. Taamaalliluni nakkutilliinerup ingerlannissaanut tamanna pisariaqarsinnaavoq, assersuutigalugu sumiiffik imaluunniit sumiiffimmi pissutsit nakkutilliinermut naleqquttuunnginnerat pissutigalugu imaluunniit nakkutilliinermi assigisaaniluunniit atortulersuutinik immikkullarissunik atortunilluunniit pisariaqartitsineq pissutigalugit.

Nr. 1

Nakkutilliinermut oqartussaasoq assersuutigalugu angallammut nunakkoorummulluunniit, Kalaallit Nunaanni tulaassiffiusartumut sumiiffimmut aalajangersimasumut imaluunniit umiarsualivimmuit imaluunniit pilattarfimmut aalajangersimasumut, ingerlaqqusilluni peqqusisinmaavoq.

Nr. 2

Angallatip nunakkoorutiluunniit pisani usingiassanngikkai imaluunniit pilanneq aallartissanngikkaa oqartussaasup aamma peqqussutigisinnaavaa, pisat nakkutilliinermut

oqartussaasumit misissorneqarsimatinngagut imaluunniit nakkutilliinermut oqartussaasoq sumiiffimmi najuutilersinnagu.

#### Nr. 3

Imaatigut nunakkullu piniarnermi aamma tulaassineremi, tikinnermi imaluunniit angallammur nunakkoorummulluunniit usinik nuussineremi, nakkutilliisup najuunnissaa pillugu oqartussaasup peqqusisinnaaneranik aalajangersagaq malitseqarpoq. Tamanna assersuutigalugu atorneqarsinnaavoq, angallatinut, nunakkoorutinut, suliffeqarfinnut imaluunniit nunap immikkoortuinut aalajangersimasunut, piffissap ingerlanerani pisanik sunniuteqarluarnerusumik nakkutilliisoqarnissaanik pisariaqartitsisoqarsimatillugu imaluunniit pisariaqartitsisoqartillugu.

#### Nr. 4-mut

Assersuutigalugu uumasunit pisassiissutaasartunit aalajangersimasunit aningaasat kaaviiartitat nakkutilliiviginissaa siunertalarugu, angallatinut nunakkoorutinullu peqqusissutinik saqqummiussisoqarsinnaavoq, suliffeqarfiit tulaassineremi, usit nuunnerini, immikkoortiterineremi imaluunniit pisat agguanneranni ergersumik nakkutilliinermut oqartussaasumut siumoortumik nalunaarutigisassagaat usserasaqassasoq. Tassunga ilanngullugu oqimalutaaneq oqimalutaasartumit akuerineqartumit ingerlanneqarsinnaavoq.

### § 36-imut

#### Imm. 1-imut

Siunnersuusiornermut atatillugu nakkutilliinermi pisinnaatitaaffiit atuuttut pisariillisarneqarnissaasa pisariaqarnerat Naalakkersuisunit nalilersoqqissaarneqarnikuupput. Tassunga atatillugu pisariaqartutut isumaqarfigineqarpoq angallatinik, nunakkoorutinik suliffeqarfinnillu, pisat il.il. aallaavigalugit aningaasanik kaaviiartitsisunik, suliariinneqqittartunik, suliaqartartunik, poortueqqittartunik, assartuisartunik imaluunniit toqqortaateqartartunik nalunaarutigineqanngitsumik pisanik nakkutilliinermik ingerlatsisoqartarnissaa, matumani piniarnermik aallaaniarnermillu sunniuteqarluartumik nakkutilliineq ingerlassinnaajumallugu. Suliffeqarfinnut isersinnaanermut aamma angallatinut nunakkoorutinullu ikisinnaanermut piumasaqaat tassaaginnarpoq, Inatsisartut inatsisaannik imaluunniit taanna naapertorlugu maleruagassanik saqqummiunneqarsimasunik equuutsitsisoqarnersoq nakkutilliinermut oqartussaasup suliaqarnerani tamanna ilaasutut pisarmat. Taamaalilluni inatsisitigut pituttukkanik suliassanik isumaginnissinnaajumalluni nakkutilliinermik oqartussaasup nalinginnaasumik isersinnaanera matumani pineqarpoq.

Siunnersuummi taamaalilluni kinaassutsimut uppermarsaammik eqqartuuussivikkut aalajangiinertaqanngitsumik takutitsinikkut nakkutilliinermut oqartussaasup appakaassinnaanera attatiinnarneqarpoq, taanna angallatini, nunakkoorutini suliffeqarfinnilu siunnersuummi taaneqartuni pisanik nakkutilliisinnaavoq. Angallatit nunakkoorutillu oqaasertalerneqartutut § 3, nr. 6-imi, suliffeqarfiliu oqaasertalerneqarput siamasissumik,

tassaasut suliffeqarfiiit tamarmik, aningaasanik kaaviiartitsisut, suliarinneqqittartut imaluunniit pisanik toqqortarinnittartut imaluunniit pisanit taakkuluunniit ilaannik tunisassiorartut. Assersuutigalugu oqariartaatsimut tassunga aamma ilaasinnaapput pisiniarfiiit imaluunniit tunisassiorfiiit amernik, saanernik, kukinnik, niaqqunik, kigutinik imaluunniit mattammik il. il. suliarinneqqittartut tunisisartulluunniit.

#### Imm. 2-mut

Aalajangersagaq una malillugu Inatsisartut inatsisaannik unioqqutitsisoqarnera pillugu pasitsaassisooqarsimappat, inuit nammineq pigisaanni nalunaarutigineqanngitsumik nakkutilliilluni takuniaaneq aammattaaq nakkutilliinermut oqartussaasup ingerlassinnaavaa. Nakkutilliinermut oqartussaasup piffissap qanoq ilinerani inuit nammineq pigisaannut appakaassinnaanermik piumasaqarsinnaanera sakkortusineqarnikuovoq imm. 1 naapertorlugu. Taamaalilluni Inatsisartut inatsisaannik imaluunniit taanna naapertorlugu maleruagassaniittunik unioqqutitsinermut atasumik pineqartup nammineq pigisaa atorneqartoq pillugu pasitsaassisooqarsimassaaq . Piniartup nalinginnaasumik pisani nammineq illumini toqqortarisarsimappagit, tamatuma ilimanarsisissavaa, pisumi aalajangersimasuni tessani pisat toqqortarineqarnerinut nammineq pigisaq aamma atorneqartoq.

Sanilliussinermik tunngavik uani isiginiarneqassaaq, taamaalillunilu inuit angerlarsimaffiinut oqartussat isinnginneranni iliuutsit annikinnerusut atorneqassapput. Sulialli kinguartinneqarsinnaannginnera eqqarsaatigalugu imaluunniit nakkutilliinermi oqartussat iliuutsit annikinnerusut atorneqarnissaat utaqqippassuk upternarsaatit peerneqarnissaannik iginneqarnissaannilluunniit pasitsaassisooqarpat saneqqunneqarsinnaavoq.

Nammineq pigisap Inatsisartut inatsisaannik unioqqutitsinerup ilaatut atorneqarsimappat, nammineq pigisami unioqqutitsisumik pisarisaq, upternarsaatit, atortut assigisaallu, Inatsisartut inatsisaannik unioqqutitsinermut upternarsataasinnaasut, pillugit pisumi pasitsaassisooqarsimassaaq. Tamatuma saniatigut nammineq pigisaq Inatsisartut inatsisaannik unioqqutitsinermut atasumik atorneqarsimasoq aamma oqartoqarsinnaavoq, nammineq pigisaq Inatsisartut inatsisaannik unioqqutitsinermut upternarsataasinnaasunik pilersitsinermut, uninngatitsinermut, tunniussinermut toqqorsinermulluunniit atorneqarsimappat.

Nakkutilliinermi oqartussat angerlarsimaffimmut imaliinnarlutik isersinnaanngikkunik politiinut ikiortissarsiorsinnaapput. Politiit siumoortumik ikiorneqarnissamik qinnuigineqarsinnaapput, matumani pigisamik piginnittup appakaannissamut itigartissagaatik imaluunniit nakkutilliinermik oqartussaasup sulineranik akornusersuissasoq nakkutilliinermut oqartussaasup naatsorsuutiguniuk.

#### § 37-mut

#### Imm. 1-imut

Aalajangersagaq una malillugu Inatsisartut inatsisaanni aalajangersakkat eqquutsinneqarnissaannik nakkutilliinermut kiisalu Inatsisartut inatsisaat naapertorlugu maledruagassanut aalajangersarneqarsimasunut ersarinnerusunik maledruagassanik Naalakkersuisut aalajangersaasinjaapput. Aalajangersakkamut ilaapput pisat Kalaallit Nunaata nunamut aamma aalisarnermut oqartussaaffigisaani pisarisat.

Tamatuma saniatigut kalaallit nunamilu allamiut angallataasa nunakkoorutaasalu nunalittareri aamma Kalaallit Nunaata aalisarnermut nunamullu oqartussaaffiani usinik nuussineq pillugit Naalakkersuisut aalajangersaasinjaapput. Aalajangersagaq taanna malillugu Kalaallit Nunaata aalisarnikkut oqartussaaffigisaata avataani kalaallit angallataasa tulaassineri usilersoqqinnerilu pillugit malittarisassanik Naalakkersuisut aamma aalajangersaasinjaapput.

Imm. 2-mut

Aalajangersakkami uani tunngavissiaq atorlugu matumani nunanut allanut, nunap immikkoortuinut aamma nunanut tamalaanut isumaqatigiissutinut aamma naapertuuttumik, sukkulluunniit atuuttussanik nakkutilliinermi pisussaaffinnik nalunaarutinut Naalakkersuisut ilangussisinjaapput.

Siunertaasoq tassaavoq, unioqqutitsilluni pisanik tunniussinerit, nassiussinerit, neqaanillu pisinerit tunisaqarnerillu pinngitsoortinnissaat, matumani nakkutilliinermut oqartussaasup pitsaunerpaamik nakkutilliinermi atortoqarluni unioqqutitsisoqarnersoq, nalunaaruteqartoqarsimanningersoq imaluunniit piniarnermik aallaaniarnermillu nakkutigineqarsinnaasumik ingerlasoqarnersoq nakkutilliisinjaassammat aamma angallatit nunakkoorutilu allattaavinnut allattuisarnerannik imaluunniit piniartut nalunaarutaannik maledruagassallu atuuttut malillugit pisanik nalunaarsuineq ingerlanneqartarnersoq nakkutilliisinjaassammat.

Nr. 1

Unioqqutitsisumik piniarnerup aallaaniarnerullu killilernissaa siunertaralugu, inuit aamma inatsisitigut pisussaatitaasut pisat taakkuluunniit ilaaniq tigusineq pillugu paassisutissanik tunniussinissamut pisussaatitaanissaat pillugu maledruagassanik aalajangersaasoqarsinnaavoq. Assersuutigalugu tassaasinnaapput tuniniaaviit, suliffeqarfiiit, paaqqinnittarfiiit, neriniartarfiiit, tunitsiviit, tunisassiorfiit, niuerfiit, pisiniarfiiit il.il. pisussaaffimmik matuminnga peqquneqarsinnaasut. Pisussaaffik taanna ilaatigut aalajangersarneqarpoq Piniakkanik savaateqarnermilu tunisassianik tunisaqarnermi nalunaaruteqartarneq pillugu Namminersornerullutik Oqartussat nalunaarutaat nr. 10, 5. juli 2006-imeersoq aqqutigalugu.

Nr. 2

Unioqqutitsisumik piniarnerup aallaaniarnerullu killilernissaa siunertaralugu, tuniniaaviit, suliffeqarfiiit, paaqqinnittarfiiit, neriniartarfiiit, tunitsiviit, tunisassiorfiit, niuerfiit, pisiniarfiiit il.il. peqquneqarsinnaanerat pillugu aammattaaq maledruagassanik

aalajangersaasoqarsinnaavoq, pisanik taakkuluunniit ilaanik tuniniaasut inuit aamma inatsisitigut pisinnaatitaasut, pisanik tuniniaasinnaanersut misissortassagaat, tassa imaappoq, pineqartoq inuk piniarnermut allagartamik atuuttumik, akuersisumsumik atuuttumik uumasumut tuniniarneqartumut tunngatillugu kiisalu akuersisumsumut kommunip allaffiata naqissusiineranik imaluunniit pisat nalunaarsornerat pillugu akuersisumsumik paarisaqarnersoq misissussavaat.

Inuk imaluunniit inatsisitigut pisussaatitaasoq akuersisumsumik atuuttumik peqarnani pisaminik tunisisimasoq paasineqarpat, unioqqutitsisumik pisanik imaluunniit taassuma ilaanik pisisisimasut tuniniaaviit, suliffeqarfiiit, paaqqinnittarfiiit, tunitsiviit, suliffissuit, niuerfiit imaluunniit pisiniarfiiit il.il. kinguneqartitsisarnissamik peqquneqartarnissaat pillugu maleruagassanik aalajangersaasoqarsinnaavoq.

### Nr. 3

Aalajangersagaq uumasunit eqqissisimatitanit imaluunniit uumasunit pisassiissutaasartunit, pisassat nungunneqareerneranni pisat imaluunniit taassuma ilaanik tigusinissamut inerteqquoteqarnermik aalajangersaavoq. Tamanna tusagassiorfiiit, aalisarnermut piniarnermullu kattuffiit il.il. aqqutigalugit tamanut saqqummiunneqarnikuuvvoq aamma pisassiissutinit taama ittunit pisanik tuniniaaviit, suliffeqarfiiit, paaqqinnittarfiiit, tunitsiviit, suliffissuit, niuerfiit il.il. tigusisarnissaannut inerteqquoteqarnermut maleruagassanik aalajangersaasoqarsinnaavoq.

Siuliini allanneqartunut uiggiullugu, pisat unioqqutitsinikkut pisarineqarsimasut tigusisup ilisimasimappagu ilisimasariaqarsimagaluarpagilluunniit, unioqqutitsisumik pisanik tigusisumut kinguneqaateqartitsisunik maleruagassanik Naalakkersuisut aalajangersaasinnaapput.

### Imm. 3-mut

Pinarneq aallaarniarnerlu unioqqutitsisuusoq, nalunaaruteqarfiunngitsoq maleruagassaqanngitsorlu pinngitsoortikkumallugu, aalajangersagaq tunngavissamik Naalakkersuisunut pilersitsivoq, ilaatigut suliarinneqqaarneq tassa pisaq nutaaq imaluunniit taassuma ilaa piffissap piniarfiusup avataani pisiarisaq, qanoq pisiarineqassanersoq tunineqassanersorlu pillugit maleruagassanik aalajangersaasinnaanermik. Matumanii piffissap piniarfiusup qaangiunnerata kingorna ulla pingasut nalinginnaasuusarput kisianni uumasut ilaannut aamma tunisassiornermit aalajangikkat mininneqarsinnaapput.

### § 38-mut

### Imm. 1-imut

Akiliisitsissutip annertussusissaanik uuttuineremi Pinerluttulerineremi inatsimmi tunngaviit atorneqassasut tunngavigineqarpoq, tak. tassani § 121 aamma § 127. Tamatuma kinguneraa akiliisinnaassutsip aamma pinerluttup qanoq ittuunerata saniatigut pineqartup suunerani

iliuutsit akornusernissaannut inuiaqatigiit soqutigisaat pingaartinneqassasut. Tassunga ilanngullugu unioqqutitsilluni iluanaarutaasinnaasut nalingi aallaavagineqassapput. Angallatip angissusia, piginnaasaa aaqqissugaaneralu kiisalu inatsisinik unioqqutitsinermut tunngasut piissutsit eqqarsaatigineqarsinnaapput. Taamaattorli akiliisitsinerup qaffassisusia pitsaaliuinertut erseqqissumik sunniuteqartutut annertussusilerlugu aalajangersarneqartariaqarluni.

Piniarneq pillugu suliani aallaaviusartoq tassaavoq, piniartoq aallaarniarlu imaluunniit angallat nunakkoorulluuniiit, nammineerluni unioqqutitsinerusinnaasut pillugit unnerluunneqartarmat. Taamaattorli imm. 4-mut innersuussisoqarpoq, piginnittooq angallammik nunakkoorumilluunniit ingerlatsisuusimanngippat. Ataatsimoorluni piniarnermi, piniarnermut peqataasut tamarmik akisussaasuupput.

Nr. 1

Inatsisartut inatsisaanni aalajangersakkanik allanneqartunik aamma Inatsisartut inatsisaanni aalajangersakkani allanneqartuni tunngaveqartumik maleruagassanik aalajangersarneqartunik unioqqutitsinermut akiliisitsinermik eqqartuussisoqarsinnaavoq.

Nr. 2

Inuit inatsisitigullu pisinnaatitaasut Inatsisartut inatsisaanni peqqussinernik nalunaarutinillu eququutsitsinngitsut, akiligassiinermik eqqartuunneqarsinnaapput.

Nr. 3

Inatsisartut inatsisaat malillugu tunniunneqartuni akuersissutini piumasaqaatinik unioqqutitsinerit akiligassiinermik eqqartuunneqaataasinnaapput.

Akuersissummi piumasaqaatit aalajangersaaffigineqarsinnaapput kisianni akuersissutip siornatigulli aallarniarnermi akuersissutinik taaneqartartuni piumasaqaatit aamma aalajangersagaasinnaapput. Piumasaqaatit assersuutitut taaneqarsinnaapput tunisassiornissamut akuersissutit aamma tunisinissamut pisussaaffit, akuersissutip piumasaqaatitaani allassimassasut.

Nr. 4-mut

Paasissutissanik eqqortunik nalunaaruteqartarneq tassaavoq, piniarnerup aallaaniarnerullu nungusaataannginnissaanut aalajangersaanermut tunngaviusoq. Taamaammat paasissutissanik eqqunngitsunik salloqittaataasunilluunniit tunniussisoq akiliisinneqarluni pillarneqassaaq. Taamatuttaaq paasissutissanik tunniusseqquneqaraluarluni tunniussinngitsoq akiliisinneqarluni pillarneqassaaq.

Imm. 2-mut

Aalajangersagaq una malillugu Inatsisartut inatsisaat naapertorlugu saqqummiunneqartunik maleruagassanik unioqqutitsineq taamatuttaaq akiliisitsinermik kinguneqartitsisarnissaq pillugu

aalajangersaanissamut Naalakkersuisut pisinnaatitaapput. Taamaalilluni Inatsisartut inatsisaat tunngavissiivoq, nalunaarutini akiliisitsineq atorlugu kinguneqartitsisarnissaq pillugu aalajangersaanissamut.

Maleruagassaq taanna aamma nalunaartummi aalajangersaanissamut periarfissiivoq, tassa kommunip ileqqoreqqaani akiliisitsineq atorlugu kinguneqartitsisarnissaq aalajangersarneqarsinnaasoq.

#### Imm. 3-mut

Pinerluttulerinerimi inatsimmi kapitali 5, § 18-im ierserpoq aalajangersakkani pinerluttulerinerimi inatsisitigut akisussaanermi ingerlatseqatigiiffiit il.il. akisussaaunerannut tunngasumi allanik aalajangersaasoqarsimannngippat, kinaluunniit inatsisitigut akisussaasoq, matumani aktiaateqarluni ingerlatseqatigiiffiit, piginneqataassuteqarluni ingerlatseqatigiiffiit, piginneqatigiiffiit, soqtigisaqaqatigiiffiit, peqatigiiffiit, aningaasaateqarfiiit, pigisat, kommunit, namminersorlutik oqartussani oqartussaasut kiisalu naalagaaffimmi oqartussat pineqartut.

#### Imm. 4-mut

Aalajangersakkami imm. 4-im pineqarpus angallammik imaluunniit nunakkoorummik piginnittup imaluunniit oqartussaasup inuttut akisussaanera. Nalinginnaasumik tamanna amerlanertigut tassaassaaq piginnittooq. Taamaattorli aalajangersakkap kinguneralugu angallammik imaluunniit nunakkoorummik attartortoq taamaalillunilu angallammik atuisinnaasoq aamma akisussaatineqarsinnaavoq. Pingarnerli tassaavoq, akuersissut sumiippa taamaalillunilu pisat kimut iluaqutaassappat. Suliffeqarfiiit ilusilersorneqarneranni tamanna aamma atuuppoq, pingarnertut piginneqatigiiffik aamma piginneqatigiiffiup pigisaa piginneqatigiiffik. Piginneqatigiiffiup pigisaa piginneqatigiiffik akuersissummik peqarsimappat aamma piginneqatigiiffiup pigisata piginneqatigiiffiup angallat (attartugaq) attartorsimappagu, taanna akisussaasuussaaq. Paarlattuanik suliffeqarfiiup angallammik attartortitsisup, akisussaaffik piginngila.

### *§ 39-imut*

#### Imm. 1-imut

Piniarnermut allagartamik pissarsisinnaaneq imaluunniit piniarnermut allagartamik peqarsinnaaneq annaaneqarsinnaavoq, piniartoq aallaaniartorluunniit inatsisartut inatsisaanni maleruagassanik unioqqutitsisimappat, tak. § 38, imm. 1 aamma 2. Aalajangersakkami naqissuserneqarnikuovoq, matumani pineqartut tassaasut piaaraluni imaluunniit arlaleriarluni sakkortuumik mianersuaalliornerit. Matuma saniatigut § 15, imm. 2-p malitsigisaanik, pisut ilungersunartut imaluunniit arlaleriarluni iliuuseqarnerit pineqassapput.

Inatsisartut inatsisaannik, pissutsit sakkortusisatut imaluunniit sakkortuumik unioqqutitsinertut isigineqarsinnaasut tassaapput, assersuutigalugu piniarnermut allagartamik peqarnani piniarneq

aallaaniarnerlu, akuersisummik peqarnani piniarneq aallaaniarnerlu imaluunniit nunap immikkoortuani piniarfigeqqusaanngitsumi piniarneq. Aamma uumasunik eqqissisimatitanik piniarneq aallaaniarnerlu imaluunniit piffissami eqqissisimatitsiffiusumi piniarneq aallaaniarnerlu. Aamma suliani inuussutissarsiutigalugu piniartup imaluunniit sunngiffimmi aallaarniartartup uumasumik toqtsinerminut aallaat akuerisaanngitsoq atorsimappagu imaluunniit uumasoq pissataq qimaannarsimappagu. Taamatuttaaq akuersisummi piumasaqaatit unioqqutinnejnareri arlallit pineqarsinnaapput, matumani pisanik nalunaaruteqarsimannnginneq imaluunniit Inatsisartut inatsisaannik arlaleriarluni unioqqutitsinermi.

Aamma inuk piaaraluni imaluunniit inummut allamut sakkortuumik mianersunngitsumik akornusiisimappat imaluunniit inuuneranik ulorianartorsiortitsisimappat, piniarnermut aallaarniarnermullu pisinnaatitaaneq annaaneqarsinnaavoq. Aalajangersagaq aqqutigalugu inuup allap piaaraluni eqqaasseratarsinaanera imaluunniit sakkortuumik mianersornani pissusilfersorneq peqqutigalugu aallaartoortoqarsinnaanera eqqarsaatigineqarpooq.

#### Imm. 2-mut

Piniarnermut allagartamik inuk arsaagaaguni, kommunimi tassani pineqartup aalajangersimasumik najugaqarfigisaani, kommunip allaffianut taanna tunniunneqassaaq. Suliaq Aalisarnermut, Piniarnermut Nunalerinermullu Naalakkersuisoqarfimmut nalunaarutigineqassaaq, taamaalilluni Luli-mut piniarneq pillugu qarasaasiami toqqorsivimmut eqqartuussut taanna nalunaarsorneqarniassammat.

#### Imm. 3-mut

Piniarnermut allagartamik, akuersisummik peqarsinnaanermit arsaagaaneq, eqqartuussinikkut pissaaq. Imaassinnaavoq piffissami aalajangersimasumik arsaarneqartoq imaluunniit arsaarneqarsimagallarneqassasoq.

Piffissami killilikkami arsaagaaneq pineqarpat, arsaagaaneq ukiup ataatsip ukiullu tallimat akornanni sivisussuseqarsinnaavoq. Arsaarneqarsimagallarneqassasoq pineqarpat pineqartoq ukiut tallimat qaangiunneranni arsaarneqarsimanerup kipisinnaanerata nutaamik aalajangiiffiginissaanik qinnuteqarsinnaavoq. Arsaarneqarsimagallarneqassasumik aalajangikkap taamaatinnissaanik qinnuteqarneq akuerineqanngippat akueritinniarneq misilinneqaqqissinnaavoq, kisianni minnerpaamik itigartitaanerup siulliup kingornagut ukiut marluk ingerlareerneratigut.

### § 40-mut

#### Imm. 1-imut

Unioqqutitsilluni piniarnermik ingerlatsinermi angallatip nunakkoorulluunniit atorneqartup arsaarinnissutiginissaanut aamma angallatip umiarsualivimmukarnissaanik peqqunissaanut imaluunniit eqqartunneqarnissaq siunertaralugu nunakkoorutip sumiiffimmut aalajangersimasumukarnissaanut pisinnaatitsissut aalajangersakkap nakkutilliinermut

oqartussaasumut tunniuppa. Taamatut arsaarinnikkallarnermut atatillugu Kalaallit Nunaanni eqqartuussisarneq pillugu inatsimmi kapitali 37-mi aalajangersakkat taamaaqataanik atuutissapput.

Kapitali 37-imik tigummigallaanissamut (arsaarinninnissamut) piumasaqaatit ilaatigut tassaapput pineqartoq inatsisinik unioqqutitsinermut, pisortatigoortumik unnerluutigineqartussamut, naleqquttumik pissuteqartumik pasineqarpat aamma pissutissaqarpat isumaqassalluni arsaarinnissutigineqarallartussaq uppernarsaatitut atorneqarsinnaasoq imaluunniit arsaarinnissutaasariaqartoq, tak. § 418.

Kapitali 37-imik kinaassusersiunnginnissamik piumasaqaateqarpoq, tak § 421, matuma kingorna arsaarinnikkallartoqarsinnaangilaq, akuliunneq suliap qanoq ittuuneranut peqqarniissusaanullu kiisalu akuliunnerup nassatarisinnaasaanik annaasanut imaluunniit akornuserneqarnermut naleqquttuusorineqannngippat.

Malugineqarpoq tigummigallagaaneq umiartornermi inatsisitigut taaguutaasoq, inuup tigummigallarneqarneranut paarlaanneqassanngitsoq (paarnaarussatut paarisaaneq).

#### Imm. 2-mut

Aalajangersakkami angallatinik eqqartuussisarneq pillugu (hot pursuit) FN-imik imarpiit pilligit isumaqatigiissummi 1982-imeersumi artikili 111 malinneqarpoq. November 2003-imik Inatsisartut aalajangerneqarpoq FN imarmi pisinnaatitaaffiit pilligit isumaqatigiissut atortussanngortinnejassasoq, tak. 5. decembari 2003-mi inatsisartut aalajangiussaat.

"Pimoorullugu malersuinermik" taaneqartartup aallartinnissaanut aalajangiisuulluinnartussaq tassaavoq, unioqqutitsineq Kalaallit Nunaata aalisarnermut oqartussaaffiani pisimanersoq. Angallat aamma Kalaallit Nunaata aalisarnermut oqartussaaffiani suli inissisimassaaq, malersuinerup aallartinneqarnissaa sioqqullugu. Tassani malersuineq unitsinneqarani ingerlannejassaaq.

#### Imm. 3-mut

Akuliuffigineqartup piumasarippagu politiit erngerlutik kingusinnerpaamillu akunnerit 72-it qaangiutsinnagit suliassamik eqqartuussivimmut saqqummiussissapput, eqqartuussiviullu aalajangerumaarpaa akuliunneq akuerineqarsinnaanersoq. Suliaq taamaattumik kinguarsaanertaqanngitsumik Nuummi unnerluussisussaatitaasunut nassiunnejassaaq. Suliat taamatut ittut Kalaallit Nunaanni Eqqartussivimmut suliassanngortinnejqarsinnaapput.

Inatsisartut inatsisaannik unioqqutitsinermut atatillugu akiliisitsinissaq itigartinneqarpat, pisuni aalajangersagaq atorneqartussatut eqqarsaatigineqarnikuuvooq.

#### § 41-mut

#### Imm. 1-imut

Aalajangersagaq una malillugu angallat nunakkoorullunniit tigummigallarneqarsinnaavoq, aningasat piumasarineqartut imm. 1-imi taaneqartut akilerneqarsimanissaannik qulakkeerinninnissaq piumasaqaataasimappat imaluunniit aningasat piumasarineqartut akilerneqarsimanissaannut sillimmasiisoqarnissaata tungaanut. Taamatut angallammik nunakkoorummilluunniit tigummigallaaneq aamma § 44 malillugu pineqaatissiinerit naammassineqarnissaasa tungaanut attatiinnarneqarsinnaavoq. Aalajangersakkamut ilaapput kalaallit aamma nunat allamiut angallataat imaluunniit nunakkoorutaat.

Aalajangersagaq malillugu suliaq pillugu aalajangiinerup kingorna qaammatit marluk ingerlaneranni imm. 1-imi piumasarineqartut akilerneqarsimanngippata, angallammi imaluunniit nunakkoorummi atortunilu aalajangiunneqartumik naammassiniaasoqarsinnaavoq.

Imm. 2-mut

Aalajangersagaq una malillugu imm. 1-imi malittarisassaq atorneqarsinnaanngilaq, angallammut nunakkoorummilluunniit atuisimasoq akuerisaanani angallammik nunakkoorummilluunniit equnngitsumik pissarsisimappat.

#### *§ 42-mut*

Imm. 1-imut

Aalajangersakkami pineqarpoq akiliisitsinissamik arsaarinninnissamillu allaffissornikkut aalajangiineq, tassunga ilanngullugu nalilinnik arsaarinninneq. Periarfissaq siunnersuutikkut Inatsisartut inatsisaata susassaqarfia tamakkerlugu atuutilersinneqarpoq, taamaalilluni Inatsisartut inatsisaani maleruagassanik imaluunniit taanna naapertorlugu maleruagassanik saqqummiunneqartunik unioqqutitsineq aallaavigalugu aamma akiligassiisoqarsinnaasoq imaluunniit arsaarinnittooqarsinnaanera allaffissornikkut akuerineqarsinnaavoq.

Pineqartup unioqqutitsinermi pisuusutut nassuernissaa aammalu akiliinissamut kingusinnerpaamik piffissaliussaq malillugu akiliisinnaanerminik nalunaaruteqarnissaa piumasaqaataavoq. Akiligassiinermik arsaarinninermilluunniit allaffissornikkut aalajangiinermut atatillugu qinnuteqartoqarneratigut akiliinissamut piffisarititap sivitsorneqarnissaanik periarfissaq aalajangersakkami atuutilersinneqarpoq.

Akiligassiisoqarnissaani suleriaaseq aaqqissuinerlu erseqqissoq nakkutilliinermi oqartussanut, aalisarnermik nakkutilliisunut angallatinullu nakkutilliisunut ilitsersuutini aalajangersarneqassaaq. Tassani pineqassapput unioqqutitsinerit assigiaartut, pisariusuunngitsut aamma nalornilersitsisunik uppernarsaatnik ilaqaanngitsut. Taamaammat nakkutilliinermik oqartussamut ilitsersuutinik suliaqarnermut atatillugu, taamatuttaaq suliat, allaffissornikkut akiliisitsinissap atorneqarnissaanut naleqquttut, pillugit allassimaffimmik suliaqartoqassaaq.

Piniarneq aallaaniarnerlu pillugit inatsimmi tunngaveqartumik, uumasunik pisassiiffiusartut il.il. pillugit nalunaarutinik unioqqutitsinerit pillugit piniarnermut aallaaniarnermullu tunngasuni nalinginnaasumik suliani akiligassiinernut periutsit ilusilersuinerillu asserpiaraat. Assersuutigalugu qilalukkat qaqtortat qernertallu akuersisummik peqarnani pisat pillugit suliat imaluunniit umimmannit pisanit neqi tamakkerlugu piniartup peersimanngisai pillugit suliani imaluunniit tuttunut pisanut tunngatillugu pisanik nalunaarsuiffimmur immersuisimannginnermik suliani.

Taamatuttaaq arsaarinninnissamik periarfissaq siunnersuutip kinguneraa, tassunga ilanngullugu nalilinnik arsaarinninnissamik allaffissornikkut aalajangiineq.

Unioqqutitsilluni sakkoq pineqartup pisuunerminik atsiornissaata kiisalu eqqartuussivik avaqqullugu arsaarinninnermk suliamik aalajangiinissamik isumaqataanerminik nalunaaruteqarnissaata tungaanut nakkutilliinermi oqartussanit tigummineqassaaq. Piumasaqaatini taakkunani marlunni ataaseq eqqortinneqanngippat eqqartuussivik avaqqullugu arsaarinnittooqarsinnaanngilaq.

Taamatuttaaq nalilinnik eqqartuussivik avaqqullugu arsaarinnittooqarsinnaavoq.

Eqqartuussivik avaqqullugu arsarinninneq akiligassiinerlu ajornannginnerusutut isigineqarsinnaammat aalajangeeriaaserlu nanertutaannginnerummat, innuttaasup suliani ajornanngikannersuni allaffissornikkut suliap naammassineqarnissaanik toqqaanissaa naleqquttutut isigineqarpoq.

#### *§ 43-imut*

##### Imm. 1-imut

Aalajangersakkami aalajangersarneqarpoq, suliani § 42 naapertorlugu allaffissornikkut suliarineqartuni, Kalaallit Nunaanni eqqartuussisarnermi inatsimmi § 347, imm. 1-imi malittarisassat taamaaqataanik atorneqassasut. § 347, imm. 1-imut takuneqarsinnaavoq unnerluutigineqartup killisiorneqarneq sioqqullugu unnerluutigisamik ilisimatinneqassasoq aamma pineqartoq oqaaseqarnissamut pisussaaffeqanngitsoq. Malittarisassat taakkua maleruarneqartut nalunaarusiami takuneqarsinnaassaaq.

#### *§ 44-mut*

##### Imm. 1-imut

Arsaarinninnermi Kalaallit Nunaanni pinerluttulerinermi inatsit atorneqassaaq.

##### Imm. 2-mut

Aalajangersakkami imm. 2-imi aalajangersarneqarpoq, angallammi nunakkoorummiluunniit unioqqutitsilluni pisanik arsaarinninnermi ilaasut pisat taakkualu nalingini angallammiittut angallatillu avataaniittut ilaasut, tassani pineqaratik pisat unioqqutitsinani pinarnermeersut upernarsarneqartut.

Aalajangersagaq taanna pinerluttulerinermi inatsimmi tunngavinnik saneqqussineruvoq. Saneqqutsineq pisat ilaat unioqqutitsilluni pinarnermeersut aallaaniarnermeersullu immikkoortinnissaasa ajornakusoornerat tunngavigalugu isigineqassaaq.

Pisat sorliit unioqqutitsilluni pinianermeersut aallaaniarnermeernersullu paasiniarlugit nalilersuinermi angallammut nunakkoorummulluunniit tunngatillugu pissutsit aalajangersimasut atuuttut pingaartinneqassapput. Allattuivimmi, usilersornermut allattuivimmik, angallammi nunakkoorummilluunniit pinarnermi aallaaniarnermilu atortunik, atortut suut atorneqarsimanerannik allattuivik malillugu allassimasunik il.il. nalilersuisoqarsinnaavoq. Aammattaaq pisat nalunaarutigineqartunut naapertuunnersut nalilersuinermi pingaartinneqarsinnaapput.

Taamaammat pisat sorliit unioqqutitsilluni pinarnerup allaaniarnerullu ilaani pisimancerat nalilerniarnerani matumani suut upernarsaatissaqarnersut apeqquaassapput.

Unioqqutitsilluni piniarneq aallaaniarnerlu, pisanik arsaarneqarnermik kinguneqartumi pissutsit imaassinnaapput, angallat nunakkoorulluunniit pinarnermut aallaaniarnermullu pinarnerup unitsinneqarnera atuuttunngoreersoq atorneqartoq imaluunniit piniartup aallaaniartulluunniit pisassani nungoreerai pisoq. Aamma imaassinnaasoq angallat nunakkoorullunnniit pinarnermi atortunik unioqqutitsisuusunik atuisimasoq, matumani arfernik angisuunik pinarnermi aallaasit nalinginnaasut atorneqarsimallutik, naak tuukkat qaartartortallit il.il. atorneqarsimasussaagaluartut.

Imm. 3-mut

Aalajangersagaq taanna malillugu angallatip pisaanik annertuumik uteqattaartumillu nalunaaruteqannginnerani angallammik angallatilluunniit nalinganik arsaarinnittoqarsinnaavoq.

Pisut annertunerit imatut paasineqassapput, pisut pillugit piaaraluni annertuumilluunniit mianersuaalliorluni nalunaaruteqannginneq kukkusunilluunniit nalunaaruteqarpat. Pisut tassaasinnaapput pisassarisanit amerlanerusunik uumasunik pisassiiffiusartunik angallat nunakkoorulluunniit pisaqarsimasoq, nunami piniarfigeqqusaanngitsumi pisaqarsimasoq, atortut inerteqqutasut atorlugit pisaqarsimasoq, uumasunik eqqisisimatitanik assigisaanilluunniit pisaqarsimasoq.

Atortut pinerluuteqartup unioqqutitsinani ingerlatsineranut annertuumik pingaaruteqartut, pissutsit immikkut ittut tamassumunnga pissutissaqartitsinngippata

arsaarinnissutigineqassanngillat. Naligiimmik pissusilersornissamik tunngavissaatitaasoq matuminnga naliliiniarnermi eqqumaffigineqassaaq.

Imm. 4-mut

Aalajangersakkami arsaarinnittarneq pillugu nalunaarutikkut sukumiinerusunik malittarisassiornissamut Naalakkersuisut pisinnaatinneqarput. Taakkuninnga malittarisassiornermi § 44 imm. 2 aamma 3-mi oqimaalutaaneq atorneqarsimasoq atorneqaqqisaaq. Tassa imaappoq malittarisassat pingarnerit pinerluttulerineremi inatsimmi aalajangersakkat § 166-imiipput. Atortut pinerluuteqartup unioqqutitsinani ingerlatsineranut annertuumik pingaaruteqartut pissutsit immikkut ittut tamassumunnga pissutissaqartitsinngippata arsaarinnissutigineqassanngillat. Taamaattorli imm. 4 naapertorlugu malittarisassanik aalajangersaanermi § 44 imm. 2 aamma 3-mi oqaatigineqartut ilaatinneqanngitsut atuupput.

*§ 45-mut*

Imm. 1-imut

Aalajangersakkami tassani pisanik arsaarinninnermut atatillugu immikkoortitsineq. Imm. 1 malillugu pisanik immikkoortitsineq assersuutigalugu pisat angallammi nunakkoorummiluunniit illuartiterisigut pisinnaavoq.

Immikkoortitsineq aamma pisinnaavoq pisanik nalunaaqutsiinikkut imaluunniit lastip inilluunniit paarnaarneqarnerannik nalunaaqutsiinikkut. Tamanna piumasarineqartutut isigineqarpat periarfissat taakku marluutillugit ataatsikkut atorneqarsinnaapput.

Immikkoortitsinermi nalunaaqutsersuinermiluunniit akulerutsitsinissaq pinngitsoorneqarsinnaanngippat, angallat nunakkoorulluunniit oqaaseqatigiit aappaat malillugu pisanik arsaarinnissutinik imaluunniit nalinginik arsaarinnissutigineqartunik tulaassininssaanik peqquneqarsinnaavoq.

Imm. 2-mut

Aalajangersagaq una malillugu pisat arsaarinnissutaasut angallat nunakkoorulluunniit Kalaallit Nunaata nunakkut imaluunniit aalisarnikkut oqartussaaffianiitillugu immikkoortinnejassapput.

Aalajangersagaq pisat arsaarinnissutaasut angallammiiginnarneranni nunakkoorummiinneranniluunniit atorneqassaaq.

*§ 46-mut*

Imm. 1-imut

Akiligassiinernit arsaarinninnermiillu isertitat tigunissaannut tunngavissamik aalajangersagaq una Namminersorlutik Oqartussanut tunniussivoq, taamaalillutik taakku Nunatta karsianut tutsinneqassapput.

*§ 47-mut*

Imm. 1-imut

Inatsisartut inatsisaat ullormi 1. januaari 2020-mi atuutilissaaq.

Imm. 2-mut

Tamatuma ilutigisaanik Piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersoq kingusinnerusukkut allannguutinik ilaqartoq atorunnaarsinnejarpooq.

Imm. 3-mut

Inatsisartut inatsisaat nr. 12, 29. oktober 1999-imeersoq naapertorlugu maleruagassat aalajangiinerillu Naalakkersuisut saqqummiunniusaat, taakku taarserneqarnissaasa imaluunniit maleruagassanit allanit atorunnaarsinnejarnissaasa tungaannut atuutissapput.

Piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersoq sioqqullugu malittarisassat atuutilersinneqartut taarserneqarnissaasa imaluunniit Inatsisartut inatsisaat una imaluunniit allat tunngavigalugit maleruagassanik aalajangersaanikkut atorunnaarsinnejarnissaasa tungaannut atuutiinnassapput.